

APOSOLO LILI'NA'ANI

¹ Oho Tiofilusio. Nani yata'a buku'nigu Yesu yata'a hapi fito li huto hu'ehinana hiti to kaga lu epi'ehina hiti ninamofihi fayahi go'ohube. To lili'na'a hapi fito li'ehinamoloti ti baga iloto, ² kokulumalugu ti'ehina kana moloto oto pa sobe. Kokulumalugu meti'ehigo Sikalafu'uba Yesuhi he'mago kaga ma luto enele'mo nupa hu'ehina aposolo panana'a lu epi'ehina. ³ Koyapa'i Yesu ai gabu foya li kofito fililoto ai alihi aposolo pana'amagitoga huto hu'ehina. Ai fili'ehinagati ho tiloto kosaba bo nohube luto babuna fato fato'i aposolo pana'a hu enubulo molo'ehina. To 40 yupaha kanagu aposolo pana'amagi Yesu enubulo huto huto huloto Hu'mamofihi Kapo'amofihi kaga'a beto hu epi'ehina yabe. ⁴ Yesu aposolo pana'a hiti nohuto kaga ma luto lu epi'ehina: Lenali Yelusale hepa'i he'mite mebilo. Lenali'i lepilube luto Afo'nifu kaga koyapa'i molo'ehinana lenalitoga alina'mu geba hite minalo. To nani anana'mu koyapa'i kaga alu lepi'ohuna yabe. ⁵ Yoniu nagami lafatu'i boana'i nagami'i folo epolo'ehina yabe, Ya hu'ehina lenali yatama kana mebu'ehinogo Sikalafu'uba komopa'anigu tilina'mu yabe.

Yesu kokulumalugu ti'ehina

Mk 16:19-20; Lk 24:50-53

⁶ Aposolo naga'magi Yesu hiti bite li nupa hite minelete ma lite loka he'ahana: Sipi Bo,

yatai ya'ma kana'alo Isilaeli kapo aku'i li kosaba hilata ni'ifihe? ⁷ Ya lite loka hago Yesu ma luto lu epi'ehina: Ana suhi huto hilina yupa hiti to kana'a hiti molosemofihi nani Afo'nifugo keheli'ehibe. To ya yupahi huto hilibe lite lenali mekehelilana'mu yabe. ⁸ Ya hu'ehinaya Sikalafu'uba lenalitoga alina yupahi lenali amuya lilete, Yelusale kegi'afi, to asaga'i Yutia to Samalia kegi'a buto nohe'muna to melugu foto'i nekisa'aga nani kumu'i lu yege halana'mu yabe. ⁹ Yesu ya luto kaga lu su hologo enali be gelete nehago Yesu kokulumalugu notigo sopohi moneuba oto le'mo fenene enubuloti hu'ehina.

¹⁰ Ai ya huto notigo aposolo pana'a enali kokulumalugu be goba be goba lite nehago ana'asilo bo loemo koholi gukete li hekolose bole enali nehanalo ho ti'aha'ina. ¹¹ Etali ma hite lu epi'aha'ina: Lenali Galili bose, henabe lite maga ho ti'ehite kokulumamofihi bulu'i nehabe? Ya'ma Yesuhi, yatai Hu'mau lenalitogati le'moto kokulumalugu notina okaba hiti bo ana suhi luto aku'i mone yupahi alina'mu yabe.

Yutasihi hepato nona'a lili'na lilina bo mone le'mo huto hi'ahana

¹² Ya la'igo enali ya'mana Oliba kosa he'mite Yelusale i behe hite bi'ahana yabe. Oliba kosa ai Yelusale hepa'i lebatosi mino'ehina yabe. ¹³ Ya hu'ehigo enali Yelusale'i nehetilete minelata nehana nohi hasagu ti'ahana. Enali enigi'ani, Pitau, Yoniu, Yemesiu yagi to Batolomu, Filipiu yagi to Tomasi, Atulu yagi to Matiu, Alifiasihi pana'a Yemesi, Simoni gimbo yagi, to Yutasiu Yemesihi

pana'a ya hite enali asaga'i mine'ahana. ¹⁴ Ya'ma bo asaga'i enali komopa'ani monetoga melete li nupa hite numuna hite minelata hi'ahana. To ana'i luga'a hiti to Maliau Yesuhi ito'afi hiti to gonamu tamu'a enali ana hite moneko ete li nupa hite nunumu hite mine'ahana yabe.

¹⁵ Nunumu hite minana kana'a nesi'a babu luto enebe ligilago mone yupahi 120 bona'i li nupa hite minago Pitau ho tiloto ma luto lu epi'ehina: ¹⁶ Nogonamu tamu'nimagita lenali kehelilo. Koyapa'i monolugu fayahi mone nina Sikalafu'uba Tebitihi bagalo lu huto hu'ehina yabe. Ai Yutasi kumu lu'ehina, ya'ma bouba ai Yesuhi halana bona'magihi kapo'ani li hokolo hilina'mu yabe. Ya lite fayahi ge'ahana ana suhi ahu'ehibe. ¹⁷ Koyapa'i Yutasiu ai lali hiti moneka minototi ai hiti ya'mana lili'na moneka li'ohuta yabe luto Pitau lu epi'ehina yabe.

¹⁸ Yutasiu Yesuhi fateha'amagi emina efatu'i me'i nesi'a mone mina fi'ehina yabe. Ai ana melugu buto ho kago ipa'a folaganuguti i hokolo gehesa higo asaga komopa'agu ninana fegutoga limi su hago fili'ehina yabe. ¹⁹ Alihi asaga bona'i Yelusale minanamagi ya'mana kaga keheli'ahana yabe. To enali kaga'aniguti ya'mana hepa'i gi'a Akelatama yabe li'ahana. Ya'mana kagaguti gi'a he'ahanamofihi hapa'a golaha me'i yabe luto ni'ibe.

²⁰ Yalo Pitau lu'ehina: Ya'ma fayahi namamo lise bukugu ni'ina, ai ma luto yabe.

Ai noha'a yu'nohi mineno.

Bona'i mone ana nonugu memineneno.

To mone hiti ma luto ni'ina yabe.

Bo moneuba ai hepa'i lito

nona'a lili'na alino.

²¹ Ya'mu luto yatai bo mone lali hiluta suhi luto Yesu filito ho ti'ehinamofihi bu goto ya'ma kaga'a lu yege halune, ai ya'mana bo Yesu hiti mon-eka humofa'na huta kana'a luga lemege'i molo-mofa'na hu'ehilina boguti le'mo ho tiluta'mu yabe. ²² Koyapa'i Yoniu boana'i nagami'i folo epolomofa'na higo to Yesu lili'na'a hapi filoto limo limo oto Hu'mau lalitogati Yesuhi le'moto ifoga ti'ehina, ya'ma asaga'na nolunamofihi bu go бага i'ehilina bo le'mo ho tilune. To ai ya'mana bouba lali hiti moneka lili'na lito Yesu fili'ehinaguti ho ti'ehibe luto lu yege haluta bo yabe. ²³ Pitau ya luto lulago bo loemo etele'mo ho ti'ahana; Yosefe, ai Basabasi, to mone fato gi'a Yasitasi yabe luto nohina hiti to Mataiyasi hiti etele'mo ho ti'ahana yabe. ²⁴⁻²⁵ Ya hilete yalo enali nunumu ma lite hi'ahana: Sipi Bo, kai asaga bomagihi komopa'anigu bu go fulu tise bo nohane. To yamu'i, Sipi Botimaka, ma bo loeguti hiya bouba ya'mana hepa'i lito lili'na lilifi kai lelepibo. To Yutasu kapo'aga bilube'mu nohuto aposolo lili'na he'mi'ehinana'a ana lili'na kosaba bo lilinamo ni'ibe. ²⁶ Ya lite nunumu hilete enali luga'amagi Mataiyasio yabe lite enayahi netigo to luga'amagi Basabasio yabe lite enayahi tina Mataiyasiu be ligi'ehina yabe. Ya higo enali Mataiyasihi nayahi luga luga su hoto nigigusagati mone heleko malago aposolo pana'i minanalo le'mo mele'ahana yabe.

2

Sikalafu'i limi'ehina

¹ Sikalafu'i limise kana'a olago enali moneko nonuga ete li nupa hite mine'ahana. ² Ya hi'ahago mele'isi kokulumaluguti nogo molo'ehina, ai amuya habafahi suhi luto nogo molo'ehina, ya huloto li nupa hite nehana nonugu tito ana habafahuba bai to'ehina. ³ To logo guluya meha'a legina huto nohigo bu ge'ahana. Ya nehago ana logo guluya meha'a nesi nesi huloto moneko moneko bonato mino бага i'ehina. ⁴ To Sikalafu'uba asaga aposolo pana enalitoga bai tago enali fato fato kaga li'ahana, ai Sikalafu'uba li enabagalo malana kaga li'ahana yabe.

⁵ Yuta bona'i luga'a Yelusale ete mine'ahana, enali mono bona'i hiti to bona'i luga'a fato fato hepatoti ete li nupa hite mine'ahana. ⁶ Ya hite nehanalo sipi nogo kokulumaluguti malana kehelilete babu bona'i limo gehesa hilete aposolo pana'magi kaga fato fato nogo hite nelago limo gehesa hana bona'magi nogo'aniguti fato fato'i kaga nelago kehelila kehelila hi'ahana. Ya hilete enali ana kagalo topa helete enegelo gofa bi'ahana. ⁷ Ya hilete enali luga'aga enekesa yigi babu nelite luga kegi'a enegelo bilete ma lite li'ahana: Enali asaga bo ma kaga nelana asaga'i Galili bogo nehabe. ⁸ Hena hi'ehite enali moneko moneko bomagita nogoti hite kaga fato fato nogoguti nelabe? Enali itotigi atotigi lago keheliohuta nogomoguti kaga nelabe. ⁹ Maga li gehesa huto nohuta bona'iya Patia to Mitia to Ilima hepato bo yabe, to lali Mesopotamia bona'i

yagi, Yutia to Kapatosaia hepatoti, to Ponitasi to Esia bona'i yabe. ¹⁰ Filigia to Pamifilia kegi'ati, Iyipi bona'i Libia kegi'a Sailini lebatoti yagi, lali Lomu bo maga oto nominota. ¹¹ Lali Yuta bo hiti to fato bona'i Yuta bona'magi hapa'ani li'ohuta bona'i yagi, Kiliti to Alebia bona'i yagi lali asaga'i fato fato nogoti nina nohuta enali ana mone'isi nogotiguti Hu'ma amuya lili'na li huto hu'ehinamofihi lu yege hago nogotiguti keheli бага une. ¹² Ya hilete enali topa helete enekesa yigi babu lilete enali'ani ma lite ai loka hago ai loka hago hi'ahana: Ya'ma kaga nelanaguti hena suhi huto hilina ni'ibe? ¹³ Ya nelite luga'amagi kiya yokolo ka lu epelete enali kosaba bai nagami'i babu lite ne'ehite nelabe li'ahana.

Pitau lu yege ho'ehina'a

¹⁴ Ya lago Pitau hiti to nayahi luga luga su hoto nigigusagati mone heleko malago nehana aposolo naga'i hiti asaga'i ho tilete kehe sipi iloto kaga lu hokolo huto asaga boana'i ma luto lu epi'ehina: Lenali Yuta bona'i hiti to asaga boana'i lenali Yelusale ete li gehesa hite nehana-magita nani kaga mone'ya lilube'mu nohunagi kehelilete ya'mananamofihi hapa'a keheli bati hilabe. ¹⁵ Lenali lu keheli fa keheli nehana'a hite ma bomagi enali bai nagami'i ne'ehite negi nagiga nelabe lite melilo. Yata'isi ma'asi etehi ni'ibe. Bona'i ete ya'ma kana'a bai nagami'i menelata nehabe. ¹⁶ Ya hu'ehinaya ya'ma huto nohinanalo koyapa'i lu huto huto bo Yoeliu ma lu'ehina yabe:

17 Ya'ma suhi kokuluma hiti me'i hiti
su halina yupahi
li huto hiluna'mu yabe luto
Hu'ma lu'ehina:
Nani Sikalafu'nimofihi amuya'a
asaga boanatoga
molo бага iluna'mu yabe.
Lenali panatinimagi to patinimagi hiti
enali lu huto huto bona suhi lite
kaga lu yege halana'mu yabe.
To nani fato fato'na
neheya kola botinimagihi
enali enubulo li huto hiluna'mu yabe,
to oyafatinimagi bamu'i
nani hu enubulo malaluna'mu yabe.

18 To ana huto
ya'mana yupahi asaga boana'i
enali nani lili'na neli netanamagihi
Sikalafu'nimofihi amuya'a enalitoga
malalube,
yahi nogo'ni enali babafi bana suhi lite
kaga'ni lu yege halabe.

19 Nani babeyafana fato huse'i
kokulumatoga ifoga
li huto nohuto ana huto ma afetoga
melugu li huto nohinogo'ni
golahi hiti logo hiti
to lokiya sopohi huto hilibe.

20 Nani yege li gelehe hinogo'ni
metepu gilibe.

To ikahi le'mo gelehe hinogo
golahi huto hilibe.

Ya huto asaga'na huto hu su holenogo

Sipi Bo kibinamofihi kana'a huto huloto
i besa lo baga ilibe.

²¹ Ya hinogo

boana'magi Sipi Bomofihi gi'a halana
enali'i Hu'mau enele'menogo
ai boana'a minalabe.

Kaga lu yege holata bo Yoeliu ya'ma luto
lu'ehina yabe.

²² Lenali Isilaeli bomagita ya'ma kaga kehelilo.
Nasalete bo Yesuhu kaga lu lepilube'mu no-
hube. Ya'mana bomofihi yato Hu'mau amuya
lili'na emigo li'ehina hiti topa hose'na hiti to
babeyafana hiti li huto huto lenali folagahatigu
bu'ehina, ya Hu'mau ho lifi'ehina bo nohibe lite
lenali bu go bati hilabe luto yabe. ²³ Koyapa'i
Hu'mau ai'a ekesa yigito mololoto ai ya'mana
bo Yesuhi lenali lenayanugu molo'ehina yabe.
To enali kaga li gofa hose bomagihi enayanugu
meleletetini malipu yafalo hago fili'ehina yabe.

²⁴ Ya hi'ahana Hu'mau ya'mana bo aku'i le'mo
ho ti'ehibe. Ai gabu gigo fili'ehinana asaga'i
li he'mi su ho'ehibe. Hena'mugope kene mala
malauba ya'mana bomofihi gufa'alo meligo yabe.

²⁵ Ya'ma luto Tebitiu ai kumu'i kaga mone ma luto
lu'ehina:

Sipi Bouba asaga yupahi nubulo higo
bu go'ohube.

Ai nayahi lamaga'aga nohinago
nani'i ana'ina
moneuba nele'mo felu mehalina'mu yabe.

²⁶ Ya'mu luto nani nipa'nigu laga nohigo
nani nofokehe kaga nolube.

Nugufa'niuba hiti hetofana'mu geba huto

minalibe.

²⁷ Kai nugufa'ni he'mitogo
filise bona'magi hepatoga meminalibe.

To ana huto
lamana bomofihi gufa'a he'mitogo
tuguma mebilina'mu yabe.

²⁸ Kai minoba minoba hepa'i ni'inamofihi
kapo'a a'nelepi'ahane.

Yalo kai nani hiti moneka minalu'inauba
nani nugufa'nigu

laga gofa nebesilina'mu yabe.

Tebitiu ya'ma luto lu'ehina yabe.

²⁹ Nigibo nagabose, nani ma'naka luto Tebitiu
tatatimofihi kaga'a lu hokolo huto lu lepilube. Ai
afligo akeli he'ahana ai kene keli'a yatai kana'alo
lali hiti ma folagahatigu ni'ibe. ³⁰ Ya hu'ehina
ai Tebitiu kaga lu yege hose bo nohibe, ai
Hu'mau ma luto lu molo'ehina kaga akeheli yafa
hu'ehina yabe. Nani panaka mone kai siakalo
nona'a minalina kiminogo'ni kai hepa'i lilina'mu
yabe. ³¹ Tebitiu Hu'mau li huto hilube'mu nohi-
namofihi hapa'a abu goloto Mesiau aku'i ho tilina
kaga ma luto lu'ehina:

Hu'mau filise bona'magihi
hepalugu gufa'a he'minogo
meminalina'mu yabe.

To gufa'a tuguma mebilina'mu yabe.

³² Ya'mana Yesuhi Hu'mau ale'mo ho ti'ehigo
lali bu golototi ai kaga'a lu yege nohone.

³³ Yatai ai kokulumalugu tito Hu'mamofihi
yahi lamaga'aga nohibe. Ai koyapa'i afo'afu
emilube ka lu molo'ehina'a huto Sikalafu'i
afo'afitogati ali'ehibe. To lenali yatai bu gela

kehelila nehananaya Yesu ai yatai lalitoga molo baga i letabe. ³⁴ Tebitiu ai'a kokulumalugu meti'ehinaya, ai ma luto lu'ehina:

Sipi Bo Hu'mau Sipi Bo'nimofihi ma luto lu emi'ehina:

Malo nayahi lamaga'aga minobo.

³⁵ Ya hu'ehitogo

alihi fatehaka kigigusaluga enele'mo melenogo bilabe.

³⁶ Ya hu'ehinagi asaga Isilaeli naga'magita ya'mananalo keheli bebe salune. Ya'mana Yesuhi lenali malipu yafalo hago fili'ehina, ai'i Hu'mau Sipi Bo le'mo lolo higo nohina ai Yesu Kilisitou nohibe luto, Pitau ya luto lu epi'ehina yabe.

³⁷ Asaga boana'magi ya'mana kaga kehelilete enali enelesa'ani ligo Pita hiti to luga'a aposolo pana'magitoga ma lite enoloka he'ahana: Ligibo lagabose. Ya lanago lali hena hiluta ni'ibe?

³⁸ Pitau ka'anilo ma luto lu epi'ehina: Lenali mone'isi mone'isi komopatini i gelehe hilete Yesuhi gilo nagami'i falalana lenali foipana-tini li he'minogo Hu'mamofitogati amuyana Sikalafu'a lepilibe.

³⁹ Koyapa'i Hu'mau ka molo'ehinaya lenalitoga hiti to yagapanatiniloga hiti to asaga'i me'i foto nehana hiti, asaga'i enali Sipi Boti Hu'matifu kehe ilina bona'i ya'manana epilina'mu yabe.

⁴⁰ To Pitau fato fato kaga lu hokolo luto lu epi'ehina. Ai ma luto lu'ehina: Lenali kaba hu bati hilo. Hu'mau foipa bona'i osahi epilina-gi bonatini ma bati mehana bona'i enemege'i melete enali hapa'ani li lalagi kaba hite minalo. ⁴¹ Ya luto Pitau lulago ai ka'a keheli

bati hana bona'i ana yupahi nagami'i fele su he'ahana. Ya'mana yupahi bona'i nehana'alo Hu'mau molo emi'ehina 3,000 boana'i yabe. ⁴² Enali aposolo pana'magi kaga'ani mone'a hiti kehelilune lite amuya mele'ahana, to enigibo nagabo enehe'mola, nose'na monekolugu li nupa hite nela hite to nunumu monekolugu li nupa hilete hilata hi'ahana yabe.

Yesutoga komopa'ani emi'ahana bona'magi minetemofhi hapa'a

⁴³ Sipi lili'na fato fato'i to topa hose'na hiti aposolo naga'magihi enayato Hu'mau babu luto li huto higo asaga boana'i enali be gelete enelesa'ani ligo koli hi'ahana. ⁴⁴ To asaga boana'i enali Yesutoga komopa'ani neeminamagi enali hiti ho ti бага i'ahana. To asaga enali nasana'ani keheligo asaga mono bona'i li nupa hite minanamagihina lolo hu'ehina. ⁴⁵ Enali fe'noha'ani bona'i neepite efahi lilete ana efa guna i eto eto lite lilata hi'ahana yabe. ⁴⁶ Asaga yupahi utehi etehi moneko naga'i lolo hite sipi mono nonuga li nupa hite bilata hi'ahana, to noha'anigu nose'na monekolugu nupa hite nelata hi'ahana, to fuluna kiya yokolo'nagu minete nose'na nelata hi'ahana yabe. ⁴⁷ Asaga yupahi utehi etehi Hu'mamofhi gi'a li saga hite minelata hago asaga boana'magi enugufagu bati hu'ehina yabe. To asaga yupahi Sipi Bouba boana'i luga'a enubuto bito enali folagaha'anigu molo emilata higo boana'i babu lu'ehina yabe.

3

Gi sibina hu'ehina bo ai gigusa'a aku'i bati hu'ehina

¹ Mone yupahi Pitaugo Yoniugo utehi yege limito sili sili noligo nunumu hilata kanalo sipi mono nohi ni'inaloga ti'aha'ina. ² To Hetofa Kasito yabe luto gi'a nina kasito bo mone gigusa'a sibina lo'ehina ito'afu keto'ehina mino'ehina. Asaga yupahi ya'mana kasito le'mete ete he'mi etago nohuto boana'i mono nonugu elata hana-magihi efa kumu kehe ito nominana bo yabe. ³ Ya'mana bouba Pitaugo Yoniugo sipi mono nonugu tilu'ibe'mu neha'igo bu etogoloto ana'ina nimiliyo luto kehe i'ehina. ⁴ Ya ligo Pitaugo Yoniugo ana bo bu go fiya ilete ma luto Pitau lu emi'ehina: Le'ali'i bu le'egobo. ⁵ Ya la'igo ana'ina nimilu'ibe'mu nela'ifi luto etubugu etogo'ehina. ⁶ Ya higo Pitau ma luto lu emi'ehina: Nani efahi meli'ohube, ya hu'ohunaya nani li'ohunana kimilube. Yesu Kilisitou Nasaleté Bomofihi gi'alo nolu ketonagi kai kapo molobo. ⁷ Ya luto lu emiloto Pitau ana bomofihi yahi lamaga'a liloto he'moto le'mo ho ti'ehina. Ya higo ana'asilo mele'isi ana bomofihi gi'a hiti to gihupaba'a hiti aku'i amuya moloto bati hu'ehina. ⁸ Ya hulago ana bouba leke holago tiloto kapo nesi'a i gofa huto mololoto Pitanogo Yoninogo hiti sipi mono nonuga bu'ehina. To ai sipi gelo biloto kapo moloto nobuto, heleko lago tiloto limiloto huto Hu'mamofihi gi'a li saga huto fokehi li'ehina yabe. ⁹ Ya huto nobigo asaga li gehesa hite minana boana'magi ana bo bu ge'ahana. ¹⁰ Enali

ana bona'magi ya'ma bo ai sipi mono nopofihi Hetofa Kasiha'alo nohuto ana'ina'mu kehe ilata bo ma nohibe lite akeheli'ahana. Ya hilete hena suhi huto hifi lite topa he baga ilete enekesauba loe lae hu'ehina yabe.

Pitau sipi mono nonugu kaga lu'ehina

¹¹ Ana bouba Pitanogo Yoninogo etunu ki pili koloto Solomonihi Hasa yabe lite gi'a mele'ahanagu nehago babu boana'i lime gehesa hite yege fi'ahana. To enali ana boana'i enekesa'ubago higo enekesa'ani lu'ehina yabe.

¹² Ya hago Pitau bu enogoloto kaga ma luto ana boana'i lu epi'ehina: Isilaeli Naga'ise. Hena hibe lite ya'manalo lenekesa yigi babu nelabe? Lenali hena'mu le'ali'i bulu'i nehe'ahabe? Etali'atiti amuya'atitiloti ma bo lusa gi eta'igo kapo nemalabe lite nekehelifihe? O'e, ya huto meni'ibe.

¹³ Ai Abalaha to Isaka, to Yakopu hiti to lali tatatigi asaga'i enali Hu'ma'anifu ai Yesu koko pana'amofihi gi'a liyafa hu'ehina yabe. Ai ya'mana bo fateha'amagi enayanuga epilago Pailatiu lu kehelito le'mo buto bito he'mi etalube'mu hina lenali Pailatihi bulo lenemegesa hu emi'ahana yabe. ¹⁴ Ai hetofa bo foipana'a meni'ina bomofihi lenali lenemegesa hu emi'ahana yabe. Ya hilete lenali fato bo moneuba bo mone ho fili'ehina ya'ma bo limibo lite Pailatihi kehe igo ai le'mo lepi'ehina yabe.

¹⁵ Ai hetofa bo kapo bati'a lelepito mino kosaba huse hepato lele'moto bilube'mu nohina bo lenali ho fili'ahabe. Ya hilago Hu'mau aku'i kene keliguti le'mo ho ti'ehina, le'ali ya'mananamofihi kaga'a lu yege hose bole nohu'ibe. ¹⁶ To

le'ali Yesutoga komopati'a moloto le'emehi emi'ohu'ibe. Ya'mu luto Yesuhi gi'aua ma gigusa sibina nohina bomofihi le'mo amuya nomalago lenali kehelilete bu go bati nehabe. Yesutoga komopati'a emito le'emehi emi'ohu'ina Hu'mamofitogati le'alitoga o'ehinauba ya'ma amuyana hetofana aitogati oto lenali lenubulo huto nohigo asaga'i bu go бага neibe.

17 Nalalu'nigita ma'naka lite lenali hiti to kaba botinimagi hiti lenali ka keheli bati huse'natini meni'igo ya'ma suhi li huto hi'ahabe. 18 Ya hi'ahana koyapa'i Hu'mau kaga mone ma luto kaga lu yege hose bomagihi enabagalo lu'ehina, Mesia'nifu ai gabu gise'na li kofilibe. Ya lu'ehinalo lenali ya'ma suhi li huto hi'ahanauba ana kaga бага i'ehibe. 19 Ya hu'ehinagi lenali komopatini i gelehe hinogo ai Hu'mau foipanatini kele li he'mi lepalalibe. 20 Ya hite nehinogo kana monelugu Sipi Bouba yuhufa amuya lepilibe. Ya huloto Mesiahi lenalitoga ho lifilibe. Ya'mana bo Hu'mau koyapa'i le'mo ho ti'ehina, ai Yesu yabe. 21 Ai yatai kokulumalugu nohuto mone yupahi Hu'mau asaga'na kokulumagu hiti melugu hiti ni'inana le'mo kosaba hilina kana'a geba hilina'mu yabe. To koyapa'i kaga'a lu yege holata bomagi enabagalo Hu'ma lu'ehina'a huto yabe. 22 Moseu ma luto lu'ehina: *Sipi Bo ai Hu'ma afotinifu nohibe, ai nani'i hu'ehina suhi luto kaga lu yege hose bo mone ho lifnogo lenalitiniguti huto hilina'mu yabe. Ai asaga kaga lu lepilinamofihi keheli bati hite minalo.* 23 To asaga boana'i ya'mana bomofihi

kaga'a keheli meemilana Hu'mau enoho filinogo ai bona'a hiti aku aku'i meminalana'mu yabe. ²⁴ To Samueliu yagi to kaga lu huto huto bo luga'a alihi ai megesalo huto hi'ahanamagi enali asaga'i yatai kana'amofihi kaga lu yege he'ahana yabe. ²⁵ Lenali kaga lu yege hose bomagihi yaga-pana'ani minalo. Koyapa'i Hu'mau tatatinigitoga ule'ale kaga molo'ehina lenali li enebe sililata bona'i yabe. Ai ma luto Abalahahi lu emi'ehina: *Kai tatakafitoti asaga melugu boana'magi lusa li бага ilabe.* ²⁶ Hu'mau koko pana'a le'mo ho tiloto lenali lusa lepilibe luto lenalitoga yata'a ho lifi'ehina. Ai komopatini li gelehe huto foipana-tini li he'mi lepalalube luto o'ehina yabe.

4

Pitaugo Yoniugo kaba bomagi enubulo ka foya li etete'ahana

¹ Pitaugo Yoniugo etali sipi mono nonugu boana'i kaga lu epite neha'igo sipi mono noto kaba bo hiti to kimi bomagihi kaba bo'ani hiti to Satusi bona'i enali analo e'ahana. ² Yesu filiehinagati aku'i ho ti'ehina ana suhi lite asaga filise bona'i aku'i ho tilana'mu yabe lite boana'i lu epite neha'ina'mu enali enitaluga logo bi'ehina yabe. ³ Ya hilete enali etayato lite naga ite sinihi agilube'mu nohigo nonuga etele'me mele'ahana yabe. ⁴ Ya hana enali babu boana'i etali ka'atiti akeheli bati hilete liyafa hite mege'i mele'ahana. Enali ya'mana boana'i asaga'i 5,000 yabe.

⁵ Yago eteha'a kaba bo'ani hiti babafi bona'i hiti to keya kaga lu neepina bo hiti enali asaga'i

Yelusale li gehesa hi'ahana. ⁶ Enali sipi mono bona'i enikibina Anasiu, to Kaiyafasiu hiti, to Yoniu to Alekasatau yagi asaga'i sipi kaba enikibina bo naga'i li monekolugu ete li nupa he su he'ahana. ⁷ Enali enubulo Pitanogo Yoninogo etele'mo ho tilete ma lite etoloka he'ahana: Letali hena hite li huto neha'ibe? Hena huse amuyana li'ehite li huto neha'ibe? To letali kiyi'afihi gi helete ya'mana suhi li huto neha'ibe? ⁸ Ya lite etoloka hago Pitatoga Sikalafu'uba bai tolago ai ma luto lu epi'ehina: Lenali Isilaeli bona'magi kaba bo'anise. To olopa babafi bona'ise. ⁹ Le'ali bo mone gigusa'a sibina hu'ehina yatai le'mo bati hu'ohu'inamofihi le'oloka helete ya'mana bo hena huto bati hu'ehifi lite keheli bati hilune'mu nehabe. ¹⁰ Ya hiletemo lenali asaga'i hiti to Isilaeli naga'i hiti ya'manana keheli bebe salo. Yesu Kilisitou Nasaleté Bo ai gi'alo ma bomofihi gufa'a amuya moloto bati hu'ehibe. Ya higo ai folagahatinigu yatai lenubulo ho ti'ehibe. Lenali Yesuhi malipu yafalo hago fili'ehinamoya Hu'mau aku'i kene keliguti le'mo ho ti'ehibe. ¹¹ Yesuhi ai kumu luto mono bukulugu ma luto ni'ina yabe:

Efaha nohi gilata bomagita

laga melepesina efahuba

aliha'a sipi huto huto

hetofa amuya efahi lolo hulata nohibe.

¹² Bo mone fato'i nohinauba melehe'malina'mu yabe. Yesu ai'asigoko lele'mo lubuto bilata bo nohibe. To asaga hepa'i ni'inalogati mone gihiti bo fato'i lubuto biloto lele'malibe luto Hu'mau le'mo huto mehu'ehina yabe.

¹³ Pitaugo Yoniugo etali koli mehise amuya melete kaga lu yege ha'ina enali bu ge'ahana. To etali babafi bomale'i memina'ina fa'mene bole neha'ibe lite kanisole bomagi akeheli'ahana. Ya'mu lite enali kaba kanisole bomagi enekesa yigi babu lilete ma lite akeheli'ahana, koyapa'i etali Yesuhi mege'i melete moneka mine'ahana yabe. ¹⁴ To etali gufa'a le'mo bati hi'aha'ina bo hiti moneka ho tite nehago be gelete ya'mu lite enali kanisole bomagi etali la'ina kaga'atitilo nona'a mone meli'ahana yabe. ¹⁵ Ya hilete enali kanisole bomagi nonugati etele'mo fegutoga he'migo nelimi'igo enali'ani musi musi ka ma lite li'ahana: ¹⁶ Ma bole hena hu etatalune? Asaga Yelusale bona'magi etali topa ho'ehinanamo ya'ma sipi foya mone li huto huto hi'aha'inamofihhi kaga'a akeheli su he'ahanamofihhi lali bahane mehaluta'mu yabe. ¹⁷ Ya'mu luto etali ya'mana kaga fato fato hepatoga boana'magihi lu epimofa'na mehiliyo, to letali Yesuhi gi'a aku aku'i mone'a hiti helete boana'i kaga lu meepiliyo luto etegekesa bilune li'ahana. ¹⁸ Ya lite kaga lu kehelilete Pitanogo Yoninogo aku'i nonuga kehe ite etele'mete tilete ma lite lu etimi'ahana: Letali aku aku'i Yesuhi gi'a helete ai gi'alo boana'i enelepilata lu meepiliyo lite etegekesa bi'ahana yabe.

¹⁹ Ya lite lago Pitaugo Yoniugo ma lite kanisole bomagihi ka'anilo lu epi'aha'ina: Lenalitini loko hite hiya kagauba Hu'mamofihhi bulo bati hilifi lite kehelilo. Lenali kagamofihhi mege'i malalu'ifi to Hu'mamofihhi mege'i malalu'ifi lenaligo kehelilo lite li'aha'ina

yabe. ²⁰ To le'ali kaga lu yege hose'nati'a mehe'milu'ina'mu yabe. Asaga'na le'ubulo huto higo bu go'ohu'inanamofihifi to le'ekesatu'i keheli'ohu'ina le'ali lu yege homofa'na hilu'ina'mu yabe. ²¹ Ya lite la'igo enali kanisole bona'magi amuya melete kaga lu etetelete etele'mo he'mi'ahana. Enali naga'i etimilana kaga li huto mehi'ahana yabe. Hena'mugope asaga boana'magi huto hu enubulo molo'ehinamofi kumu lite Hu'mamofitogago enegelo bi emite gi'a liyafa hana'mu yabe. ²² To Pitaugo Yoniugo topa ho'ehinamo sipi lili'na li huto hite le'mo bati hi'aha'ina bo ai koyapa bo kufu'a 40 li he'mi'ehina bo yabe.

Enali Hu'mamofitoga amuya'a lilune lite nunumu hi'ahana

²³ Pitanogo Yoninogo etele'mo he'mina ana kana'asilo etalalu'atitigi nehanaga bilete asaga kaga kanisole bona'magi lu etete'ahana enali'i beto hu epi'aha'ina yabe. ²⁴ Ya hila'igo enali asaga'i akehelilete komopa'ani monetoga melelete ma lite Hu'mamofitoga nunumu hi'ahana: Sipi Bo, kai kokuluma hiti me'i hiti to hege nagami'i hiti to asaga'na sigina mehinanalo ni'ina kaika lolo hu'ahata yabe. ²⁵ Koyapa'i Sikalafu kagu kaga mone ma luto Tebitiu ai koko panaka lali tatatifihi bagalo lu'ahata yabe:

Enali fegutoga bona'i henabe lite
enitaluga logo bilata nohigo,
lali nagatimagi sibi sibi enekesa
fato fato'i neyigibe?

²⁶ Enali enikibina bo asaga

noto noto hepatogati ho ti baga
 to sipi bo hepato hepato mino baga i'ahana
 to ti su helete
 Sipi Bo Hu'ma hiti to Mesia'afi hiti
 enemegesa hu etimite
 etele'mo melugu malalune lite
 ho ti baga ilana'mu yabe.

²⁷ Ya'ma Tebitiu koyapa'i ya lu'ehinagi to lusiga ma'naka luto Helotiugo Ponitiasi Pailati hiti enali fato naga'a hiti to Isilaeli bona'i enali Yesuhi le'mo melugu malalune lite moneko ma hepalogu li nupa hi'ahana, ya'ma koko panaka mana'a koyapa'i le'mo molo'ahata yabe. ²⁸ Enali asaga'i monekolugu li nupa hilete asaga'na koyapa'i li huto hilabe luto amuya kaga lu'ahata ai anana huto hilina'mu yabe. ²⁹ Oho, Sipi Bo, amuya kaga asaga'i li'ahanamofito kai yatai kehelibo, ya huloto lali kai koko pananaka lehe'mobo. Ya hu'ehitogo lali amuya moloto koli mehuse kai kagaka lu yege ho ketalune. ³⁰ To kai kayahaka li saga huloto enebesise bona'i enele'mo bati no-huto to topa hose'na fato fato'i to sipi lili'na koko panaka hetofa'a Yesuhi ai gi'alo li huto hubo. ³¹ Enali ya hite nunumu ahilago li nupa hite nehana nonugu imima'i li'ehina. Ya huloto enali to Sikalafu'uba tito bai tolago enali Hu'mamofihi kaga'a lu yege homofa'na hi'ahana yabe.

*Hu'mamofitoga komopa'ani emite minana
 bona'i enali koguna ite mine'ahana*

³² Hu'mamofitoga komopa'ani emite minana bona'i enali moneko kaga liyafa hite mine'ahana. To bo moneuba ai fe'noha'alo bu goloto nani'ni

nasana'ni ni'ibe luto melu'ehina. Asaga fe'noha'a enali asaga'i nehanamagi enali'na hiti li baga i'ehina. ³³ Enali aposolo naga'magi Sipi Bo Yesu fili'ehinagati aku'i ho ti'ehinamofihi kaga'a lu yege nehago ana ka'aniuba amuya sipi molo'ehina yabe. Ya hago Hu'mau fuluna enalitoga epi baga ito hetofa lu epolo'ehina yabe. ³⁴ Bo mone enali folagaha'aniguti nose'namu fito fe'noha'amu sa mehu'ehina yabe. Enali me'ani hiti to noha'ani hiti ni'inamagi fato bona'i efaloti neepite enali ana efahi lite bite, ³⁵ aposolo naga'magihi epigo enali guna ite enemeto enemeto hite epilata hi'ahana yabe.

³⁶ Ya hite minanagu bo mone mino'ehina ai gi'a Yosefe. Enali aposolo naga'magi Banabasio lite fato gi mele'ahana. Ya'mana gimofihi hapa'aya ma luto ni'ibe, ai amuya kaga lu epito enekesa bilata bo yabe. Ai Libai nagaluguti Saipalasi hepato bo yabe. ³⁷ To ai'a me'a nesi'a fato bomofihi noemito efahi liloto ana efahi lito buto aposolo naga'magihi epi'ehina yabe.

5

Ananiasiugo Safailaugo

¹ Bo mone mino'ehina gi'a Ananiasi, to liha'amofihi gi'a Safaila. Ananiasiu bo mone'mofihi me'a noemito efahi aitogati li'ehina. ² Ya huloto liha'a hiti lu kehelilete efahi luga'a etali'atiti fala nekite luga'a lite bite aposolo naga'i epi'aha'ina. ³ Ya ha'igo Pitau ma luto lu'ehina: Ananiasio, hena'mu Satau kai komopakagu tilago Sikalafu'i mi'i moloto faga luloto efahi

luga'a li fala ki'ahane? ⁴ Koyapa'i ana me'i mina mefi'ahago, ya'mana kana'alo ya'mana me'i kai me'i mino'ehina yabe, to ana me'i bona'i noepito efahi litogomo ana efahi kai'naka lolo nohibe. Komopakagu henabe luto kehelito ya'ma suhi li huto hane? Kai lali'i limi'i memolo'ahata Hu'mamofihi mi'i moloto faga lu emi'ahata yabe. ⁵ Ananiasiu ana kaga keheliloto ana'asilo fililoto melugu limito ko'ehina. Ya higo enali ya hinamofihi kaga'a kehelina bona'i nelesa'ani gofa lu'ehina yabe. ⁶ To enali neheya kola bomagi ho tilete gukete li hekele telete le'mete bite keli hete'ahana yabe.

⁷ Ya hilete nesi'a mino yatama nehago Ananiasihi liha'a oto nonuga ti'ehina. To ai anana huto hu'ehina mekeheli'ehina yabe. ⁸ Ya higo Pitau lu emi'ehina: Lu nimibo, metitiloti efahi li'aha'ina ya'masi anasi ni'ifihe? Luto ligo, O'yo. Anasi ya li'ohu'ina yabe lu'ehina. ⁹ Ya ligo Pitau lu emi'ehina: Kai hiti bahaka hiti letali henabe lite lu kehelilete Sipi Bomofihi Sikalafu'a mi'i mele'aha'ibe? Bahaka akeli he ete'ahana bona'i yatai ma'asi kasito foiya nehanago enali kai'i ana hite kofite bilana'mu yabe. ¹⁰ Ya luto Pitau noligo ana'asilo fililoto gigusa'agu limito ko'ehina. Ya higo enali neheya kola bo lite bu gana ana a'i fili'ehigo bu gelete kofite bite baha'a keli he'ahana ya'ma beleha'alo keli hete'ahana yabe. ¹¹ Asaga Hu'mamofitoga komopa'ani emi'ahananamagi to luga'a fato fato boana'magi hiti anana huto hu'ehinamofihi kaga'a keheli бага ilete enelesa'ani sipi lu'ehina yabe.

Babeyafana fato fato'i huto hu'ehina

¹² Enali aposolo bomagi topa ho'ehinana babeyafana fato fato'i babu lite boana'magi folagaha'anigu li huto hi'ahana. Ya hago enali Hu'mamofitoga komopa'ani emite minelata hanamagi enali asaga yupahi utehi etehi Solomonihi Nosipenugu li nupa hilata hi'ahana yabe. ¹³ Enali mone luga'a Hu'mamofihi komopa'ani emi'ahanamagi koli hilete enali hiti ete li nupa mehi'ahana yabe. Ya'mu lite enali boana'magi enofokehi helete lusi kaga lu epele'ahana yabe. ¹⁴ Ya hana babu boana'i Sipi Bomofitoga komopa'ani emi'ahana nehanalo luga'a yuhufa babu lite ete ikele ikele hi'ahana yabe. ¹⁵ Ya nehago enali boana'magi enebesi'ehina bona'i ukogu enele'mo melelete kapolo fato fato ukogu ko epele'ahana yabe. To Pitau kapo moloto nobinogo ai meha'auga enebesise bona luga'amagihi enugufalo heleko melenogo ye kalabe lite yabe. ¹⁶ Yelusale hepa kegi'ati babu bona'i li nupa hite neete enebesise bona'anifi to foipa fele komopa'anigu minana hiti enele'mete ana bona'i ye ke su he'ahana yabe.

Enali aposolo bona'magihi ketana epi'ahana

¹⁷ To ya higo mono sipi kaba bo hiti to asaga bona'a hiti moneka mine'ahana to enali Satusi naga'magi hiti enali asaga'i enipakafa sipi he'ahana. Enali enegekesa kehelilete naga epilune lite lu keheli'ahana. ¹⁸ Enali aposolo bona'i enayato lite sipi naga nonugu enele'me mele'ahana yabe. ¹⁹ Ya hilago ana folugu'i Sipi Bomofihi agelo'auga naga gegisa li hokolo huloto

aposolo bona'i enele'mo fegu toloto ma luto lu epi'ehina: ²⁰ Lenali bite sipi mono nonugu ho tilete hetofa kapomu'i lite bona'i ka lamana'a lu epilo. ²¹ Aposolo bona'magi ka'a liyafa hilete folugu'i go'i yuhufa noligo sipi mono nonugu tilete hapi fite ka enelepitemine'ahana.

To sipi mono noto kaba bo yagi lalugahi kehe i nupa huloto kanisole bona'i hiti Yuta bona'magi olopa bo'ani hiti ete li gehesa hi'ahana. Ya hilete aposolo bona'i naga nonugati enele'mete alabe lite enoho lifi'ahana yabe. ²² Enoho lifi'ahana bona'magi naga noto nehetilete aposolo bona'i menehago sa hi'ahana. Ya hilete enali i behe hite bite kanisole bonatoga ma lite lu epi'ahana: ²³ Lali naga noho kasito nehetito bu gota kasiha'a amuya melete loki helete kaba bo kasito gimi gi бага ite mine'ahabe. Ya huloto lali kafe sigito bu gota anagu bona'i memine'ahana afele su he'ahana. He'ahago bu goloto noone. ²⁴ Ya lite lago enali sipi mono noto kaba bo hiti to enali sipi mono noto gimi bona'magi hiti aposolo bona'i hena hi'ahafi lite enegekesa yigi babu li'ahana. ²⁵ Ya nehago bo mone nehetinauba ma luto lu epi'ehina: Kehelilo. Lenali naga nonugu enele'mo mele'ahana bomoya sipi mono nonugu ho tite nehite boana'i kaga neenelepibe. ²⁶ Ya lite lago enali mono noto gimi bo yagi to luga'a gimi bo'a hiti enele'mo mege toloto buto aposolo bona'i sipi mono nonugati enele'mete e'ahana. Enali gimi bomagi aposolo bona'i osahi meepise enele'mete e'ahana yabe. Hena'mugope aposolo bomagi kaga'anilo kehelite nehana bona'magi

enitaluga logo binogo efa kosatu'i legene ite loho fililafi lite enelesa'ani ligo yabe.

²⁷ Enali gimi bomagi aposolo bona'i enele'mete ete kanisole bona'magi folagaha'anigu enele'mo ho ti'ahana. Ya hilago sipi mono noto bomagi kaba'aniuba ma luto enoloka ho'ehina:

²⁸ Lenali boana'magitoga Yesuhi gi'a helete kaga lu meepilo luto ule'ale ka luto laga hu lep-olo'ohuta yabe. Ya hu'ohuto bu galo, lenali kaga'tinimouba asaga Yelusale hepa'mogu bu бага i'ehibe. To lenali lali kaluga lilete Yesuhi enali ho fili'ahana yabe lilune'mu nehabe. ²⁹ Ya

lite lago Pitau yagi to luga'a aposolo bomagi kaga'anilo nona'a lu epi'ahana: Lali bona'magi kaga'anilo enemege'i memalaluta, Hu'mamofihi ai kaga'asigo mege'i malaluta'mu yabe. ³⁰ Lenali Yesuhi malipu yafalo hu so kilete malipu yafalo ho fili'ahana lali tatatigi Hu'ma'anifu ai aku'i le'mo ho ti'ehina yabe. ³¹ Hu'mau le'moto tito yahi lamaga'aga molo'ehigo nohibe. Lali Isilaeli bona'magita kaba boti lehe'malube luto nohinago lali aitogago komopati emito aitoga binogo foipanati li he'mi letalina'mu yabe. ³² Asaga ya'mananamofihi kaga'a lu yege hose bo lali nohune, to Sikalafu'uba hiti ya'mana kaga lu yege nohabe. To ya'mana kaga keheli komopa'anigu malana boana'i Hu'mau Sikalafu'a enalitoga nomalabe.

³³ Enali kanisole bona'magi aposolo bomagi lanaga kehelilete enitaluga logo bigo enoho fililune'mu hi'ahana. ³⁴ Ya hago kanisole bona'magihi folagaha'aniguti bo mone ho ti'ehina. Ai gi'a Gamelieliu, Felosi bo yabe.

Ai keya ka lu enelepilata bo, to enali asaga boana'magi ya nohinana'mu lite sipi fokehi lilata nehana, ai aposolo bona'i enoho lifigo fegutoga limi'ahana. ³⁵ Ya nehago ai kanisole bona'i ma luto lu epi'ehina: Isilaeli naga'ise. Lenali ma bomagihi enugufalo li huto hilune'mu nehananalo lenali lenegekesa yigi fe lilete li huto hilo. ³⁶ Lenali akeheli'ahabe. Kohe kanagu Teutasiu ho tiloto ma lu'ehina yabe: Nani amuya'ni hiti bo nohube. Ya luto ligo 400 bona'magi mege'i mele'ahana yabe. Ya higo gamani bouba ho fililago asaga bona'i mege'i mele'ahanamagi tili tele hite bula ola nehago ai'a lili'na'a li huto hu'ehina fenene hale hu'ehina. ³⁷ Alihi ai megesalo gamani bouba boana'magi enigi lina kana'alo Yutasi Galili bouba ho tiloto luga'a boana'magihi kaga lu epigo ai mege'i ana suhi mele'ahana. Enali ho tilete mege'i melete gamani bona'i hiti luba hite enele'mo he'milune'mu hi'ahana. Ya hina ai ana huto fililago mege'i malana boana'i tili tele hi'ahana. ³⁸ Ya hu'ehinagi nani yatai lu nolepube. Lenali ya'ma bomagihi koli'ani hiletetini he'mi epelenogo mineno. Ya'ma lili'namofihi hapa'a fa'mene bona'magi nelinogomo sibina huto fenene hilibe. ³⁹ To Hu'mau ya'mana lili'nalo kaba hu'ehinogomo lenali laga mehi epalalana'mu yabe. To lenali Hu'mau hiti luba hite neminana bona'i lolo hi lalabe'mu lu nolepube. ⁴⁰ Ya luto ligo kanisole bona'magi kaga'a mege'i mele'ahana. Ya hilete aposolo bona'i kehe ilete naga osatu enibi yigi'ahana. To enali amuya ka epekite aku aku'i

Yesuhi gi'a helete kaga lu epimofa'na mehilo. Ya lite lu epilete aposolo bona'i he'mi epalago bi'ahana. ⁴¹ Aposolo bona'i enali kanisole bona nohi he'milete fegutoga limilete enegelo bi'ahana. Hena'mugope, Yesuhi gi'a lu yege hananalo Hu'mau enagabu foya kofilabe luto ekesa keheli'ehinalo yabe. ⁴² To asaga yupahi sipi mono nonugufi to enali'ani noha'anilugafi li nupa hite minete boana'i kaga lamana'a enelepiteme to Yesu Hu'mau le'mo ho ti'ehina bomofi kumu'i lu epiba lu epiba hite mine'ahana yabe.

6

Nagahi mone kegi'a su hoto mone kegi'ati loemo heleko malago bomagi aposolo bona'i enehe'me'ahana

¹ Ya'mana kana'alo ka lamana'a mege'i malana bona'i luga'a babu lite ete ikele'ahana. To luga'a ka lamana'a mege'i malana bona'magi Giliki nogo nehanamagi enali luga'a Hibulu nogo nehanamagi ka epeki'ahana. Ma lite li'ahana: Lenali asaga yupahi nose'na'ani meni'ina boana'i enehe'melata nehanaya to keto anali enemegesa hu epite menehe'melata nehabe. ² Ya lago 12 aposolo bomagi luga'a boana'i enemege'i malana kehe i nupa hilete ma lite lu epi'ahana: Lali Hu'mamofihi kaga'a lu epise'na he'miloto boana'magi nose'na guna ito epimofa'na hiluta bati mehilina'mu yabe. ³ Nigibo nagabose. Lenali nayahi mone kegi'a su hago mone kegi'ati loemo heleko melenogo lenali folagahatiniguti enele'mo

ho tilo. Enalitoga Sikalafu'uba bai tago kaga keheli bati hi'ahago boana'magi enali kumuko nelilana bo yabe. Ya hilete ya'mana bo enele'mo melenogo ya'mana lili'na kaba hite lilabe. ⁴ Ya hinogo laliti nunumu huse'na hiti to boana'i kaga lu yege hose'namofihi lili'na'asigo li eto huto lito bilune. ⁵ Asaga boana'magi aposolo bona'magi lu huto hana kalo enegelo bi'ahana. Ya hilete Sitifenitoga Sikalafu'uba bai tana bo le'mo ho ti'ahana. To Filipiu yagi Polokolu yagi Nikeno yagi Timoni yagi Pamenasiu yagi to Nikolasiu ai Atioki hepatogati fegutoga bo Yuta bona'magi mono kagamofitoga komopa'a molo'ehina bo hiti enele'mo ho ti'ahana yabe. ⁶ Enali ya'mana bo li nupa hite ete aposolo bona'magi naga'magi enubulo ho tigo enali ana bomagihi enugufalo enayahi li saga hite melelete nunumu hi epelete lusana epi'ahana lusa gi epele'ahana.

⁷ To Hu'mamofihi kaga fato fato hepato leli'ali hago bu бага i'ehina. Ya higo babu boana'i luga'a hiti Yelusale hepatogati komopa'ani i gelehe hite Hu'ma kaga'a liyafa hi'ahana. To enali sipi mono noto kaba bona'i luga'a babu lite ana hite komopa'ani i gelehe hite ka lamana'a mege'i mele'ahana yabe.

Yuta bona'magi Sitifenihi ka foya li ete'ahana

⁸ Sitifenitoga Hu'mau Sikalafu'a emilago amuya sipi liloto boana'magihi folagaha'anigu babeyafana fato fato'i li huto hu'ehina. ⁹ Ya nohigo luga'a bomagi ho tilete ai kaga'a pelesa i'ahana. Ya'mana bona'i enali Yuta bona'i fato mono ka nekehelina bo, enali fato mono'ani

Lali Foyati yabe lite gi'a helata nehabe. To enali Sailini hepatoti yagi Alekasatilia yagi, to mone'amagi Silisia yagi to Esia, asaga ya'ma hepatogati ete li nupa hite nehana bomagi yabe. ¹⁰ Sikalafu'uba kaga bati hina'ago Sitifenihi lu bagalo malago ana bomagi lana kaga'aniuba ai kaga'a be meligi'ehina yabe. ¹¹ Ya hilete ya'mana bona'magi bati mehina suhi li huto hilete fato bona'i mone'amagihi enekesa bigo enali ma lite li'ahana: Ai Mosenogo Hu'manogo etigi holoto kiya yokolo ka lu etoto'ehibe. ¹² Enali ya lite lana kagauba asaga boana'i to keya ka enelepilata bo hiti to olopa napa bo enali enipaluga lu boyogo fi'ahana. Ya hago enali Sitifenitoga bite yato lite le'mete bite mono kanisole bona'magitoga le'mete bi'ahana. ¹³ To enali faga faga lu melete ka foya li etalana bona'i luga'a enele'mo mele'ahana. Ya'mana bomagi ma lite li'ahana: Asaga yupahi ya'ma bouba suguna mono nohatimofi hiti to Moseu keya ka li'ehinamofi kumu luto kaga lu sibina hulata nohina yabe. ¹⁴ Lali keheli'ohunogo ma luto lu'ehina yabe: Yesu Nasaletе bouba ya'ma hepa'i sipi mono nohi tele bito li foipa loloto koyapa'i Moseu limigo ana suhi lilata nohuta ai li nohe'mito fato suhi lepiluna'mu yabe lu'ehibe. ¹⁵ Ya lago asaga bona'i kanisolelugu mine'ahanamagi Sitifenihi bulu'i he'ahana. Ya nehago Sitifenihi okaba'a agelomofihі suhi lito i besa lo'ehina yabe.

Sitifeniu mono kanisolemagi enubulo kaga lu hokolo hu'ehina

¹ Sipi mono noto kaba bouba Sitifenihi loka ho'ehina: Enali ma'naka nelafihe? ² Ya luto loka hago Sitifeniu lu emi'ehina: Nogo'nigita afo'nigita kehelilo. Hu'mau fana meha'a hiti bouba koyapa'i tatatifu Abalahau Halani hepato mebu'ohuto Mesopotamia hepato minana kana'aluga nehetito bulo hu'ehina. ³ Ya huloto ma luto lu emi'ehina: Kai meka hiti to kogokagi afokagi he'mi epololoto nani me'i mone kelepilube'mu nohunalo bubo. ⁴ Ya luto lu emigo Abalahau Kalitia me'i he'miloto Halani buto mino'ehina. Alihi Abalahahi afo'afu fililago yatai ma nehana hepato Hu'mau le'mo molo'ehina yabe. ⁵ Hu'mau: Kaika me'i yabe luto Abalahahi nesi'a loko huto melepi'ehina yabe. Alihi ma me'i kiminogo'ni li'ehitogo yagapanaka ana hite huto alihi hilanamagi mana me'i molo lilana'mu yabe luto Hu'mau lu emi'ehina. Abalahahi yagapana'a memine'ahana kana'alo ya'mana kaga Hu'mau lu molo eto'ehina yabe. ⁶ Hu'mau ma luto lu'ehina: Yagapanaka naga'i fato bona'magi melugu minalana'mu yabe. Ya hi'ehinogo me'i hapa'a bona'magi kai yagapanaka koko kako pana'ani enele'moloto hilenogo 400 kufu'a bilina'mu yabe. ⁷ Ya hilenogo alihi nani ya'mana bona'i kai yagapanaka enele'mo koko kako'ani lolo hi'ahana bona'i nani ka foya li epoloto osahi epilube. To liha'a kai yagapanakamagi ya'mana me'i he'milete bilabe. Ya hilete enali alihi elete ma'asi ni'ina meto ete nani'i komopa'ani nimate nunumu nama lilabe luto Hu'mau lu'ehina yabe.

⁸ Ya luto luloto Hu'mau enugufa laga huse'mofihi mone'na kaga Abalahatoga molo'ehina. To alihi minoto Abalahau pana'a Isakahi ketoloto ai nayahi mone kegi'a su hoto mone kegi'ati loegi monegi leheko malana kana'a minoloto gufa'a laga hu eto'ehina. Isakau ai Yakopuhi afo'afu, to Yakopu 12 tatatigi afo'anifu minoto ana huto enugufa'anilo laga hu epolo'ehina.

⁹ Enali tatatigi Yosefahi ipakafa helete fato bona'i le'mo neepite efahi li'ahana yabe. Ya hago Iyipi metoga le'mete bi'ahana. To Hu'mau ai hiti moneka mino'ehina. ¹⁰ Ya huto asaga ketana aitoga huto hu'ehina. Aitoga fuluna emitoka keheliya ise'na kibina bo Felo ai okaba'alo bulo emi'ehina. Ya higo Iyipi gamani bomagihi kaba bo'ani hiti to ai noha'agu asaga fe'noha'alo hiti kaba gimi gilibe luto Felou Yosefahi le'mo molo'ehina ho ti'ehina. ¹¹ Ya hulago Iyipi me kegi'a hiti Kena me kegi'a hiti nose'na minigigo sipi kau'na he'ahana. To enali tatatigi nose'na nalanana'mu sa sa hi'ahana. ¹² Yamu'i Iyipi melugu nose'na ni'ibe lite lana kaga Yakopu kehililoto tatatigi enoho lifigo yata'a yupahi ana hepato neheti'ahana. ¹³ Alihi aku'i ana hite nebago Yosefeu go'agihi kaga lu hokolo huto nani Yosefeita lu epi'ehina. To ya nohigo Felou Yosefahi naga'a ana yupahi bu enogo'ehina yabe. ¹⁴ Yosefeu afo'afu Yakoputoga kaga moloto kai hiti to asaga naga'i Iyipi alo luto ligo bi'ahana. Enali 75 boana'i e'ahana. ¹⁵ Ya luto kaga malago Yakopu Iyipi melugu limito minoto anaga fili'ehina. To tatatigi hiti ana hite ana melugu

fili'ahana yabe. ¹⁶ To alihi enali felisa'ani Sekeme hepatoga lite bite koyapa'i Abalahau mone meli nesi'a Hemoho pana'amofitoti mina fi'ehina melugu mulilugu keli he'ahana.

¹⁷ Hu'mamofihi kana alo ya'mana li huto hilube'mu hilina, yata'a Abalahatoga yama li huto hilube'mu nohube ligo keheli'ehina supomofihi kana'a yatai ahuto hilube'mu nohibe. Isilaeli naga'i hofa telete sipi hite Iyipi melugu pulu tite babu nelabe. ¹⁸ Alihi kibina bo Iyipi melugu huto huloto kaba hu'ehinauba Yosefahi gi'a mekeheli'ehina yabe. ¹⁹ Ya'ma kibina bouba ai bonati enele'mo bati mehu'ehina yabe. Ai bati mehina suhi tatatigitoga li huto huloto fitu fo epoloto amuya kaga ma luto lu epi'ehina: Yagapanatini nonugati he'mite fegutoga enele'mo melenogo enali fililabe. ²⁰ Ya hina kanaluga Mosehi ito'afu keto'ehina. Ai hetofa pana'i nohigo Hu'ma laga'a besi'ehina. Ito'afugo afo'afugo fala kite nonuga kaba hi eta'igo ikahi loegi monegi bu fili'ehina. ²¹ Alihi le'mo fegu telago Felohi pa'auba le'moto buto ai'a pana'a legi huto kaba hu eto'ehina. ²² To Moseu Iyipi bona'magihi keheliya ise'namo ya'ma asaga kaga keheli su hose sukulugu buloto amuya kaga noluto lili'na amuya moloto nolito sipi bo huto huloto mino'ehina.

²³ Alihi Mosehi kufu'a 40 bulago Isilaeli bona'i lalu'agihi buto bu enagalube luto ekesa keheliloto bu'ehina. ²⁴ Iyipi bo moneuba Isilaeli bomofihi kaga lube sibina hube nohu etago bu goloto Isilaeli bomofitoga moloto Iyipi bo nona'a emitto ho fili'ehina yabe. ²⁵ Mosehi ai naga'amagi

ma lite enekesa kehelilafi luto ai keheli'ehina yabe. Ya'ma bouba Iyipi bona'magi enayanuguti lele'mo lubuto bilifi lite keheli bebe salafi luto keheli'ehina. Enali keheli bebe mese'ahana yabe. ²⁶ Nohi koto ete kaga Moseu ana huto Isilaeli bo loemo luba neha'igo bu etogo'ehina. Ai ana bole etele'mo baba ilube'mu huloto ma luto lu etimi'ehina: Nalalu'nile'ita letali moneko naga'mo neha'ina letali letugufagu hena luba neha'ibe? ²⁷ Ya noligo ai gona'a nohana bouba Mosehi le'mo felu holoto ma luto lu emi'ehina: Kuyu'afu lu ketago kai kabati'a minoto le'ali kaga loko hilube'mu nohane? ²⁸ To yago Iyipi bo mone ho fili'ahata ana supo luto yatai nani'i nahalube'mu nolapihe? ²⁹ Ai ya luto lina kaga Moseu keheliloto koli huto Mitia melugu buto minoloto anaga liha'a liloto pana'a loemo eteketo'ehina yabe.

³⁰ To 40 kufu kana bulago agelo moneuba Sainai kosa lebato ka me'i ni'inalo nohigo bulo hu'ehina. Agelouba logo guluya meha'agu ufeha'a hiti yafa lagaso'agu mino'ehina. ³¹ Moseu ana logo guluya meha'a bu goloto topa holoto hena suhi nolifi luto bu go bati hilube'mu ana'asilo bu leba to'ehina. Ya huloto Hu'mamofihhi nogo'a keheli'ehina: ³² Nani tatakamagihi tata'anifita yabe. Abalahagi Isakagi to Yakopugi Hu'ma'anifita nohube. Ya luto ligo Moseu afoya iloto lesa'a ligo ana logo guluya meha'a bu megose mino'ehina. ³³ Ya nohigo Sipi Bo lu emi'ehina: Ho ti'ahata me'iya lamana'a ni'inagi kigigu bi'ahata suka kisi he'mibo. ³⁴ Nani bona'ni Iyipi nehanamagi asaga enagabu lili'na nelina abu enogo'ohube. Enali usegi asegi ite yibi

nama nelana nani akeheliloto enele'mo enubuto bilube luto alimi'ohube. Yatai kai ho titogo Iyipi koho lifinogo'ni bilane.

³⁵ Ya'mana Mosehi Isilaeli bona'magihi enemegesa hu emi'ahana yabe. Kuyu'afu kele'mo ho tigo kaba hu letoto kagati loko hilube'mu nohane? Enali ya lite loka he'ahana. Ya'mana bouba kaba bo'anifi to enehe'mose bo yabe luto Hu'mau ho lifi'ehina yabe. Ufaha'a hiti yafa lagaso'agu agelouba logo guluya meha'agu bu go'ehinana ya'ma kene'uba Mosehi he'mo'ehina. ³⁶ Ai Iyipi hepatogati enele'moto nobuto babeyafana hiti topa hose'na hiti Iyipi melugufi Safa Nagami beletogafi to ka melugu hiti 40 kufugu li huto hu'ehina. ³⁷ Ya'mana Moseu ma luto Isilaeli bona'a lu epi'ehina: Nani nele'mo huto hu'ehina bameto suhi huto li moloto kaga lu yege hose bo lenali folagahatiniguti le'mo ho tilina'mu yabe lu'ehina. ³⁸ Ya'mana bouba Isilaeli bona'i ka melugu ai hiti li nupa hi'ahana. Ai tatatigi hiti to agelouba Sainai kosagu Moseu hiti kaga li'ahana yabe. Hu'mamofihi kaga'a minoba minoba huse'mofihi liloto ya'ma lalitoga lu limi'ehina bo nohibe.

³⁹ To tatatigi kaga'a keheli he'mi'ahana. Ya hilete enali Mosehi le'mo felu hete fato le'mo nemelete Iyipi melugu aku i behe hite bilune'mu hi'ahana. ⁴⁰ Ya hilete Alonihi ma lite lu emi'ahana: Ana'ina meha'a mone lolo hu lete-togo ai ya'mananauba kohe toto lele'moto bilibe. Moseu Iyipi hepatogati lele'moto o'ehina bo ai henana hu bufalo molo'ehifi lali mekeheli etone. ⁴¹ Ya lite lilete yafatu bulumaka yaga nala'amofihi meha'a lolo hite melelete lokiya fi

emilete anana lolo hana'umu lite nose'na gete melekehi i'ahana yabe. ⁴² Ya nehago Hu'umu enemegesa hu epiloto enali kokulumalugu ikahi sonofitoga komopa'ani emite minalabe'umu he'mi epolo'ehina yabe. To kaga lu yege hose bomagihi mono bukugu fayahi ge'ahana ma luto ni'ina:

Isilaeli bona'ise.

Ka melugu nani kumu lite yagakafa hete lokiya fi menimi'ahana kana'a kufu 40 yupahi yabe.

⁴³ Lenali Molokihi yege noha'a kofilete to sonofi'i meha'a Lefani ya'mananamofitoga komopatini epilune lite meha'a lolo hi'ahana yabe.

Ya'umu nani foto metoga Babiloni kegi'a lenoho lifi he'milube.

⁴⁴ Koyapa'i tatatigi ka melugu minana yupahi komopa'ani emi'ahana yege nohi Hu'mamofihilo bulo mino'ehina. To Hu'umu Mosehi ya suhi lito ana yege nohi gibo luto fayaa lepi'ehina suhi lite gi'ahana yabe. ⁴⁵ Alihi tatatigi Yosua hiti fato bona'magi me'i lilune'umu e'ahana. Ya hago tatatigi enubulo Hu'umu me'i hapa bona'ienoho lifi he'mi'ehina. Ya'mana kana'aluga ana yege nohi lite bite malago anaga ni'igo Tebitiu huto hu'ehina yabe. ⁴⁶ Hu'umu Tebitihi bita hu'ehinatoga fuluna emitoo ai kumu'i keheli bati hu eto lago Yakopu Hu'mamofihilo mono noha'a mone gi etalube luto Hu'mamofitoga nunumu huto loka ho'ehina. ⁴⁷ Ya lu'ehina ya'mana nohi Solomoniugio eto'ehina yabe.

⁴⁸ Kaga lu yege helata bona'ienoneuba ma luto lu'ehina'a huto Hu'uma kokulumalugu minolata

bouba enali bona'magi gise nonugu menominagihe luto ma lu'ehina:

⁴⁹ Sipi Bouba lu'ehina:

Kokuluma'i goto hepa'ni yabe,
to melugu nani nigigusa iluna'mu yabe.
Lenali hena huse nohi gi netalana ni'ibe?
Nani mino nabasu biluna hepa'niba
hiya'a ni'ibe?

⁵⁰ Ya'mana asaga'na nani'ni nayanugati
lolo mehu'ohunanamo ni'ifihe?

⁵¹ Lenali kegeiyo bona'i. Lenali kaga mana'a
Hu'mau molo'ehina li komopatinigu melete
meminana bona'i yabe. Lenali asaga'i tatatinigi
hi'ahana ana supo lite nehabe. Asaga yupahi
lenali Sikalafu'i le'mo he'milata nehabe.

⁵² Koyapa'i kaga lu yege hose bo minana mone
kiyi'afihi le'mo sibina mehi'ahana ni'ibe?
Lamana bo'a, Yesu yabe, alinamofihi kaga'a
lu yege hete koyapa'i e'ahana bo enoho fili su
he'ahabe. To yatai halune'mu hana bomagi
enayanugu lenali malago ya'mana bo aho
fili'ahabe. ⁵³ Hu'mau keya ka'a agelomofihi
yato malago limi'ehina lenalitini ana kaga
li'ahanamofihi mege'i melete komopatinigu li
menemalabe luto Sitifeniu ka epeki'ehina yabe.

Sitifenihi efaha osatu i fili'ahana

⁵⁴ Ya luto kaga enali kehelilete enipagu logo
bigo enabagalo heni kofilete Sitifenihi sipi
ipakafa he'ahana. ⁵⁵ Ya nehago Sikalafu'uba
Sitifenitoga bai tolago kokulumatoga bu golago
ti'ehina. Ai Hu'mamofihi fana mehena'agu Yesu
yahi lamaga'aga nohigo bu go'ehina. ⁵⁶ Ya huloto

Sitifeniu lu epi'ehina: Bu galo. Kokulum'a'i i hokolo nohigo Hu'mamofih'i yahi lamaga'aga koyapa'i Kokulumaguti limi'ehina Bo nohigo bu nogobe. ⁵⁷ Ya luto noligo enali enegekesa'ani fi hekini lelete ho tite kehe sipi ite ahi kala kala melelete Sitifenih'i bite nu ki saga hi'ahana. ⁵⁸ Ya hilete hepaluguti fegutoga le'mo melelete efaha osahi hapi fite gufalo he'mi mele'ahana. Enali yata'a Sitifenih'i faga lube molobe hi ete'ahana bona'magi gukete'ani kisite neheya kola bo mone gi'a Soliu yabe luto nohina bomofih'i metoga mele'ahana. ⁵⁹ Ya hilete efaha osahi Sitifenih'i gufalo ite mine'ahana. To Sitifeniu ma luto nunumu hu'ehina: Sipi Bo Yesu, kai nemeha'ni libo. ⁶⁰ Ya noluto ai lapusa noto minoloto mone'a hiti kehe sipi iloto ma luto lu'ehina: Sipi Bo, enali ya'ma li huto nehana foipana'ani'mu luto kekesa mekehelibe. Sitifeniu ya luto luloto ana'asilo fili'ehina yabe. Ya hite, Sitifenih'i hanana'mu Soliu keheligo gufaluga bati hu'ehina yabe.

8

Soliu Yesutoga komopa'ani molo emi'ahanamagi enahalube'mu nohube lu'ehina

¹ Ya'mana kana'aloti fato bona'magi hapi fite Yelusale hepalugu Yesutoga komopa'ani molo emite neminana boana'i enegene mane ite neenahago tili tele hite Yutia kegi'a nebago Samalia kegi'a nebago hi'ahana yabe. Ya hana 12'a aposolo bona'i Yelusale analo mine'ahana yabe. ² Hapa'ani bati hina bona'i Hu'mamofih'i ka'amofih'i mege'i nemalana

bona'magi Sitifenihi sipi yibi nama nehi etete le'mo keli he'ahana yabe.

³ Soliu ai amuya mololoto Yesuhi bona'magihi le'mo sibina hilube'mu nohube luto lu'ehina. Bona'magi noha'aniluga tiloto limiloto nohuto Yesutoga komopa'ani emite minana bona'i kefefe ho lito limi limi fegutoga huloto bo hiti ana'i hiti nagalugu enele'mo molo'ehina yabe.

Ka lamana'a Samalia kegi'a lu yege he'ahana

⁴ Enali Yesutoga komopa'ani emi'ahanamagi tili tele hite bite minela minela hi'ahana hepatoga ka lamana'a lu yege he'ahana. ⁵ Filipiu sipi hepa'i monelugu Samalia limiloto ka lamana'a boana'i enubulo lu yege nohoto Mesiahi gi ho'ehina yabe.

⁶ Ana hepato bona'i enali li nupa hilete ka'a enegekesa hokolo hite nekehelite babeyafana li huto hina hiti bu ge'ahana yabe. ⁷ Babu bona'magiluguti foipa felemagi sipi kehe ilete leheko limi'ahana yabe. To bona'i enugufa'ani ketipa'i fili'ehinafi to enigigusa sibina hu'ehinafi ya'ma bona'i Filipiu enele'mo bati hu'ehina. ⁸ Ya huto li huto hu'ehinana ya'mana hepato bona'magi bu gelete lusi enegelo bi'ahana.

⁹ Ya'mana hepalogu bo mone mino'ehina gi'a Simoni ai yatama yupahi nalisana li huto nohigo Samalia bona'magi bu gelete topa hilata enelesa lu'ehina. Ai nani nikibina bo nohube, lulata hu'ehina yabe. ¹⁰ To asaga bona'i enigi hiti to enigi meni'ina hiti enali amuya melete Simonihi ka'a keheli emi'ahana. Ya hilete enali ya lite li'ahana: Ya'ma bouba aitoga Hu'ma sipi amuyana emi'ehina bo nohibe lite lilata

hi'ahana. ¹¹ Enali amuya melete ana bomofihi ka'a mege'i mele'ahana. Hena'mugope? Babu yupahi nalisana li huto hina yanamofihi bu gelete babeyafana suhi huto ni'ibe lite enelesa lu'ehina yabe. ¹² To Filipiu Hu'mamofihi kapo'amu luto ka lamana'a lu noepito to Yesuhi gi'a ho epina kagamofihi komopa'anigu li melete bo hiti ana'i hiti nagami'i fele'ahana. ¹³ Simoni u ai hiti komopa i gelehe huto nagami fololoto Filipi hiti moneka mine'aha'ina. Ai topa hose'na hiti to babeyafana fato fato'i Filipiu li huto hina Simoni u bu goloto ekesa yigi babu lu'ehina yabe.

¹⁴ Enali aposolo naga'i luga'a Yelusale hepatoga mine'ahanamagi Samalia bona'magi Hu'mamofihi mono ka'a li tokolo habe lago keheli'ahana. Ya hilete Pitanogo Yoninogo ana hepato etoho lifi mele'ahana. ¹⁵ Etali ana hepato henetilete Sikalafu'i ana bona'magi lilabe luto nunumu hi'aha'ibe. ¹⁶ Enali Yesuhi gi'aloko nagami'i fele he'migo Sikalafu'uba enalitoga melimi'ehina'mu lite yabe. ¹⁷ To Pitaugo Yoniugo etayaha'atiti enali lataha'anilo mala'igo Sikalafu'i enalitoga limi'ehina.

¹⁸ To Simoni u etali etayahatiti lataha'anilo mala'igo Sikalafu'i lina bu go'ehina. Ya huto Simoni u moni efahi etalitoga lito buloto ma luto lu'ehina: ¹⁹ Letali ya'ma amuyana nani'i nimiliyo. Ya hi'inogo nani ana suhi huto nayaha'ni bona'i lataha'anilo melenogo'ni Sikalafu'i lilabe luto etimi'ehina. ²⁰ Ya noligo Pitau lu emi'ehina: Kai hiti efahaka hiti lito logo kapogu bubo. Henabe luto efahakatu

Hu'mamofihi amuyana mina filane? ²¹ Lili'nati mone'a ya'mana ma'naka luto kai nasanaka meni'ibe. Kai komopaka Hu'mamofihi bulo'i bebe soto meni'ibe. ²² Foipa faipa kekesa nokehelitana he'miloto komopaka i gelehe huto Hu'mamofitoga nunumu hitogo ya'ma kekesa noyigitamofihi Hu'mau li he'mi ketalibe. ²³ Kai komopakagu luba huse'na bati mehinamofihi babu lito ni'igo foipanauba kele'mo naga i'ehibe, Pitau lu'ehina. ²⁴ Ya ligo Simoniu ka'alo nona'a lu etimi'ehina: Letali Sipi Bomofitoga numuna hu nete'inogo ai nehe'malibe. Ya hi'inogo asaga'na nela'inamofihi huto mehu netalibe.

²⁵ Alihi etali bu ge'aha'inganamofihi kaga'a hiti Hu'mamofihi kaga'a hiti lu epi su helete etali i behe hite Yelusale kapo melete bi'aha'ina. Etali kapo melete nebite Samalia fato fato hepato ka lamana'a lu epime lu epime bi'aha'ina yabe.

Filipiu Itiopia gamani bo ka lamana'a lu emi'ehina

²⁶ Hu'mamofihi agelo'auga Filipihi ma luto lu emi'ehina: Kai ho tito Yelusaleti bu'ehina kapolo giyaka lito yofo'i mobuloto Gasa hepato limibo. Ya'mana kapo ka melugu bu'ehina kapo yabe. ²⁷ Ya luto lu emilago Filipiu ho tito nobuto ana kapolo Itiopia bo mone nobigo bu go'ehina. Ai kaba bo Itiopia melugu Katesihi kibina a'mofihi asaga fe'noha'alo kaba hulata bo. Ya'mana bouba Yelusale oto mono ka nokehelina yabe. ²⁸ Ya nohinati ai kale legi hu'ehinagu hosi yaga kefefe higo minoloto i behe huto kapoga bu'ehina. Ya nohuto koyapa kaga lu yege holata bo Aisaiyaha buku leka somo

bu'ehina. ²⁹ Ya higo Sikalafu'uba Filipihi ma luto lu emi'ehina: Kai ana bo nobinalo buto gufalo li letogo moneka biliyo. ³⁰ Ya ligo Filipiu hololu luto buto ana bo nobina lebato buto kehelina Aisaiyau kaga lu yege holata bomofihi leka somo bu'ehina. To Filipiu ana bo loka ho'ehina: Leka nosata bukumofihi kaga hapa'aba keheli'ahapihe? ³¹ To ana bouba Filipihi kaga'alo nona'a lu'ehina: Bo moneuba kaga hapa'a kehelise'na lu menimi'ehinogomo hiya'a huto nani'ni keheliluna ni'ibe? Ya luto luloto Filipihi kehe igo yaga kefefe hu'ehina kalegu Filipiu tito moneka minete bi'aha'ina. ³² Hu'mamofihi kaga'a hupamone'i ana bouba leka so'ehina ma luto ni'ina yabe:

Ai sipisipi yaga suhi huto
ho fililune'mu nehana'a hite
le'mete e'ahana yabe.

Ai sipisipi yaga nala'a supomofihi oka'a
laga nehi etago
legeso huto koyone ito nominana'a huto
ai ya'mana bouba ana suhi lito
kaga nesi'a mone melu'ehibe.

³³ Bona'magi enemege'i emi'ahana.
To enali le'mo melugu melelete
bebe mesana suhi lite
ka foya emi'ahana yabe.

Ai boana'amagihi hapa'ani
hiya bouba lu yege halina ni'ibe?
Ma melugu minose'na'a su hago
aku aku'i maga menohibe.

³⁴ Ya'ma gamani bouba Filipihi ma luto loka ho'ehina: Kaga lu yege holata bouba kiyi'afi

kumu ya'ma kaga nolibe? To ai'a kaga nolifi to fato bomofihi kaga nolibe? ³⁵ Ya luto loka holago Filipiu hapi fito kaga lu'ehina: Ai ya'mana hupamone mono kagaguti hapi fito luto buto Yesuhi kaga bebe sosemofihi ni'inalo molo emito lu emi'ehina. ³⁶ Etali kapo melete bite nagami'i mone ni'inalo heneti'aha'ina. Ya hilete ana gamani bouba Filipihi lu emi'ehina: Bu gobo, nagami'i ma ni'ibe. Nagami folose kapo'ni henanauba hekini lo neto'ehibe? ³⁷ Ya luto ligo Filipiu lu emi'ehina: Ka lamana'amofihi komopakagu li malalata nagami'i falalata'mu habe. Luto ligo nani komopa'nigu li molo'ohube. Yesu Mesiau Hu'mamofihi Pana'a lamana'a nohibe luto komopa'nigu keheli mana hu'ohube luto ana bouba lu'ehina. ³⁸ Ya luto luloto ai ana gamani bouba hosi yaga'a le'mo laba higo ho ti'ehigo Filipi hiti ana gamani bo hiti moneka heleko melugu melete nagamilugu limi'aha'ina. Ya hilete Filipiu ana bo mono nagami'i folo eto'ehina yabe. ³⁹ Ya hilete nagamiluguti fa'mene kugutatoga neti'igo Hu'mamofihi Sikalafu'auga Filipihi le'mo minigi'ehina. Ya higo gamani bouba Filipihi aku aku'i bu mego'ehina. Ai ya huloto gelo bimo bimo hepa'aga nobina kapo kiyaka lito bufa hu'ehina yabe. ⁴⁰ To Filipiu Asitoti hepalugu huto hu'ehina. Ai hepato hepato bula ola huto ka lamana'a lu yege homofa'na hu'ehina. Ya huloto alihi Sisalia hepalugu heneti'ehina yabe.

Soliu komopa'a i gelehe huto ka lamana'a komopa'agu li molo'ehina

¹ To Soliu Hu'mamofihi boana'a aitoga komopa'ani emite mino hetofa hi'ahana enoho fililube luto lusiga lu'ehina. Ya huloto sipi mono nohi kaba bo'a nohinalo bu'ehina. ² Ai ana kaga lu emigo sipi mono noto kaba boubu fayahi mone Yuta bona'i mono nonuga gehesa hi'ahanamagi Tamasiko hepato bite neminanamagitoga go'ehina. Ya huloto ya'mana fayahi Solihi emi'ehina. Ana fayanugu ma luto go'ehina. Enali Sipi Bomofihi Kapo mana'alo mege'i nemalalana bo hiti ana'i hiti Soliu bu enogolotomo ai enele'mo naga ito Yelusale enele'moto alibe.

³ Soliu kapo moloto buloto Tamasiko hepa kasito heneti leba notago kokulumaluguti libi tegina moneuba fi besa lolito oto le'mo bego hu'ehina. ⁴ Ya higo Soliu melugu limito koloto nogo'a moneuba ma luto noligo keheli'ehina: Solio, Solio. Kai henabe luto negene mane ito nonahane? ⁵ Ya ligo Soliu loka ho'ehina: Sipi Bo, kai kiyigabe? Nani negene mane ito nonahata Yesuitomo yabe, luto ana nogouba lu'ehina. ⁶ Ya luto luloto ma luto lu emi'ehina: Kai ho tito hep-alugu tibo. Alihi bo moneuba ya'ma suhi hubo luto lu kimilina'mu yabe. ⁷ To enali Soli hiti mon-eka mege'i e'ahanamagi i gofa mehise analo'na lolo hite ho ti mebilete kaga nesi'a enabagaguti mone meli'ahana. Enali kaga nogo'a kehelinaya bona'i mone huto hago bu mege'ahana yabe. ⁸ Soliu meluguti ho tiloto bu'a i gili hu'ehina ana'ina nesi'a mone bu mego'ehina yabe. Ya higo

mege'li melete ana bona'magi yato lite Tamasiko hepalugu ti'ahana yabe. ⁹ Loegi monegi kanagu bu'a i gili mehigo ya'mana kana'aluga nagami'i hiti nose'na hiti mo sito mino'ehina yabe.

¹⁰ Hu'mamofitoga komopa'a emito minolata hina bo mone Tamasiko hepalugu mino'ehina gi'a Ananiasi. To bamulugu Sipi Bouba: Ananiasio luto kehe i'ehina. Ya ligo Ananiasiu lu emi'ehina: Sipi Bo, nani ma nohube. ¹¹ Ya luto nogolo noligo Sipi Bouba lu emi'ehina: Kai ho tiloto Fotogo Kapo yabe lite gi'a helata nehana kapolo bubo. Ya huloto Yutasihi noha'agu Tasasi hepato bo gi'a Soliu yabe luto ni'ina bouba nunumu huto nohinogo bu galata'mu yabe. ¹² To bamulugu bo mone gi'a Ananiasiu yaha'a bu'alo meko higo ana bu'a aku'i i gili hilube'mu bu go'ehibe. Sipi Bouba ya luto lu emi'ehina yabe. ¹³ Ya ligo Ananiasiu ka'alo nona'a lu emi'ehina: Sipi Bo, babu bona'magi ya'ma bomofihi kaga'a nelago nokeheluna bo nohibe. Kai boanaka Yelusale'i enegene mane ise bati mehina suhi babu luto ya'mana bouba li huto nohibe lago nokeheluna yabe. ¹⁴ Sipi mono noto kaba bouba kaga lu etoto ho lifigo Tamasiko hepalugu kaitoga kigi ho kimate neminana ai naga ito enele'moto bilube luto maga yatai noabe. ¹⁵ Ya ligo Sipi Bouba lu emi'ehina: Kai bubo. Ai nanitoga komopa'a nimilina bo le'mo ho ti'ohuna ai nani nig'i'ni liloto fegutoga bona'i to enikibina bona'i hiti to Isiaeli bona'i asaga'i enalitoga lu yege homofa'na hilina'mu yabe. ¹⁶ To nani kumu luto asaga gabu gise'na li gufalo molomo bilinamofihi nani'ni lepiluna'mu yabe luto Hu'mau lu'ehina.

¹⁷ Ya luto lulago Ananiasiu buloto ana nonuga tiloto Solihi gufalo yahi li'ehina. Ya huloto ya'ma luto lu'ehina: Solio nalalu'niga. Sipi Bouba noho lifigo noobe. Maga nooto kapogu bu go'ahata bo Yesu ai'a yabe. Kai kubuka aku'i i gili nohinogo Sikalafu'i kaitoga limilibe luto nani'i noho lifi'ehibe. ¹⁸ Ya noligo ana'asilo mele'isi Solihi bu'aguti faya'i ili'a legitana limo noigo bu'a aku'i i gili higo asaga'na bu go'ehina. Ya higo ai ho tito analo nagami'i folo'ehina yabe. ¹⁹ Ya huloto alihi nose'na nolago amuya'a ai aku'i li'ehina yabe.

Soliu kaga mana'a Tamasikosi lu yege ho'ehina

Soliu nesi'a kana Yesuhi mege'i mehelata bona'i hiti Tamasiko mino'ehina. ²⁰ Soliu mono nohi ni'inaga bu bebe soloto Yesu kumu ma luto lu epi'ehina: Yesu ai Hu'mamofihi Pana'a nohibe. ²¹ Ya higo asaga bona'i enali Solihi kaga'a kehelite minana otopa helete sumi ka lite ai loka hago ai loka he'ahana. Yesuhi gi'a ya'ma lite Yelusale nehago ya'mana bouba enoho fili'ehinamo ni'ifi fato bo nohibe? Ai ana supo huto bona'i magati naga ito sipi mono noto kaba bo nohinalo enele'moto bilube'mu nohifi hena nohibe?

²² Ya lite lana Soliu lu yege ho epina kagauba amuya molo'ehina. Ya higo Yuta bona'i luga'a Tamasiko hepalugu neminanamagi kaga'a lina kehelilete topa he'ahana. To Yesu bo mana'i Mesiau nohibe luto lu epina kagauba amuya molo'ehina'mu enali Solihi nona'a lu meemi'ahana yabe.

²³ Babu kana'a minelete Yuta bona'magi Solihi ho fililune lite kaga li nupa hite minete lu keheli'ahana yabe. ²⁴ Ya hago Soliu ana kaga'ani akeheli'ehina yabe. Enali Yuta bona'magi ute etehi Solihi ho fililune lite hepato kapo nila nila hu'ehinalo gimi gi бага ilata hi'ahana yabe. ²⁵ Ya hilata hago Solihi mege'i melelata hana pana'amagi mone folugu'i safegu le'mo melelete le'mete limite hepato bihu gegisa mone hokolo hu'ehina kapolo nagato fulu fulu hite he'mi etago fegutoga limi'ehina yabe.

Soliu Yelusale hepalogu mino'ehina

²⁶ Soliu Yelusale hepato buloto Yesuhi mege'i melelata bona'i hiti i kalalube'mu hu'ehina. Ya nohigo enali Yesuhi mege'i menomalana bo nohibe lite koli hi ete'ahana. ²⁷ Ya hago Banabasiu oto he'moto aposolo bona'i nehanalo le'moto bu'ehina. Banabasiu Solitoga Sipi Bouba kapogu bulo hu'ehina hiti to Sipi Bouba kaga lu emi'ehinamofihi hapa'a lu hokolo hu epi'ehina. To ana huto Soliu Tamasiko hepato asaga kaga Yesu kumu amuya luto lu yege ho epi'ehinamofi hiti Banabasiu lu epi'ehina. ²⁸ Ya hulago Soliu aposolo bona'i hiti moneka minoto Yelusale kegi'a Yesuhi ka lamana'a lu yege amuya he'ahana. ²⁹ Yuta bona'i Giliki nogo nehana bona'i hiti Soliu kaga lu noepito enali hiti ke-nasabo bi'ahana. Ya nohigo enali ho fililune lilete hi'ahana. ³⁰ Ya hago enali Yesuhi mege'i nemalana bona'magi kehelilete Solihi le'mete Sisalia hepato limilete Tasasi ho lifi he'migo bu'ehina.

³¹ Ya hulago Yutia kegi'afi Galili kegi'afi Samalia kegi'afi Yesutoga komopa'ani mele'ahana bona'magi fuluna agoyanaguti bati hite mine'ahana. Ya hago bona'i luga'a babu lite huto hilete enalitoga ete ikele'ahana. Ya hilete enali Sipi Bomofihi mege'i melete minago Sikalafu'uba enele'mo amuya molo'ehina yabe.

Pitau Eniasihi le'mo bati hu'ehina

³² Pitau asaga hepatoga bu бага iloto mone yupahi Hu'mamofihi bona'a Lita hepato nemi-nana enebe tilube'mu bu'ehina. ³³ Ya huloto bo mone'mofihi gi'a Eniasiu yabe luto nohi-namofihi bu go'ehina. To ai ana bo gi yahi foipa lo'ehigo kapo memolose sipa'aloko koloto nominago kufu'a nayahi mone kegi'a su hoto mone kegi'ati loegi monegi heleko molo'ehina yabe. ³⁴ Pitau lu emi'ehina: Eniasio. Yesu Kilisito yatai kele'mo bati nohibe. Kai ho tito nebelusaka tili huto tege hubo. Ya noligo Eniasiu ko'ehinaloti mele'isi ho ti'ehina yabe. ³⁵ Ya hinana asaga Lita bona'i hiti to Seloni bona'i hiti be gelete komopa'ani i gelehe hite Hu'mamofitoga emi'ahana yabe.

³⁶ Yopa hepato Hu'mamofitoga komopa'a moloto nominana a'i mone mino'ehina. Ai gi'a Tabita ana gi'amofihi hapa'a Giliki kaguti Tokasi. Ai asaga yupahi enumuhi meni'ina bona'i enehe'moto enele'mo bati hulata nohina a'i yabe. ³⁷ Ya'mana kana'asilo besise'na gufalo tigo fili'ehina. Ya higo enali nagami ke etete gufa'a sese hi etelete nonugu ifo hasagu he'mi ete'ahana yabe. ³⁸ To Lita hepa'i Yopa hepa lebato mino'ehina. Ya hu'ehigo enali Yesutoga

komopa'ani melete neminana bona'magi Pitau ya huto Yopa hepatoga noabe lana'a kehelilete bo loemaletoga kaga ma lite melete etoho lifi'ahana: Ke, kai hololu luto mele'isi lalitoga obo. ³⁹ Ya lite lana kaga keheliloto Pitau ho tiloto enemegeli moneka bi'ahana. Ai ana hepatoga henetilago nohi ifo hasagu le'mete ti'ahana. Ya hago asaga keto ana'magi yibi hilete Pitahi ete le'mo bego hilete Tokasiu nohuto lolo huto epi'ehina gukete li lepi'ahana. ⁴⁰ Ya hago Pitau asaga bona'i ana hasaguti enele'mo fegu toloto lapusa nohi filoto nunumu hu'ehina. Ya huloto ai ana a'mofihi i behe huto bu goloto ma luto lu'ehina: Tabitao, kai ho tibo. Ya noligo bu i gili huto Pitahi bu goloto sipaloti ho tito analo mino'ehibe. ⁴¹ Ya nohigo Pitau buto he'moto yato lito le'mo saga hu'ehina. Ya huloto keto ana'i nehanalo le'moto buto enelep'i'ehina. ⁴² Ya hu'ehinamofihi kaga'a lu yege hago asaga Yopa kegi'a bu бага igo babu boana'magi Hu'mamofitoga komopa'ani melete mine'ahana yabe. ⁴³ Pitau Yopa hepallugu bo moneuba yaga gufa'atu gukete hetilata nohina gi'a Simoni hiti ai noha'agu babu kana mino'ehina yabe.

10

Agelouba limito Koniliasihitoga kaga molo'ehina

¹ Bo mone Sisalia hepato mino'ehina. Ai gi'a Koniliasi. Ai Lomu gimi bouba 100 gimi bomagi kaba'ani mino'ehina. Ya hu'ehina gimi bomagi nupa hi'ahanamofihi gi'a Itali yabe lite he'ahana.

² Ai mono ka mege'i nomalana bo yabe. Ai hiti

lalameha'a hiti asaga'i Hu'mamofitoga enemehi emite mine'ahana. Yuta bona'i luga'a enumuhi meni'ina bona'i Koniliasiu enehe'molata nohuto Hu'mamofitoga amuya moloto nunumu hulata hu'ehina. ³ Utehi yege liyofu nohigo bamu'i bu go'ehina. Ai ana bamulugu Hu'mamofihi agelouba nonugu tito ma luto lu'ehina: Koniliasio. ⁴ Ya ligo Koniliasiu bu goloto koli huto loka ho'ehina: Sipi Bo, hena hibe? Ya ligo agelouba Koniliasihia lu emi'ehina: Asaga hetofa foya suhi nohatana'mu luto Hu'ma ekesu mehago nunumuka keheligo bati hu'ehibe. ⁵ Ya hu'ehinagi yatai bona'i mone'a enoho lifitogo bo mone gi'a Simoni Pita yabe luto gi'a ni'ina bo Yopa hepato nohinaga bino. ⁶ To ai Simoni yaga gufa'atu gukete hetilata bo hege nagami beletoga nominana bo hiti moneka neha'ibe. ⁷ Agelouba ya luto lu emiloto i fenene hu'ehina. Ya hulago Koniliasiu koko pana'a hiti gimi bo mone hiti kehe i'ehina. Ya'ma gimi bouba Koniliasia hiti moneka humofa'na nohuto ai mono ka mege'i nomalana bo yabe. ⁸ Koniliasiu asaga'na bulo hu'ehinanamofihi ya'mana loegi monegi bomagihi hu hokolo huto lu epiloto enoho lifigo Yopa hepato bi'ahana yabe.

⁹ Eteka'a enali kapo melete bite Yopa hepa lebato henetigo Pitau fuligaha kana'alo nohupitalo minoto nunumu hilube'mu ti'ehina. ¹⁰ Ai kau'na sipi hago nose'na nalube'mu nohuto yuhufa nogoto laita nohuto bamu'i mone bu go'ehina. ¹¹ Ai kokuluma'i i hokolo nohigo analugati sipina mone nasana kata legi huto nekisa'alo loegi loegi ni'inalo naga'i luga luga gi hepila

gi hepila hite sa gi'ahanana melugu limi'ehina. ¹² Ana sagu yagakafa lumo lumofi osifa'ifi lopi namafi fato fato'i mino'ehina. ¹³ Ya nohigo nogo moneuba ma luto lu'ehina: Pitau, ho tito enohoto nobo. ¹⁴ Ya ligo Pitau ana kagalo nona'a ma luto lu'ehina: Sipi Bo'ni, o'e. Koyapa'i keya kagu nose'na kolo tanana hiti to lu laga hi'ahana hiti mo sibo luto nose'na ni'ibe. Nani ya'mana nose'na mo sito menonana nose'na ni'ibe. ¹⁵ To Pitau ya noligo ana nogouba aku'i ma luto lu emi'ehina: Hu'mau nalo luto molo'ehina nose'na kai mo sise nose'na ni'ibe luto melubo. ¹⁶ Ana nogouba loegi monegi yupahi ya luto lulago ana sa gi'ehinana kokulumalugu aku ti'ehina.

¹⁷ To Pitau hena huse bamu'i bu gofi luto ekesa yigi babu lu'ehina. Ya nohigo Koniliasiu enoho lifi'ehina bona'i Pita nohina nohi sa sa hite be gelete bite kasihi fegutoga mine'ahana. ¹⁸ Enali kehe ite enoloka he'ahana: Simoni Pita maga nohifi menohibe? ¹⁹ Pitau ana bamu'mofihi hapa'amu ekesa yigiba yigiba nohigo Sikalafu'uba ma luto lu'ehina: Kai kehelibo. Loegi monegi bomagi kai kumu lite sa nehabe. ²⁰ Ya nehanagi kai ho tito limito enebe tigitto mon-eka bilo. Kai kekesa loe lae meyigibo. Ya'mana bona'i nani'ni enoho lifi'ohube. ²¹ Ya lulago Pitau ya'mana bo nehanalo limiloto ma luto lu epi'ehina: Nani kumu sa sa nehanamo maga nohube. Lenali henabe lite e'ahabe? ²² Ya ligo enali lu emi'ahana: Koniliasiu sipi gimi bouba loho lifigo o'ohune. Ai Hu'mamofitoga komopa'a emitto nominago Yuta bona'magi koyone hine emina bo yabe. Kai kaga lu emitogo kehelilibe

luto Hu'mamofihi agelo'a moneuba Koniliasihi nonuga bilane luto kehe igo noone. ²³ Ya lite lago Pitau lu epi'ehina: Nonuga tilo. Lali koloto yago etehi bilune.

Ya luto ligo kelete eteka'a ho tilete kapo melete nebago Yopa bona'i luga'amagi enemege'i melete bi'ahana yabe. ²⁴ Enali kapo melete bite kapogu nohi mone kelete eteka'a Sisalia hepalugu heneti'ahana. To Koniliasiu naga'a yagi to gufalo lalua'agi luga'a hiti ai hepa'alo enele'mo nupa higo enegeba hite mine'ahana yabe. ²⁵ Pitau Koniliasihi noho kasito buho notigo Koniliasiu bu goloto gigusagu lipito koto be tigi'ehina. ²⁶ Ya higo Pitau le'mo ho tiloto ma luto lu emi'ehina: Nani asaga bona'i nehana'a huto fa'mene bo nohube. ²⁷ Ya luto luloto Koniliasihi noha'a luga netite Pitau kaga lu emimo lu emimo tiloto babu bona'i li nupa hite nehago Pitau bu enogo'ehina. ²⁸ Ya huloto ma luto lu epi'ehina: Lenalitini akeheli'ahabe. Yuta bo moneuba fato naga'i hiti koguna ito minose'namoya lusiga luto o'e lite Yuta bona'magi lu laga hi'ahanamo ni'ibe. Ya hu'ehinamoya Hu'mau ma luto nelepi'ehibe: Bo mone'mofihi kolo tana bo yabe lula to kolo metana bo yabe lula mehube. ²⁹ Ya luto lu'ehigo nani kaga'a pelesa meise ai nogo'a liyafa huto noobe. Ya'mu luto nani yatai lenoloka nohobe. Lenali hena hibe lite nani'i kehe i'ahabe?

³⁰ Ya ligo Koniliasiu ka'alo nona'a lu'ehina: Ya'ma kanalo utehi noligo ologo noha'nigu minoto nunumu hu'ohuna yabe. Ya nohugo gulu gulu gukete hekolose bo mone nubuloga oto ho ti'ehina. ³¹ Ya huloto ma luto

lu'ehina: Koniliasio. Asaga bona'i enumuhi meni'inamagi enehe'moto enele'mo bati hulata nohatamolo Hu'mau nunumu ka akeheli'ehibe. ³² Ya hu'ehinagi Yopa hepato bo mone Simoni Pitau yabe luto nohinamofitoga bona'i enoho lifitogo bino. To ai Simoni yagakafa gufa'a gukete hetilata nohina bomofi hiti hege nagami belete nemina'ibe. ³³ Ya'mu luto kaitoga mele'isi enoho lufugo bi'ahanamo kai bati huto a'noane. To Sipi Bouba lu kabagalo melenogo lilata kaga lali kehelilune luto Hu'mamofihhi bulo li gehesa huto nohune luto Koniliasiu Pitahi lu emi'ehina yabe.

Pitau Koniliasihhi nonugu kaga lu yege ho'ehina

³⁴ Pitau hapi fito kaga lu'ehina: Yatai keheli fotogo nohuto ma'naka luto Hu'mau bona'i mon-eko legege hite nehabe luto kehelilata nohibe. ³⁵ Ai'i agoya hu emite bebe sana suhi hilata nehana bona'i asaga'i nupa bofi safa bofi Hu'mau keheli bati hu epololata nohibe. ³⁶ Isilaeli bona'i koguna ite fulunaguti minalabe luto asaga bona'magihi Sipi Bo'ani Yesu Kilisitotoga ka lamana'a malago limi'ehina kaga, lenali kehelilata nehabe. ³⁷ Galili hepatoti hapi filoto Yutia kegi'a bu baga igo sipina Yoniu nagami'i fololoto li huto hinana lenali kehelilata nehabe. ³⁸ Yesuhi Nasalete bomofitoga Hu'mamofihhi Sikalafu'auga amuya emi'ehinamofihhi lenali nekehelibe. Ai asaga kapoga bula ola huto hetofa suhi huto Satau naga'i epi'ehina bona'i enele'mo gulu ho'ehina. Hena'mugope Hu'mau ai hiti moneka nohigo yabe. ³⁹ Asaga'na Yuta kegi'afi to Yelusale

hepatogafi Yesu li huto hu'ehinanamofihī kaga lali bu go'ohutamo lu yege nohone. Enali malipu yafalo ho fili'ahana yabe. ⁴⁰ Ya hago loegi monegi yupahi Hu'mau fili'ehinagati le'mo ho tigo huto hu'ehina yabe. ⁴¹ Silaga bona'i be mege'ahana lalisigo Hu'mau ai le'mo ho ti'ehina bomofi kumu luto bu go'ohutoti yabe. Hu'mau kene keliguti le'mo ho tilago ai hiti nose'na moneka no'ohune. ⁴² Filise bona'ifi to kosaba bona'ifi enali kaga'ani loko hu epalalina bo Hu'mau le'mo ho ti'ehina'mu luto loho lifigo lu yege nohone. ⁴³ Asaga'i kaga lu yege hose bomagi Yesu ai kumu kaga ma lite li'ahana. Enali aitoga komopa'ani malalanamagihi foipana'ani ai gi'alo linogoti li he'mi epalalibe.

Fegutoga bona'magi Sikalafu'i li'ahana

⁴⁴ Pitau kaga lu epito nohigo ai kaga'a kehelite minana bonatoga Sikalafu'i limi'ehina yabe. ⁴⁵ Yuta bona'i Hu'mamofitoga komopa'ani emise bona'i luga'a Yopa hepatoti Pitahi mege'i e'ahanamagi fegutoga bona'magitoga Hu'ma fokehena Sikalafu'i epina be gelete topa he'ahana yabe. ⁴⁶ Enali fegutoga bona'magi fato fato nogo hite Hu'mamofitoga enegelo bi emite fokehi hana kehelite yabe. Ya hago Pitau lu epi'ehina: ⁴⁷ Ma bomagi lali li'ohuta suhi lite Sikalafu'i li'ahabe. Nagami'i mefalalo luto bo moneuba laga hu epalalina ni'ifihe? ⁴⁸ Ya luloto lu epi'ehina: Lenali Yesu Kilisitohi gi'alo nagami'i falalo. Ya lulago alihi ana bona'magi lali hiti nesi kana minoto bilane lite Pitahi le'mo mele'ahana yabe.

11

Yelusale hepato mono bona'i yaki'a huto hi'ahabe luto Pitau lu huto hu'ehina

¹ Yutia kegi'afi to Galili kegi'a aposolo bona'i hiti to Yesutoga komopa'ani melete minanamagi ya hite fegutoga bona'magi ana hite Hu'mamofihi kaga'a libe lana'a keheli baga i'ahana yabe. ² Pitau Yelusale tilago fegutoga bona'i enugufa laga huse'nalo amuya nemalana bo luga'amagi ka emeki'ahana. ³ Enali ma lite li'ahana: Enali enugufa'ani laga mehi'ahana fegutoga bona'magihi nonuga ti'ahatamo enali hiti nose'na ne'ahana. Henabe lutobe? ⁴ Ya lago Pitau asaga hu bulo molo'ehinamofihi hapa'alogati hapi fito tiloto ma luto lu hokolo huto lu epi'ehina:

⁵ Nani Yopa hepalugu nunumu nohunagati bamu'i mone ma huto bu go'ohube. Sipi sa nekisa'a loegi loegi ni'inalo naga'i gi hepi'ahanana kokulumaluguti limito nani nugufalo mino'ehibe. ⁶ Ananamofihi komopa'agu henana ni'ifi luto bu go bati hu'ohuna ana sagu yagakafa lumofihi lumofihi enigi loegi loegi ni'ina hiti osifa'ifi to lopi namafi babu lito ni'igo bu go'ohuna yabe. ⁷ Ya nohugo nogo moneuba ma luto lu nimi'ehina: Pitao, kai ho tito ma yagakafa enohoto nobo. ⁸ Ya noligo nani ma luto lu emi'ohuna: Sipi Bo, nani ya mehiluna'mu yabe. Ya'mana yagakafa kolo tana nose'na Hu'mau menalo luto lu laga hu'ehigo nani mo si'ohuna nose'na ni'ibe. ⁹ Ya lugo ana nogouba kokulumaluguti aku'i ma luto mone

hiti lu nimi'ehina: Hu'mau nose'na nose'mofihi yabe luto molo'ehina kai aku'i mo sise nose'na yabe melubo. ¹⁰ Ya'ma nogouba loegi monegi yupahi ya luto lulago ana sipi sana kokulumalugu ti'ehina yabe. ¹¹ Ana kana'asilo Sisaliati bo loegi monegi enoho lifigo anamagi nani kolata huna noho kasito heneti'ahana yabe. ¹² Ya hago kekesa loe lae meyigito mana bo enemegeli bubo luto Sikalafu'uba lu nimi'ehina yabe. Ya hulago Sisaliati Hu'mamofitoga komopa'ani emite neminana bo luga'amagi hiti Koniliasihi nonuga moneka buto ti'ohuta yabe. ¹³ Ya hunogo koyapa'i Koniliasihi nonuga agelouba tiloto ma luto kaga mone ma luto lu emi'ehina: Kai koko panaka Yopa hepatoga enoho lifitogo bo mone'mofihi gi'a Simoni Pita yabe luto sa huto le'mete alabe. Yana agelomofihi kaga'a Koniliasiu lu nimi'ehina yabe. ¹⁴ Ai mono kaga lu lepilenogo ya'mana kagalo kaika hiti lalamehaka hiti kehelilete Hu'mamofitoga komopatini emilabe, agelouba ya luto lu emi'ehina. ¹⁵ To nani kaga hapi fito lu noepugo koyapa'i lalitoga huto hu'ehina suhi luto Sikalafu'uba enalitoga limi'ehina. ¹⁶ Ya higo koyapa'i Sipi Botiuba lu limi'ehina kagalo nekesa i hokolo hu'ehina yabe. Ai mana kaga ma luto ni'ina: Yoni nagami lafatu folo epolo'ehina, alihi lenali'i Sikalafutu folo epalalana'mu suhi lenalitoga limito minalibe. ¹⁷ Lali koyapa'i Sipi Boti Yesu Kilisitotoga komopati molo emi'ohunogo Hu'mau gelo bito Sikalafu'i limi'ehina ya'mana suhi huto fegutoga bona'i mone'amagi aitoga komopa'ani emi'ahago Hu'mau ana huto gelo bito Sikalafu'i

epi'ehibe. Nani kiyi'afita nohuto'ni Hu'mamofihi kapo'a hekini lube? Ya luto Pitau lu epi'ehina yabe. ¹⁸ Ya ligo enali Pitahi bu fi kutu nehanana he'milete Hu'mamofitoga fokehi hete gelo bite ma lite li'ahana: Hu'mau fegutoga bona'magi komopa'ani i gelehe hulenogo enali hiti ana hite minoba minoba hilabe lite enegelo bi'ahana.

Yesuhi naga'i Atioki hepato ho tite lili'na li'ahana

¹⁹ Sitifenihi ho fili'ahana kana'aluga komopa'ani emito mine'ahana bona'magi enegene mane ite enahago enali tili tele hite fato fato hepato bi'ahana yabe. Luga'amagi Fonisia hepato foto'i nebago Saipalasi to Atioki hepatoga nebago hilete ka lamana'a Yuta bona'magisigo lu epi'ahana. ²⁰ To Hu'mamofitoga komopa'ani melete minana bona'i Saipalasi bo hiti to Sailini bo hiti Atioki hepatoga bite Sipi Bo Yesuhi ka lamana'a fegutoga bona'i hiti enalitoga lu yege hete lu epi'ahana yabe. ²¹ Sipi Bomofihi amuya'a enalitoga minago babu bona'i luga'a ana kaga kehelite komopa'ani i gelehe hite Sipi Bomofihi mege'i mele'ahana yabe.

²² Ya'mana kagauba Yelusale hepato Yesuhi nehanalo henetigo analoti Banabasihi ho lifigo Atioki hepatoga bu'ehina yabe. ²³ Banabasiu ana hepato buto henetiloto Hu'mamofihi boana'a bati hite nehago bu enogoloto gelo sipi biloto bati hite nehanagi ana suhi lite fulunaguti koga ite asaga komopatini Sipi Bomofitoga emite mino mana hilo luto enogo'na bi'ehina yabe.

²⁴ Banabasiu ai hetofa bo minoto komopa'a

Hu'mamofitogago emito minago Sikalafu'uba aitoga bai tago mino'ehina. Ya higo babu boana'i komopa'ani i gelehe hite Sipi Bomofihi naga'a hiti ikelete moneka mine'ahana yabe.

²⁵ To alihi Banabasiu Solihi sa sa huto Tasasi bu'ehina. ²⁶ Ya huto Solihi bu goloto Atioki aku'i le'moto o'ehina. Ya hilete ana hepato kufu mone'a mino бага ite Yesuhi naga'a enele'mo nupa hite sipi luga'a ka mana'a enelep'i'aha'ina yabe. Aposolo bomagi Atioki hepato yata'a yu-pahi Kilisiteni enigi li'ahana yabe.

²⁷ Ya'mana kana'alo Yelusale hepatoti kaga lu yege holata bo Atioki limi'ahana yabe. ²⁸ Ya hana bomagihi folagaha'anigu bo mone bu'ehina gi'a Agabasi. Ai Sikalafu'mofihi amuya'alo ho tiloto asaga melugu nose'na fenene hilinagi hepato hepato kau'na halana'mu yabe luto lu huto hu'ehina. Ya lu'ehinalo alihi Kolotiasiu kibina bo minana kana'alo ya'mana kau'na he'ahana yabe.

²⁹ Ya hago aposolo bomagi Yesutoga komopa'ani emite minana enalalu'anigi Yutia kegi'a nehana-magihi enehe'malune lite kaga lu keheli'ahana. Ya hilete Yesutoga komopa'ani emite minana-magi efahi ga'i legete li nupa hilete guna ite luga'a enali'ani nemelete luga kegi'a enalitoga mele'ahana. ³⁰ Ya hilete Banabasinogo Solinogo ana efa etimigo Atioki lite bite mono olopa bona'i epi'aha'ina yabe.

12

Helotiu Yemesihi ho nofilito Pitahi nagalugu le'mo molo'ehina

¹ Ya'mana kana'alo Helotiu gihiti bouba hapi fito Yesutoga komopa'ani emina bona'i enegene mane ito enohoto enagabu gise'na li huto hu epolo'ehina yabe. ² To ai Yonihi gona'a Yemesihi kosa emitatu i gitigigo fili'ehina yabe. ³ Ya hinanalo Yuta bona'magi be gelete enegelo sipi bigo Helotiu bu goloto Pitahi nagalugu le'mo molo'ehina. Yisiti komopa'agu meni'ina Beleti Nelata nehana kana'agu Helotiu ya'manana li huto hu'ehina yabe. ⁴ Helotiu Pitahi yato lito naga nonugu le'mo molo'ehina. Ya huloto loegi loegi gimi bomagihi kaba hi etela hi etela hilabe enali enayanugu he'mito'ehina yabe. Pasa nose'na kana'a su holenogo alihi Yuta bona'i enali enubulo le'moto bilube luto Heloti keheli'ehina. ⁵ Ya higo Pitau nagalugu nohigo gimi bomagi kaba hi'ahana. Ya'mu lite enali Yesuhi komopa'ani emite minana bona'magi Hu'mau he'malibe lite amuya melete nunumu hi ete'ahana yabe.

Agelouba Pitahi nagaluguti le'mo gulu ho'ehina

⁶ To Helotiu yago'a yabe luto Pitahi Yuta bona enubulo le'mo ho tilube'mu hu'ehina folugu'i gimi bo loemale'i folagaha'atitigu Pitau ko'ehina. To enali sipi seni nagatu gilo gite yato gite hite he'mi etelete folugu'i kaba gimi gilata nehana bomagi kasito gimi gite mine'ahana yabe. ⁷ Ya hago ana folugu'i agelo bo moneuba Pitau nohina naga nohi hasagu huto higo fana meha'auga i besalo бага i'ehina. Ya huloto ana agelouba Pitahi gi'na'alo le'mo kule kule huto le'mo ho tiloto lu emi'ehina: Kai mele'isi ho tibo. Ya noligo ana'asilo gi yato gi'ahana seni naga'i gulu hoto

melugu limo i'ehina yabe. ⁸ Ya higo agelouba ma luto lu emi'ehina: Gilimika noito kigigusagu suka bibo. Pitau agelouba lina suhi hu'ehina. Ya nohigo yatama guketeka i besoga bibe huloto nemege'i moloto obo. ⁹ Ya ligo Pitau ya'mana hasaguti he'mito agelo mege'i lifito bu'ehina ya hu'ehina agelouba ma'naka luto ya'mana nohu netabe luto mekeheli'ehina fa'mene bamu'i bu nogobe luto ekesa keheli'ehina. ¹⁰ Etali kapo melete neba'igo yata'a gimi bo luga'a kaba hi'ahananamagihi enebe ligite bite to yalo kaba hi'ahana mone luga'amagihi enebe ligite bite to kasihi sipi kafe gi'ahanalo heneti'aha'ina. Ya hilete ete naga noho gegisalo haka ule'ale hite aeonitu he mele'ahanalo nea'igo ana haka ai'i i hokolo higo tauni kapo giyaka lite bi'aha'ina hepa'i folaganugu kapo melete nebite agelouba Pitahi he'mi etoloto i fenene hu'ehina.

¹¹ Ya higo Pitahi huto hu etananalo ekesa i hokolo hu'ehina. Ya higo ma luto keheli'ehina: Ma'naka luto Sipi Bouba agelo'a ho lifigo oto Helotiu amuya malago to Yuta bona'magi hiti enali nahalune'mu nehanamagi enayanuguti nele'mo gulu fabe.

¹² Ai ya luto ekesa keheliloto Yoni Makihi ito'afu Maliahi nonuga bu'ehina. To enali babu bona'i ya'mana nonuga li nupa hite nunumu hite mine'ahana. ¹³ Pitau ana noto henetiloto nohi kasito begele begele nohigo koko pa'i mone gi'a Lotau kafe sigilube'mu o'ehina. ¹⁴ Ai Pitahi nogo'a keheliloto sipi gelo biloto kafe mesigise i behe huto luga'a bona'i nehanaga hololu luto bu'ehina. Ya huloto ma luto lu epi'ehina: Pitau

fegutoga ho tiloto nohibe. ¹⁵ Ya ligo, kai negi ka nolapihe? li'ahana. Ai: Lusiga luto lama'naka Pitau nohibe luto amuya moloto kaga noligo enali li'ahana: O'e, ai Pitahi meha'a nohilina'mu yabe, li'ahana. ¹⁶ Ya lite nehago Pitau fegutoga begele begele nohigo kafe sigite Pitahi be gelete enali topa he бага i'ahana. ¹⁷ Ya nehago Pitau sipi kaga melilo luto yatu babeyafa hu'ehina. Ya huloto Sipi Bouba naga nonuguti le'mo fegutoga molo'ehina kaga lu epi'ehina. Lenali ya'ma kaga lite bite Yemesi hiti lalalutigi hiti lu epi бага ilo. Ya luto lu epiloto Pitau fegutoga limito fato hepatoga bu'ehina yabe.

¹⁸ Go'i ligo etehi gimi bomagi topa hete Pitau hiyaga bu'ehibe lite ai lu emigo ai lu emigo hilete mekeheli'ahana. ¹⁹ Gihiti bo Helotiu: Mele'isi Pitahi sa sa hilo, luto gimi bo enohose ka ligo enali bite sa sa hana bu mege'ahana yabe. Ya hago Helotiu gimi bomagihi ka foya li epoloto lenali'i lenoho fililube luto lu epi'ehina.

Ya luto luloto alihi Helotiu Yutia me'i he'mito Sisalia kegi'a limito hupamone kana anaga mino'ehina yabe.

Helotiu fili'ehina

²⁰ To Taiya hepatoga bona'i hiti Saitoni hepatoga bona'i hiti enali'i Helotiu sipi enipakafa holoto italuga logo bigo nohigo enali bu galune lite li nupa hite monekolugu e'ahana. Enali Balasitosiu kibina bomofihi nokana hepato kaba hulata bomofito yata'a kaga ai hiti lu bati hulototi yabe lite enalitoga le'mo mele'ahana. Ya hilete ya'ma kibina bomofihi hepaloguti nose'na

enali hepa'anilo lite bago nelata nehana'mu lite Helotihī ya'mana bona'i aku'i enele'mo fulu hubo lite aitoga yibi hi'ahana yabe.

²¹ To Helotiu kana mone mololoto ana yu-pahi enikibina bomagi nehekalana gukete'a hekololoto sipi kefa hisalo mino saga huto nohuto bona'i yatama kaga lu epi epi'ehina.

²² Ya nohigo asaga bona'magi sipi kehe ite li'ahana: Ma kaga nolina ya bona'uba noligope mone'namofihi meha'auba Hu'mau tegi huto nolibe. ²³ Ya nelago ana'asilo Sipi Bomofihi agelo'auba Helotiu Hu'mamofihi gi li saga huto fokehi mehana'mu luto ho filigo limito ko'ehina. Ya higo ginihi ipa'aguti henilete gufa'a ne su hago fili'ehina yabe.

²⁴ Ya hulago aku'i Hu'mamofihi ka'a hepato bula ola huto pulu tito hofa to'ehina yabe. ²⁵ To Banabasiugo Soliugo mono foya lili'na Yelusale neli'ina su holago Yoni Makihi le'mete i behe hite e'aha'ina yabe.

13

Banabasinogo Solinogo mono fayalo etoho lifi'ahana

¹ Atioki hepalugu Hu'mamofihi kaga'a mege'i melete neminana boana'magi folagaha'anigu kaga lu yege holata bo luga'a hiti to kaga enelepise bo hiti mine'ahanamagi enigi'ani Banabasi yagi Simioni fato gi'a Nupa Bo yabe lilata hana bo yagi to Lusiu, Sailini hepato bo yagi Manaeni ai Helotihī gamanilo hofa to'ehina bo yagi to Soliu yagi hite mine'ahana yabe. ² Ya hite,

enali komopa'ani Sipi Bomofitoga emite nunumu nama lite nose'na mo site nehago Sikalafu'uba oto ma luto lu epi'ehina: Lenali Banabasinogo Solinogo etele'mo ho tinogo nani lu etoto'ohuna lili'nalo bila'ibe. ³ Ya ligo enali nose'na mo site minete nunumu hi etetelete enayaha babeyafa hite lusana etimilete etoho lifigo bi'aha'ina yabe.

Etali ka lamana'a Saipalasi kegi'a lu yege he'aha'ina

⁴ Sikalafu'uba ya huto etoho lifigo bilete etali Selusia hepato heneti'aha'ina. Selusia hepatoti sipi botigu ti'igo ana botiuba etele'moto Saipalasi metoga hege nagamilugu ti'ehinaga bu'ehina yabe. ⁵ Ya hilete etali Salamisi hepato henetite Yuta bona'magi li nupa hite minete kaga lu keheli fa keheli nehana nonugu tite Hu'mamofihi ka lamana'a lu epi'aha'ina. To etali Yoni Makiu ana lili'na etehe'moto lilibe lite le'mete bi'aha'ina yabe.

⁶ Etali asaga kegi'a Saipalasi metoga hege nagamilugu ti'ehinanalo bite Pefosi hepato heneti'aha'ina. Pefosi hepato nalisalo bo moneuba fato fato suhi lumofihi lumofihi li huto hulata nohina bo nohigo bu ge'aha'ina. Ai Yuta bo nohina kaga lu huto huto bo nohube nolibe. Ai ana bomofihi gi'a Bayesu yabe.

⁷ Ana nagamilugu ti'ehina metoga gamani bo mone mino'ehina gi'a Segiu Polisi ekesagu fe lina bomofihi lalufu yabe. To ya'ma gamani bouba Soliugo Banabasiugo Hu'mamofihi kaga'a li'inogo kehelilube luto kehe i etimi'ehina.

⁸ Ya hina Elimasi nalisalo bo fato fato suhi lumofihi lumofihi li huto nohigo Giliki nogoguti

Elimasio lite lu gelehe hi'ahana ya'ma bouba etali'i etele'mo melugu mololata hu'ehina. Ya nohuto ya'ma gamani bomofihi etali ka kehelito komopakagu li memolobo luto Elimasiu ya luloto ekesa bi'ehina yabe. ⁹ Ya nohigo Soliu mone gi'a Polu aitoga Sikalafu'uba bai tolago ai ana bomofihi bulu'i holoto lu emi'ehina: ¹⁰ Kai Satahi pana'a. Bati'na asaga'i ni'inamagihi kai fateha'ani yabe. Asaga faga faga hiti bati mehina suhiti kailugu babu lito bai toto ni'ibe. Kai asaga yupahi Sipi Bomofihi ka mana'a faga fagagu li mololata nohane. ¹¹ Yatai Sipi Bomofihi yaha'auga kaitoga liminogo kubuka pisi linogo fana mehena bu megose luga'a kana minalane. Ya ligo ana'asilo mele'isi Elimasihi bu'alo nupa sopohi teginauba ifi to'ehina. Ya higo ai yato lite kapo lepote bilana bona kumu lika tika huto sa sa hu'ehina yabe. ¹² Ya higo gamani bouba anana huto hina bu goloto topa holoto Sipi Bomofihi kaga enelepnamofihi komopa'agu li molo'ehina yabe.

Etali Atioki hepato Pisitia melugu mono foya li'aha'ina

¹³ Polu yagi to bona'i luga'a ai hiti kapo malanamagi hiti enali Pefosi hepatogati he'mite sipi botigu tilete Pega hepato Pamifilia kegi'a bi'ahana. Ya nehago Yoni Makiu he'mi etoto to Yelusale hepatoga i behe huto bu'ehina yabe. ¹⁴ Enali Pega hepa'i he'milete kapo melete Atioki hepato Pisitia kegi'a bi'ahana. Ya hilete fuli yupahi kana'alo Yuta bona'magi mono nonuga tite mine'ahana. ¹⁵ Mono noto kanisole bomagi

Moseu li'ehina keya ka hiti to kaga lu huto hulata bomagi fayahi ge'ahanana hiti leka selete alihi kaga ma lite Polu hiti lalu'agi hiti lu epi'ahana: Nogonamu tamu'ise, boana'magi komopa'ani li amuya malalana kaga lite e'ehitemo lenali lu hokolo hite lu epilanamo ni'ibe.

¹⁶ Polu ho tito yahi tiloto ma luto kaga lu epi'ehina: Isilaeli bona'ni hiti to fegutoga bona'i asaga'i Hu'mamofitoga komopatini emite nemi-nanamagita nani liluna kaga kehelilo. ¹⁷ Ma Isilaeli bona'magi Hu'ma'anifu tatatitigi enele'mo ho ti'ehina. Enali Iyipi melugu ka bona'i minete babu bona'i huto hi'ahana. Ya hago alihi Hu'mamofihi lusi amuya'auba ana meluguti enele'mo fegutoga maga e'ahana yabe. ¹⁸ Ya huloto ka melugu 40 kufu kanagu Hu'mamofihi keta hu etanana li huto hite mine'ahana yabe. ¹⁹ Hu'mau nayahi mone kegi'a su hoto mone kegi'agati loemo heleko malago hepa'i Kena melugu enoho fu loloto ai bona'a ana me'i epigo ana me'mofihi hapa'a lolo hite mine'ahana yabe. ²⁰ To enali 450 kufu ana melugu mine'ahana.

Ya huloto alihi kaga'ani loko hulata bo epiloto nehago ana enemegesalo kaga lu yege holata bo Samueliu huto hu'ehina. ²¹ To enali kibina bo'ani kaba hu epalalina'mu kehe igo Solihi Kisihi pana'a Beyaminihi nagaluguti 40 kufu kana kaba hu epalalibe luto Hu'mau epi'ehina. ²² Hu'mau Solihi le'mo nohe'mito Tebitihi kibina bo'ani le'mo ho ti'ehina. Ai kumu luto Hu'mau ma luto lu'ehina: *Nani Yesihi pana'a Tebitihi le'mo huto hu'ohube. Ya'mana bo nani nibita hina bo nohigo komopa'ni ai'i noemube. Ai asaga ka'nimofihi*

mege'i moloto agoya hu netalibe. ²³ To Hu'mau li huto hilube luto koyapa'i ka molo'ehina suhi li huto huto ya'mana bo Tebitihi nagaluguti bo mone huto hu'ehina Yesu yabe. Ai koyapa'i Hu'mau kaga molo'ehinamo'mu ya'mana boubasaga Isilaeli bona'i enele'mo enubuto bilina bo nohibe luto epi'ehina. ²⁴ To Yesu huto mehu'ehigo Yoniu yata'a Isilaeli boana'i foipanatini he'milo luto komopatini i gelehe hite mono nagami falalo luto kaga lu yege ho'ehina. ²⁵ Yoniu lili'na'a su halube'mu nohuto ma luto enoloka ho'ehina: Nani kumu kuyu'afu nohibe lite nekehelibe? Lenali geba hite nehana bomo nani menohube. Ya hu'ehina lenali kehelilo. Ai alihi nemege'i noana bomofihi nani gigusagu su'a kisi he'mi etaluna'a huto bati mehuna bo nohube luto Yoniu ya lu'ehina yabe.

²⁶ Abalahahi tata'agita to ma fegutoga bona'i hiti Hu'mamofihi agoya hu emilata nehanam-agita nalalu'nigitase. Hu'mamofihi kaga'aua lali'i lele'mo lubuto bilibe lu'ehinana alimi'ehibe. ²⁷ Enali Yelusale bona'magi hiti kaba bona'amagi hiti Yesu ai lele'mo lubuto bilina bo nohibe lite mekehelila to kaga lu yege holata bomagi asaga fuli yupahi leka selata hana kaga hiti keheliya mei'ahana yabe. Enali Yesuhi faga lite fisa inauba kaga lu yege hose bona'mofihi kaga'aniuba pa so'ehina yabe. ²⁸ Enali ana'ina mone Yesu li sibina hu'ehilina'mu ai'i halune lite sa sa hana bu megelete gamani bo Pailatihi fa'mene ho filibo lite kehe i'ahana. ²⁹ To mono kagu ai kumu lu'ehinamofihi enali asaga'na li huto hi etelago Yesuhi bona'magi malipu yafaloti le'mo lago lim-

ite muligu he'mi ete'ahana yabe. ³⁰ Ya hana Hu'mau fili'ehinagati aku'i le'mo ho ti'ehina yabe. ³¹ Enali Yesuhi mege'i melete Galili kegi'ati Yelusale kegi'a bula ola hi'ahanamagi babu yu-pahi bu ge'ahana yabe. Ya hi'ahanamagi yatai Isi-laeli bonatoga ya'ma Yesu kumu lu yege nehabe. ³²⁻³³ Ya'mu luto lali yatai lenalitoga ka lamana'a ma luto lu epilune luto noone. Ya'manana koy-apa'i Hu'mau tatatigi epilube lu'ehinana yatai lali panana'animagita alimi'ehibe. Mono nama buku kupa'agu 2 enali keye'ahana Yesuhi le'mo ho tilibe luto mono kagu ma luto ni'ibe:

Kai nani pana'ni nohane.

Yatai'isi kai afokafita lolo hu'ohube.

³⁴ To Hu'mau fili'ehinagati le'mo ho ti'ehina'mu aku aku'i tuguma'i mebilibe luto ma luto lu'ehina:

Koyapasana Tebititoga kaga molo'ohuna'a huto nani hetofa lusa mana'a kimiluna'mu yabe.

³⁵ Ana suhi luto mono nama buku mone hepagu ma luto lu'ehina:

Kai panaka mana'a he'mi etetogo tuguma mebilibe.

³⁶ To Tebitiu Hu'mamofihi mege'i moloto lili'na lito boana'magi folagaha'anigu melugu mino'ehinamo akeheli'ohuna. Ya huloto alihi filigo tatatigi kene keli beleha'alo keli ho etago tuguma bi'ehina yabe. ³⁷ Ya hu'ehina Hu'mau le'mo ho ti'ehina bomofihi gufa'a tuguma mebi'ehina yabe. ³⁸ Ya hu'ehinagi nalalu'nigita lenali keheli bati hilo. Lenalitoga kaga ma luto lu yege nohone. Ya'mana bouba ai asaga foipatini li he'mi su holoto lenele'mo lenubuto bi'ehibe.

³⁹ Mosehi keya ka'aua lenele'mo lenubuto bito foipatini li he'mito bebe sana bona'i yabe luto lenigi mehalina'mu yabe. Ya hu'ehina ya'ma bomofitoga komopa'ani emite minalanamagi asaga foipana'ani li he'mi epoloto enele'mo enubuto biloto bebe sana bona'i yabe luto enigi molo'ehibe. ⁴⁰ Ya hu'ehinagi lenali kaba hu bati hilo. Koyapa'i kaga lu huto huto hulata bomagi ka mone ma lite li'ahanauba lenalitoga o lalibe:

⁴¹ Lenali enemegeka lilata bona'i

lenali topa hete

gili gili hilete fililo.

Nani lenali kanalo lili'na mone nolube.

To bo moneuba

ya'mana kaga lu hokolo hilina

lenali ai ka'a keheli meemilana'mu yabe.

⁴² Ya lu epito Polugo Banabasiugo li gehesa hilata nonugati he'mite fegutoga limilu'ibe'mu neha'igo boana'magi mone fuli yupapogu kanagu aku kaga mone'a hiti ete lu limila'ibe lite lu etete'ahana yabe. ⁴³ To li gehesa hite

nehana bona'i bila ela nehago Yuta bona'i luga'a hiti to fegutoga bona'i Yuta bona'magihi mono ka keheli'ahana luga'a hiti Polunogo Banabasinogo etemege'i lifite bi'ahana yabe. Ya nehago etali kaga lu epite enele'mo amuya melete Hu'mau lenehe'menogo ai yanugu minalo lite li'aha'ina yabe.

⁴⁴ Mone fuli kanagu silaga bona'i taunigati Sipi Bomofihi kaga'a kehelilune lite li gehesa hi'ahana. ⁴⁵ Ya hago Yuta bona'magi babu boana'i li gehesa hana bu gelete siko hilete enipakafa he'ahana. Ya hilete Polu kaga nolina

kaga'a li sibi hite fagalo bo nohatagi kaga meluse analo he'mibo lite bunepa i'ahana. ⁴⁶ Ya nelago Polugo Banabasiugo ule'ale hilete ma lite kaga li'aha'ina: Ma'naka luto lenali Yuta bona'magita Hu'mamofihi ka'a kohe toto lu nolepu'ibe. Ya hu'ina lenali Hu'mamofihi ka'a keheli he'minana to lenali minoba minoba hepa'mofihi nasana'mu melebesibe lite lago le'ali he'mi lepoloto fegutoga bonatoga nobu'ibe. ⁴⁷ Sipi Botiuba kaga ma luto molo'ehinamoya lali'i limi'ehina:

Fegutoga bona'magitoga
fana tose'na kele'mo ho ti'ohube.
Melugu bona'i yege yege'i nehanamagihi
enele'mo enubuto bilane luto
kapo li hokolo huse bo
kele'mo ho tube.

⁴⁸ Ya noligo enali fegutoga bona'magi kehelilete enegelo bilete Sipi Bomofihi ka'alo fokehi he'ahana. To asaga bona'i minoba minoba hepatoaga bilabe luto Hu'mau elesa molo'ehinamagi aitoga komopa'ani emi'ahana yabe.

⁴⁹ To Sipi Bomofihi kaga'a ya'mana kegi'a tili tele huto bula ola hu'ehina. ⁵⁰ To Yuta bona'magi fegutoga ana'i enikibinamagi Hu'mamofihi ka kehelilata nehana hiti to hepalugu olopa bona'i hiti enekesa li бага ilete Polunogo Banabasinogo enegene mane hite etele'mo hepa'aniguti fegutoga mele'ahana. ⁵¹ Ya hago etali etigigusagu su'atiti kisite mumusopa i tili hilete Ikoniu hepatoaga bi'aha'ina. ⁵² Ya ha'igo Atioki hepalugu Yesuhi mege'i mele'ahanamagitoga Sikalafu'mofihi amuya'auba enalitoga bai tago enegelo sipi bi'ahana yabe.

14

Etali Ikoniu hepalogu mono foya li'aha'ina

¹ To Ikoniu hepato etali ana suhi aku'i hi'aha'ina. Polugo Banabasiugo Yuta bona'magi li gehesa hilata nehana nonugu tilete ka lu yege he'aha'ina. Etali kaga amuya'a hiti le'mo bati hite lu epi'igo yege yege Yuta bona'i hiti to fegutoga bona'magi hiti ana kaga komopa'ani lu mele'ahana. ² To ya hana Yuta bona'magi ana kaga komopa'anigu li memolose minanamagi fegutoga bona'i luga'a faga lu nelepibe lite enalitoga enele'mo melelete Yesutoga komopa'ani emite minana bona'i enipakafa hete faga faga nelabe lite ka epeki'ahana. ³ Polugo Banabasiugo yatama kana'a Ikoniu hepato nehite amuya melete Sipi Bomofihi ka'a lu yege he'aha'ina. Ya ha'igo Sipi Bouba babeyafana lumofihi lumofihi fato fato'i topa hose nasana hiti li etayato higo li huto hi'aha'ina. To ya'mananauba ai fulu kaga'a lamana'a ni'ibe luto boana'i enelepilibe luto yabe. ⁴ To ya'ma hepato boana'i loko hilete luga'amagi Yuta bona'magi hiti komopa'ani monetoga melete minago to luga'a bona'i Polunogo Banabasinogo etalitoga melete komopa'ani monetoga melete mine'ahana yabe.

⁵ Ya'mu lite fegutoga bona'i hiti to Yuta bona'i hiti kaba bo'ani hiti mino kelele lilete Polunogo Banabasinogo etele'mo sibina huloto efa kosatu i fililune lite lu keheli'ahana. ⁶ Ya lite lana kaga etali akehelilete ana hepa'i he'mite koli hite i minigite bite Likonia kegi'a loe tauni Lisitala

hepa'i hiti to Tebe hepa'i asaga lagaso meso hepa'i ana loe tauni lebato ni'inalo bula ola hite mine'aha'ina. ⁷ To etali ya'mana hepatoga ka lamana'a lu yege hete mine'aha'ina yabe.

Etali Lisitala mono foya li'aha'ina

⁸ Lisitala hepalugu bo mone gigusa luga luga sibina loto fili'ehina ito'afu keto'ehigo kapo memolose minolata hu'ehina. ⁹ Ya'ma bouba Polu lina kaga'a kehelito mino'ehina. Ya higo Polu ana bo bu go bati hu'ehina kaga'a komopa'agu li molo'ehigo gigusa'a le'mo bati hilube luto keheli'ehina. ¹⁰ Ya huloto Polu ana bomofihi kehe napa ito lu emi'ehina: Kigigusaka fi su toto ho ti fefe lubo. Ya luto ligo ana'asilo ana bouba gigusa'a bati higo ho tiloto leke hoto mone'a kapo molo'ehina. ¹¹ To ya higo babu boana'magi Polu li huto hu'ehinana bu gelete enali Likonia nogo'aniguti sipi kehe ilago bila ela hite ma lite li'ahana: Kilihe bona'mo suhi hite lolo hite yatai lalitoga limi'aha'ibe. ¹² Ya lite kehe ilete Banabasihi Yeusio lite gi mele'ahana. To Polu kaga lulata bo nohibe lite gi'a Hemesio lite mele'ahana. ¹³ Ya'ma Yeusihi noha'a tauni beletoga ni'igo ana mamufa gilata bouba bulumaka yaga bo'a hiti to bilasi'a lose tose'i hiti lito tauni kasito o'ehina. Ya higo ai hiti to babu boana'i hiti kuguhi ge etimilune'mu hi'ahana. ¹⁴ Ya hilune'mu nehago Banabasiugo Polugo ana kaga kehelilete gukete'atiti hegege nehite etali ana boana'magi folagaha'anigu hololu lite bite ma lite kehe i'aha'ina. ¹⁵ Lenali ma bona'i henabe lite ya'ma suhi li huto hilune'mu nehabe? Lenali hana suhi huto bona'mo nohu'ibe. Le'ali fa'mene

bo nohu'ibe. Le'ali ka lamana'a lenalitoga lu yege halu'ibe'mu o'ohu'ibe. Ya'ma kaga lamana'auba komopatini i gelehe hinogo foipa faipa hapatini he'milete minoba minoba bo Hu'mamofitogago komopatini emilo. Ya'ma bo Hu'mau ai kokuluma hiti me'i hiti hege nagami'i hiti to asaga'na nose menose'mofihi anagu ni'inamofihi lolo hu'ehina. ¹⁶ To ma'naka luto koyapa'i Hu'mau asaga boana'i enemeha'anilo he'mi epalago bila ela hite fato fato'i mine'ahana. ¹⁷ Ya huloto bona'magi nani kumu kehelilabe luto fala kito memino'ehina. Ai asaga yupahi lalitoga bati suhi hu letoto ai kokulumalugu nohuto lenalitoga ko'i lepigo kana'amu kana'amu foyatinigu maya hu mololata nohibe. Ai asaga nose'na lepigo nelete lenugufagu laga higo lenegelo bilata nehabe, luto Polu ya luto lu epi'ehina. ¹⁸ Polugo Banabasiugo etali ya'ma kaga la'ina babu boana'magi mekehelise kuguhi go etimilune'mu amuya mele'ahana yabe.

¹⁹ Ya nehago Atioki hepatoti Pisitia kegi'ati to Ikoniu hepatogati hiti Yuta bona'i luga'a ete babu boana'i kaga lu epigo enalitoga mekelago Poluhi efa kosatu i fililete kefefe hite ya'ma nohi hepatogati fegutoga afli'ehibe lite le'mo he'mi'ahana yabe. ²⁰ Ya hago Yesuhi kaga'a kehelise bona'magi Poluhi bite le'mo bego hago ai ho tiloto tauniga ya'ma aku'i ti'ehina. Eteka'a ai'a hiti Banabasi hiti Tebe hepato bi'aha'ina yabe.

Etali Silia kegi'a Atioki i behe hite bi'aha'ina

21 Polugo Banabasiugo ka lamana'a Tebe hepato lu yege ha'igo babu bona'i luga'amagi etali kaga keheli bati hilete etemege'i mele'ahana. Ya hilete i behe hite Lisitala hepato bilete yaloti Ikoniu to yaloti Atioki hepato Pisitia kegi'a bi'aha'ina. 22 Ya hilete etali Yesuhi kaga'a kehelise bona'magihi amuya melete mono ka lu epiba epiba hite li pili kalo lite lu epi'aha'ina. Ketana babu luto yata'a kofito bulototi alihi Hu'mamofihi kapo'agu tilune lite Polugo Banabasiugo lu epi'aha'ina yabe. 23 To asaga Yesuhi kaga'a kehelise bona'magi folagaha'aniguti kaba bo'ani mone enele'mo ho tila ho tila hi'aha'ina. Etali nose'na mo site minete nunumu hu epelete Sipi Bomofitoga komopa'ani molo emite minanamofihi yanugu enele'mo molo'ehina yabe.

24 To etali Pisitia kegi'a tite bumofa'na hi su helete alihi Pamifilia hepato heneti'aha'ina. 25 Etali Pega hepato ka lamana'a lu yege helete yaloti he'mite Atalia hepato limi'aha'ina yabe. 26 To Atalia hepato botigu ti'igo botiuba etele'moto Atioki bu'ehina. Koyapa'i ya'ma hepato Yesuhi kaga'a kehelise bona'magi Hu'mamofihi kaba hu etototo amuya etiminogo mono foya lila'ibe lite ai yanugu etele'mo mele'ahana. To etali ana mono foya li бага ilete i behe hite aku'i ana hepato e'aha'ina yabe.

27 Etali Atioki hepato nehetilete Yesutoga komopa'ani melete neminana bona'i kehe i nupa hilete Hu'mau etali'i kaba hu etoto'ehina hiti to fegutoga bona'magi kapo'ani li hokolo higo enali hiti ana hite aitoga komopa'ani mele'ahanamofihi kaga'a lu epi'aha'ina yabe.

28 Ya hilete etali ana Yesuhi kaga kehelise bona'i hiti babu kana anaga mine'aha'ina yabe.

15

Yelusale hepalogu li nupa hite tutuma'i mele'ahana

¹ Bona'i luga'amagi Yutia kegi'ati ete Atioki henetilete Yesuhi kaga'a kehelise bona'a kaga ma lite enelepi'ahana: Lenali Mosehi keya ka lu'ehina'a hite mege'i melete lenugufa laga mehilana lenugufatini li lenubuto mebilana'mu yabe, lite ya'ma kaga'ani lu epite hapi fi'ahana. ² Ya hago etali Polugo Banabasiugo etubufaluga ya hanana'mu lite logo bigo ana bona'i hiti ke-nasabo bite enogolagagu fibu fibu hi'ahana. Ya hilete enali Polunogo Banabasinogo hiti to luga'a bona'i etalitoga malana hiti Yelusale hepato tite aposolo bona'i hiti to olopa bona'i hiti nehanalo kaga lu bebe salabe lite enoho lifi'ahana yabe.

³ Yesuhi kaga kehelise bona'magi ana hepatogati enoho lifigo enali Fonisia kegi'a bite to Samalia kegi'a bilete li'ahana: Fegutoga bona'magi Hu'mamofitoga komopa'ani emi'ahanamofihi kaga lu epi'ahana. Enalalu'anigi ya'ma kaga kehelilete enegelo sipi bi'ahana yabe. ⁴ To enali Yelusale hepato henetigo Yesuhi kaga kehelise bona'magi hite aposolo bona'i hiti to olopa bona'magi etebe tigi'ahana. Ya hago etalitoga Hu'mau etoto'ehinamofihi hapa hapa'a lu epi'aha'ina yabe. ⁵ To Felosi naga'i mone'amagi Yesuhi agoya hu emilata enali ho tite ma lite li'ahana:

Ya'ma fegutoga bona'i enali enugufa'ani laga hilenogo Mosehi keya ka'a lu epinogo mege'i malalabe lite li'ahana yabe.

⁶ Ya'mana ya lite lago aposolo bona'i hiti to olopa bona'i hiti ana kagamofihi keheli keheli hilete lu monetoga malalune lite li nupa hi'ahana.

⁷ Enali kenasabo bite kaga lumupa ilago Pitau ho tiloto ma luto lu'ehina: Nalalu'nigitase. Koyapa kanagu nani'i fegutoga bona'magitoga ka lamana'a lu yege ho epilenogo enali ana kaga kehelite li komopa'anigu malalabe luto Hu'mau lenali folagahatiniguti nele'mo ho ti'ehina lenali keheliya i'ahabe.

⁸ Hu'mau asaga bona'magi komopa'ani bu go fulu tito bu nogana bouba ai komopa'ani bu gana bati hu'ehigo Sikalafu'i lali'i limi'ehina suhi luto enali'i epi'ehibe.

⁹ Ai lali'i fato suhi nohu letoto enali'i mone fato suhi mehu epolo'ehibe. Enali komopa'ani aitoga emigo ya hanalo nona'a foipana'ani li he'mi epolo'ehibe.

¹⁰ Ya hu'ehinaya lenali yatai hena hibe lite Hu'mamofihi fi taga hi etalune'mu nehabe? Lenali Hu'mamofihi mege'i malalune'mu nehana bona'i ketana enemegesagu ligo mefi epalalo. Koyapa'i tatatigi hiti to laliti hiti ana ketana kofito mebiluta'a hu'ohuta yabe.

¹¹ Ya hu'ehina lali ma luto komopati emilata nohune: Ya'mana bona'i foipana'ani li he'mi epoloto ai'aloto enele'mo molo'ehina'a huto Sipi Bo Yesu lali'i ginaga fi limi'ehina'mu luto Hu'mau aku'i lele'mo'ehibe luto Pitau lu'ehina yabe.

¹² Pitau ya luto kaga lulago asaga bona'i li gehesa hite nehanamagi kaga'ani lege'nete legeso hi'ahana. Ya hilete Polugo Banabasiugo la'ina

kagalo enekesa mele'ahana. To ya hago etali etayato Hu'mau babeyafana fato fato'i ya'ma topa hose nasanamofihi fegutoga bona'magi folagaha'anigu li huto hu'ehina kaga lu epi'aha'ina yabe. ¹³ Etali ka'atiti ali su hela'igo Yemesiu ho tito lu'ehina: Nani liluna kaga kehelilo, nalalu'nigita. ¹⁴ Hu'mau yata'a yupahi fegutoga limito enali folagaha'aniguti ai'a bona luga'a enele'mo'ehinamofihi kaga'a Simoni alu lepi'ehibe. ¹⁵ To kaga lu yege holata bomagih i ka'aniuba ya'mananalo moneko ka pa nosabe. Ya'ma mono bukugu fayahi keye'ahanamo ni'ibe:

¹⁶ Sipi Bouba ma luto lu'ehina:

Nani alihi i behe huto
oloto'ni Tebitihi noha'a
i tele bito limito ko'ehina
nani aku'i gi kosaba hilube.

To fe'noha'a ya'mana
nonuguti tuguma bi'ehilina
nani yuhufana li malalube.

¹⁷ Ya hu'ehinogo

fato fato bona'i asaga'magi

Sipi Bomofihi sa sa hilabe.

Asaga bona'i noto noto nehanamagih i

nani'ni bona'ni yabe luto

elesa molo'ohube.

¹⁸ Ya'mana kaga koyapa'i

Sipi Bouba ai'a lu hokolo hu'ehina kaga

yatai hiti ai'a nolibe.

¹⁹ Ya hu'ehina nani'ni ma luto nokehelube. Enali fegutoga bona'magi komopa'ani i behe hite Hu'mau mege'i nemelenogomo lali kapo'ani

hekini loto ketana ligo mefi epalalune, Yemesiu ya luto noluto yabe. ²⁰ Lali enalitoga fayahi goloto ma luto lu epilune: Fato fato'na enemeha'amagihi kuguhi go nepilana nose'na ya'ma kolo tana nose'na ni'inagi menalata. To enali bo alobo gulu hete ai he'mi etenogo ai he'mi etenogo mehilabe. Enali yagakafa lubaha'ani nagatu gi polo hago golahubago hu'ehilina menalabe. ²¹ To asaga nohi

hepato bo mone minola minola hi'ehite asaga fuli kanagu Yuta bona'i li gehesa hite kaga lu keheli fa keheli nehana nonugu Mosehi keya ka'a leka so epilata to ana ka'a lu yege holata asaga nohi hepato nehanamoya lali ya'ma akeheli'ohune luto Yemesiu lu'ehina yabe.

Fegutoga bona'i Yesuhi kaga'a kehelise'na'a enalitoga fayahi mele'ahana

²² To aposolo bona'i hiti to olopa bona'i hiti asaga mono bona'i hiti kaga lu mone-toga melelete enali bo luga'a folagaha'aniguti enele'mo ho tinogo Atioki hepato Polunogo Banabasinogo hiti enoho lifinogo bilabe lite keheli'ahana. Ya hilete enali Yutasihi fato gi'a Basabasiu yabe lite gi helata nehana bo hiti to Silasi hiti etele'mo ho ti'ahana. Ya'mana bole asaga bona'magi bati bo neha'ibe lite lilata nehana bole yabe.

²³ Enali fayahi mone ma lite gete etali etayanugu mele'ahana: Lali aposolo bona'i hiti to olopa bona'i hiti lenalalutinigita fegutoga bona'i Atioki hepato hiti Silia hepato hiti to Silisia hepato hiti neminanamagita lenalitoga

bati hite nehafihe luto fayahi nogo lepolone. ²⁴ Bo luga'a lali folagahatiguti lenalitoga bite kaga fato fato'i lu lepigo lenali'i keta lepesi'ehina lali akeheli'ohune. To lali ya'ma kaga bite lu epilo luto enoho melifi'ohune. ²⁵ Ya'mu luto lali kaga lu monetoga mololototi folagahatiguti lalalutile'i loemo etele'mo ho tiloto lenalitoga kaga lite bila'ibe luto Polunogo Banabasinogo lebesina bole lalalutigihhi hiti moneka enoho lufunogo ba'ibe. ²⁶ Etali Sipi Boti Yesu Kilisitohi foya koli mehise lite neba'igo filise'na li etugufalo babu yupahi mele'aha'ina yabe. ²⁷ Ya'mu luto loe bole Yutasinogo Silasinogo etoho lufune. Ya hutagi etali'atiti etabagaguti ya'mana kaga lu lepila'ibe. ²⁸ Sikalafu'uba lali hiti moneka nohigo kaga ya'ma luto lu'ohune. Lali ketana fato'i aku'i mone melepilune. Lenali ya'ma suhisigo hilo. ²⁹ Fato fato'na enemeha'amagihi kuguhi go nepilana nose'na menalo. Yaga golahi mo silo. To yagakafa bona'i nagatu gipolo hu'ehilana menalo. Lenali bo alobole ai he'mi etenogo ai he'mi etenogo mehilo. Lenali silaga ya'mana kaga mege'i melete nesi'a mone pelesa meise minalana bati hilana'mu yabe. Lenali bati hite minalo.

³⁰ Ana fayahi epilete enoho lifigo bana bo-magi Atioki hepato henetilete Hu'mamofihhi komopa'ani emite neminana bona'i enele'mo nupa hilete ana fayahi epi'ahana. ³¹ Ya hago enali ana bona'magi hetofa kaga fayanugu ge'ahana leka sete be gelete enugufagu laga higo enegelo bi'ahana. ³² Yutasiugo Silasiugo etali kaga lu yege holatamale'i kaga yatamalo lu epite

enalalu'anigihi koli mehilo lite enele'mo amuya mele'aha'ina. ³³ Yutasiugo Silasiugo nesi kana'asi ana hepato minela'igo enalalu'ani nehanaga aku'i i behe hite bila'ibe lite fulunaguti etoho lifi'ahana yabe. ³⁴ Ya hilune'mu nehago Silasiu managa minalube luto keheli'ehina.

³⁵ Polugo Banabasiugo ya'ma Atioki hepalugu kana mone'a mine'aha'ina. Etali hiti to bona'i luga'amagi hiti kaga enelepila to Sipi Bomofihi ka lamana'a lu yege hela hite mine'ahabe.

Polugo Banabasiugo loko hi'aha'ina

³⁶ Alihi nesi'a kana minelete Polu Banabasihi ma luto lu emi'ehina: Le'ali koyapa'i Sipi Bomofihi kaga'a lu yege ho epi'ohu'ina bona'i le'alaluti'agi nehana hepatoga buto enebe tigi-mofa'na hilu'ibe. Ya hulototi'a enali bati hite nehafi to hena hite nehafi bu enagalu'ibe. ³⁷ Ya luto ligo Banabasiu: Yoni Makihi le'mo le'emegetoto ai bilune. ³⁸ Ya ligo Polu: O'e luto, koyapa ya'ma pana'uba Pamifilia kegi'ati he'mi le'etoloto fato kapoga bu'ehina. Le'ali hiti moneka humofa'na huto lili'na li бага mei'ehina pana'i yago le'ali hiti mebilibe luto Polu ya lu'ehina. ³⁹ Polugo Banabasiugo ana kaga'mu lite kenasabo bite etogolagagu fibu fibu hilete loko hi'aha'ina. Ya hilete Banabasiu Makihi le'moto Saipalasi ya'ma hege nagamilugu ti'ehina metoga botigu tite bi'aha'ina. ⁴⁰ Ya neha'igo Polu Silasihi le'moto nobigo lalu'agi ma lite li'ahana: Hu'mau kaba hu letoto letehe'menogo biliyo, lite li'ahana. ⁴¹ Polu Silia kegi'a hiti Silisia kegi'a hiti buloto

Hu'mamofitoga komopa'ani emi'ahana boana'i kaga lu epito enele'mo amuya molomo bu'ehina.

16

Polunogo Silasinogo hiti Timotiu ikoloto bu'ehina

¹ Polu Tebe hepato hiti Lisitala hepato hiti heneti'ehina. Ya'mana hepato Hu'mamofitoga komopa'a emito nominana bo gi'a Timoti yabe. Ai ito'afu Yuta a'uba ana huto Hu'mamofitoga komopa'a emito nominana yabe. To ai afo'afu Giliki melugu boya. ² Asaga Hu'mamofihi naga'amagi Lisitala hepalugu hiti to Ikoniu hepalugu hiti Timoti kumu hetofa pana'i yabe lite fokehi lilata nehana pana'i yabe li'ahana. ³ Polu Timotihi le'moto bilube'mu gufa'a laga hu eto'ehina. Hena'mugope ya'ma pana'mofihi afo'afu Giliki bo mino'ehina'mu luto Yuta bona'i ana hepato nahanamagi fegutoga pana'i nohibe lite akeheli'ahana'mu yabe. ⁴ Enali kapo melete tauniga nebite koyapa'i Yelusale hepatoti olopa bona'magi hiti aposolo bomagi hiti lu epi'ahana kaga Hu'mamofitoga komopa'ani mele'ahana bona'i lu epime lu epime nebite ya'mana kaga lenali mege'i melete minalo lite lu epi'ahana yabe. ⁵ Ya hilago Hu'mamofihi boana'magi aitoga amuya melete ule'ale hite komopa'ani emite neminago luga'a bona'i ete enalitoga ikele ikele hago asaga yupahi babu bona'i huto hi'ahana yabe.

Polu bamulugu Masetonia melugu bo bu go'ehina

⁶ Enali Filigia kegi'a hiti Galesia kegi'a hiti folagaha'atigu bi'ahana. Ya hago Sikalafu'uba Esia kegi'a mono ka lu yege mehalabe luto laga hu epolo'ehina yabe. ⁷ Enali Misia kegi'a hiti bu baga ilete Bitinia hepalugu tilune lite babeyafa hana Yesuhi Sikalafu'auba metilo luto kapo hekini lo epolo'ehina. ⁸ Ya higo enali Misia kegi'a be ligite Toloasi hepatoga limi'ahana. ⁹ To ana folugu'i Masetonia bouba ma luto kehe noigo Polu bamu'i bu go'ehina: Kai hege nagamilugu igofa hoto Masetonia bona'i oto lehe'mobo. ¹⁰ Polu ya huto bamu'i abu golago lali mele'isi Masetonia biluta kapo'mu sa sa hu'ohuta. Hena'mugope Masetonia bonatoga ka lamana'a lu yege halo luto Hu'mau lali'i kehe noibe lutoti lu keheli'ohuta.

Mone a'i Litiau komopa'a i gelehe hu'ehina

¹¹ To lali Toloasiti he'mito boti monelugu tilenogo ana botiuba lele'moto buto Samotalase aelanigu tiloto o'ehina. To eteha'a lele'moto Niapolisi bu'ehina yabe. ¹² To lali ya'mana hepa'i he'miloto Filipai hepalugu heneti'ohuta. Ana hepa'mo koyapa'i Lomu gamaniuba mino'ehina Masetonia kegi'alugu tauni ya'ma sipinamo fato hepa'i be ligi'ehina hepa'i yabe. Lali luga'a kana ya'mana hepato mino'ohuta yabe. ¹³ Fuli kanagu lali hepaluguti he'mito fegutoga limito nagami beletoga bu'ohuto ya'mana nagami beletoga Yuta bona'magi nunumu hilata nehilana hepa'i ni'ilifi luto bu'ohuta yabe. Lali melugu mino labasu bilototi analo ana'i li gehesa hi'ahana kaga lu epi'ohuta. ¹⁴ Ya'mana analuguti mone

a'mofihi gi'a Litia yabe luto nohinauba kagati keheli'ehina. Ai Taitaila hepato a'uba safa guketelo bisinisi nomalana a'i yabe. Ai Hu'mamofitogago agoya hu emito nominana'mu luto Sipi Bouba ekesa'a li hokolo higo Polu lina kaga keheliya i'ehina. ¹⁵ Ai kaga keheliya ina'mu luto ai'a hiti lalameha'a hiti mono nagami'i fele'ahana yabe. Ai nagami'i afololoto ma luto kaga lu limi'ehina: Nani kumu Sipi Bomofitoga komopaka bati huto emi'ahane lite keheli'ehitemo nani noha'niluga ete minalo. Ya luto ana'uba koyo koyo bito kehe ina'mu luto noha'aluga buto mino'ohuta yabe.

Polu Silasiugo Filipai hepalugu nagalugu mine'aha'ina

¹⁶ Mone yupahi nunumu hepato nobunogo kele kele pa'i mone'amofihi foipa fele komopa'agu nominago alihi huto hilinana ya yupahi huto hilibe luto lu huto hulata nohina pa'uba lofo tumala hu'ehina. Ya'mana pa'uba alihi huto hilinanamofihi kaga'a lu huto hulata hinanalo asaga yupahi efahi babu lito kaba bo'amagihi li epilata huto nominana yabe. ¹⁷ Ai Polu hiti lali hiti lemege'i lifito nobuto ma luto sipi kehe i'ehina: Ya'ma bo enali ifo muyagu Hu'mamofihi koko pana'a nehabe. Lenali lenugufatini li lenubuto bilabe lite lu yege nehabe. ¹⁸ Babu yupahi ya'ma pa'uba ya lumofa'na higo Poluhi kosele'a hago i behe huto ana foipa felemofihi ma luto lu emi'ehina: Yesu Kilisitohi gi'alo kehe nounagi leke ho limito bufa hubo. Ya ligo ana foipa feleuba ana'asilo ana pa'mofihi komopa'aguti mele'isi hele ko limi'ehina. ¹⁹ Kaba bo'amagi

be gelete aku aku'i efaha'ani lilata nehanana su hago enitaluga logo bigo Polunogo Silasinogo kefefehite hepa'i folaganugu gamani bona'i nehanalo etele'moto bite ho ti'ahana. ²⁰ Enali etele'mete bite Lomu gamani bo enubulo ho tilete ma lite li'ahana: Ya'mana bole Yuta bole neha'ibe. Etali hepata li sibina neha'ibe. ²¹ To lali Lomu bona'magita lotiuba mege'i memalalo luto o'e lu'ehina kaga etali lu epimofa'na neha'ibe. Lali Lomu bona'i nohutago etali kaga'atiti mekehililuta'mu yabe. ²² Ya lago luga'a bona'magi ana hite anagu heleke melete etifisa i'ahana. Ya hago enali Lomu gamani bomagi gukete'atiti toba he etetelete naga osatu etibiyigilo li'ahana. ²³ Ya lago naga osatu babu lite etibiyigilete naga'i etimi'ahana. To naga noto kasito gimi gilata bo: Kai le'mo huto kasito gimi bati gibo lite amuya ka li ete'ahana. ²⁴ Ya lite amuya kaga li etana keheliloto ana gimi kaba bouba etele'moto buto naga nohi folagaha'agu ni'ina hasagu etele'mo fitu fo bi'ehina. Ya huloto etigi etayato naga'i giloto lukesalo husoko hu etoto'ehina yabe.

²⁵ To folugu'i Polugo Silasiugo nunumu nama Hu'mamofitoga lite mine'aha'ina. Ya ha'igo luga'a bona'i nagalugu minanamagi kehelite mine'ahana yabe. ²⁶ Ya neha'igo ana'asilo sipi imima'i liloto naga noho lukesasaga'i li kule kule hu baga i'ehina. Ya nohuto naga noho kasihi asaga'i mele'isi i hokolo hu baga noito nagalugu minana bona'magi enayanugu gi'ahana naga'i asaga'i gulu ho baga i'ehina. ²⁷ Ya hulago naga kasito kaba gimi gi'ehina bouba ho tiloto asaga kasihi hokolo hu su ho'ehigo bu go'ehina. Ya hu-

loto nagalugu bona'mo silaga'i afele su he'ahabe luto lesa'a gofa ligo yatama emita'a li kisito ai'a lubaha'a laga hilube'mu hu'ehina. ²⁸ Ya higo Polu bu goloto sipi kehe i emito ma luto lu'ehina: Lali asaga'i maga nohutagi kaika kugufaka li sibina mehobo. ²⁹ Ya ligo naga noto kaba gimi nogina bouba libi kumu kehe iloto hololu luto hasagu ti'ehina. Ai lesa'a gofa ligo afoya foya iloto Polunogo Silasinogo etigigu tito ko'ehina. ³⁰ Ya huloto Polunogo Silasinogo etele'mo fegutoga mololoto ma luto etoloka ho'ehina: Letali sipi bole, nani hena hinogo'ni Hu'mau nele'mo nubuto bilibe? ³¹ Ya ligo etali lu emi'aha'ina: Kai Yesutoga komopaka emiletogo Hu'mau kele'mo kubuto binogo ai pana'a lolo hilane. To kai lalamehaka hiti ana hilabe. ³² Ya lilete etali Sipi Bomofihi mono ka'a ai noha'agu nehana bona'i hiti ai'a hiti asaga'i lu epi бага i'aha'ina yabe. ³³ Ya ha'igo ana folugu'i naga noto kasito kaba hulata bouba Polunogo Silasinogo fugepa'atiti bito etehepuhi lo'ehinana nagami'i mukoho luto okala hu etoto'ehina yabe. Ya huloto ana'asilo mele'isi lalameha'a hiti asaga'i nagami'i fele'ahana yabe. ³⁴ Alihi Polunogo Silasinogo noha'aluga etele'moto tito nose'na etimigo ne'aha'ina. To ai'a hiti lalameha'a yatai Hu'mamofitoga komopati noemune lite enegelo gofa bi'ahana yabe.

³⁵ Etehi go'i lulago Lomu gamani bomagi gimi bo enoho lifigo ete ma lite li'ahana: Ya'mana bole etele'mo he'mitogo bi'ino. ³⁶ Ya lago naga noto kasito kaba hulata bouba ana kaga buto ma luto Poluhi lu emi'ehina: Lomu gamani bona'magi

kai hiti Silasi hiti nagaluguti gulu hete biliyo lite gimi bomagitoga kaga malago lite e'ahana. Ya lanagi letali letipagu fulu hinogo biliyo luto lu etimi'ehina. ³⁷ Ya ligo Polu Lomu gamani bomagi gimi bo'ani ma luto lu epi'ehina: Le'ali Lomu bo nohu'inamo ana'ina mone li sibina hu'ohu'igo legi enali faga lite asaga boana'i li gehesa hite nehana enubulo faga osahi le'emite nagalugu le'ele'mo mele'ahabe. To yatai enali fala kite le'ele'mo he'milune nelafihe? Enali ma'naka lite ya mehilana'mu yabe. Enali'ani ete enayanugati le'ele'mo fegutoga malalana'mu yabe. ³⁸ Polu ya luto ligo gimi bomagi ana kaga lite bite Lomu gamani bomagi lu epi'ahana. To Polugo Silasiugo Lomu bo nohu'ibe la'ina kaga Lomu gamani bomagi kehelilete enelesa'ani gofa lu'ehina. ³⁹ Ya hilete enali Lomu gamani bomagi Polunogo Silasinogo eniginaga ka lu etimilete etele'mo feugu te'ahana. Ya hilete ma hepa'i he'mite bufa hiliyo lite etoho lifi'ahana yabe. ⁴⁰ Ya hago Polugo Silasiugo naga nonuguti fegutoga limilete Litiaha nonuga bi'aha'ina. Analo Hu'mamofitoga komopa'ani emite minana bona'i Hu'mamofitoga amuya melete komopatini aitogago emite minalo lite amuya kaga lu epilete he'mi epelete bi'aha'ina yabe.

17

Tesalonika bona'magi Polunogo Silasinogo etahalune'mu hi'ahana

¹ Etali kapo melete bite Afipolisi kegi'a henetilete yaloti he'mite bite Apolonia kegi'a henetilete ana hite ya'ma hepa'i be ligite bite

Tesalonika hepato heneti'aha'ina. Ya'mana hepato Yuta bona'magi mono noha'ani mone ni'igo bu ge'aha'ina. ² Polu hulata nohina suhi luto Yuta bona'magi kaga lu keheli fa keheli hilata nehana noha'anigu buto ti'ehina. To ai loegi monegi fuli kana'agu mono bukugu ana bona'i kaga ma luto lu epi'ehina: ³ Mesiau gabu foya liloto filito aku ho tilibe luto Hu'mau le'mo ho ti'ehina. Ya'ma Yesu kumu kaga lu nolepuna boya ai Mesiau nohibe luto lu yege hago enali enegekesa keheliya i'ahana. ⁴ Luga'a boana'magi etali ka'atiti keheli komopa'anigu melete etemege'i mele'ahana. Giliki bona'i luga'a babu lite Hu'mamofitoga agoya hu emite mine'ahana bona'i ana hite, to enigihiti ana'magi ana suhi hite etemege'i mele'ahana yabe.

⁵ Ya hago Yuta bona'i luga'amagi enogolagu higo enipakafa helete enumuhi meni'igo kegeiyo neminana bona'i enele'mo nupa hi'ahana. Enali nonugu nonugu tauniga tilete limilete hite ete bo mone Yesonihi nohi li bego hite Polugo Silasiugo ana nonugu neha'ifi meneha'ifi lite libe tele bibe hite nehi'inogomo etele'mo fegutoto bona'magi enubulo etele'mo malalune lite yabe. ⁶ Ya hana etali meneha'igo Yesoni hiti lalu'agi luga'a hiti enayato lite gamani bona'i enubulo bilete nogo'ani sipi ma lite li'ahana: Enali ya'ma bomagi asaga hepa'i li sibina nehana yatai ma hepatai li sibina hilune'mu nehabe. ⁷ To Yesoniu ya'mana bo noha'aluga enele'moto bu'ehinamagi Sisahi kaga'a ligofa helata nehite ma lite lilata nehana yabe: Kibina bo fato mone

nohina gi'a Yesu yabe. ⁸ Ya nelago asaga boana'i hiti to gamani bo hiti ana kaga kehelilete topa hete kehe sipi sipi i'ahana. ⁹ Ya hilete gamani bona'magi Yesoni hiti lalu'agi hiti enalitogati efahi mone'a lu molo'ehinanamo nelite he'mi epalago bi'ahana yabe.

Polugo Silasiugo etali Belia hepalugu mono foya li'aha'ina

¹⁰ To ana folugu'i sinihi ginogo Yesutoga agoya hu emi'ahana bona'magi Polunogo Silasinogo Belia hepato mele'isi etoho lifi'ahana. Ya hago etali Belia hepato henetilete Yuta bona'magi mono li gehesa huse nonuga bite ti'aha'ina yabe. ¹¹ Enali Yuta bona'i Belia hepalugu enegekesa hokolo nehanamagi hetofana hite koyone hi'ahana. To luga'a Yuta bona'i Tesalonika nehanamagi suhi lite memine'ahana. Enali Belia bona'magi ka'atiti keheli bati hite laga'ani epesigo asaga yupahi mono buku'ani hiti lite e'ehite Polugo Silasiugo faga lila'ifi ma'naka lila'ifi lite leka so bati hite bu golata hi'ahana. ¹² Ya hilete babu boana'i etali ka'atiti komopa'anigu li pili kago to babu enigihiti Giliki ana'i to bona'i babu lite enali hiti ana hite ana kaga komopa'anigu li pili koto hi'ahana. ¹³ Ya hago alihi Tesalonika Yuta bona'magi Polu ya huto Hu'mamofihika'a Belia bona'i lu noepibe lana'a keheli'ahana. Ya hilete enali ana hepatoga bite boana'i faga faga lube epibe hite enegekesagu lu pisili bite enele'mo negi nagi ne'ahana. ¹⁴ Ya nehago Yesutoga agoya hu emi'ahana bona'magi Poluhi mele'isi le'mo he'migo hege nagami beletoga limi'ehina. Ya

nohigo Silasiugo Timotiugo etali Belia hepatoga mine'aha'ina. ¹⁵ To Poluhi le'mete moneka bana bona'magi le'mo foto'i melete Atenisi hepato bi'ahana. Ya hilete enali aku'i i behe hite Belia alune'mu nehago Polu Silasinogo Timotinogo etali kumu mele'isi nani nohunaga aliyo luto kaga malago lite bi'ahana yabe.

Polu Atenisi tauniga mono ka lu epi'ehina

¹⁶ Polu Silasinogo Timotinogo Atenisi hepato etegeba huto nohuto bu gana ana hep-
alugu ana'ina meha'a babu lite yafatu lolo hite
mele'ehite komopa'ani ananamagihi epite nem-
inago bu go'ehina. Ya huloto anana'mu luto
Poluhi ipagu keta hu'ehina. ¹⁷ Ya higo kaga
lu keheli fa keheli hilata nehana mono nonugu
tiloto Yuta bona'i hiti to fegutoga bona'i luga'a
Hu'mamofitoga komopa'ani emite minelata ne-
hana bona'i hiti kenasabo bilata hu'ehina. To
asaga yupahi babu boana'i hepa'i folagaha'agu
limo gehesa hite minete kaga lu keheli fa ke-
heli hilata hanalo Polu kaga lu epilata hu'ehina
yabe. ¹⁸ To luga'a Epikuli bona'i to Sitoiki bona'i
kaga enelepilata bo'animagi Polu hiti kenasabo
bilete luga'amagi ma lite li'ahana: Ya'ma hag-
ulu hagulu ka nolina bo ai henamofihiki kaga
lu epilube'mu nohibe? To luga'a bona'magi
li'ahana: Ai fato melugu meha'agi kaga'ani lu
yege nohabe. Polu Yesu kumu ai filiehinagati
aku'i ho tiehibe luto ka lamana'a lu yege ho
epina'mu ya lite li'ahana yabe. ¹⁹ To enali Poluhi
le'mete kanisole bona'i li gehesa hepa'i gi'a Ale-
opagu yabe lite bite ma lite li'ahana: Kai yuhufa
kaga boana'i noenelepitamofihiki hapa'a lali keheli

bati hilune'mu nohune. ²⁰ Kai lu noepita kaga lali keheluta fato huse ka lu noepine lali ana kagamofihi hapa'a hena huto ni'ifi lali kehelilune. ²¹ To asaga Atenisi bona'i hiti to fato hepatoti bona'i luga'a ete ana hepato mine'ahanamagi hiti yatai yuhufa kaga kehelise yupahi yabe lite limo gehesa hi'ahana yabe.

²² To Polu Aleopagu kanisole bona'i enubulo ho tiloto ma luto lu'ehina: Lenali Atenisi bose. Asaga mono kaga lusemofito lenali amuya nemalago bu nolenogobe. ²³ Lenali komopatini emilata nehanana asaga'i hepatinigu ni'ina nani kapo nomoloto'ni abu go su ho'ohube. To kuguhi gelata nehana hepato kaga mone ma lite fayahi gete mele'ahago bu go'ohube: Ya'ma mekeheli'ohuta nasana meha'alo yabe. To lenali ya'mananamofihi meha'a bu mege'ahananalo komopatini emite fa'mene'mu minelata nehana yatai nani kaga'a lu hokolo huto lu nolepupe.

²⁴ To Hu'mau kokuluma'i hiti me'i hiti to asaga'na fato fato'i anagu ni'inana lolo hu'ehina bo ai kokuluma'i hiti me'i hiti Sipi Bo'a nohuto bona'magi enayatu gilata nehana mono nonugu tito meminolata nohibe. ²⁵ To ai ana'ina'a su holenogo bona'magi enayanugati he'mete meemilana'mu yabe. To hena'mugope asaga bona'i sikalafu'ani episemofihi to mino kosaba husemofihi to silaga'na ai'ago epilata nohibe.

²⁶ Koyapa'i moneko bo lolo hu'ehinaguti nupa bo safa bo fato fato'i noto noto'i bite mino бага ino luto enoho lifigo analo analo mine'ahana yabe. Ai'a yata'a kana'a molo epoloto ya hepato bila bila hilo luto me'i enemeto enemeto epi бага

i'ehina. ²⁷ To ai Hu'mamofihi sa hilabe luto ya hu'ehina. To enali ai kumu'i sa sa hite bula ola hilete be go lamana hilabe. To ai ana bo foto'i menohina laliti lemeto lemeto nohibe. ²⁸ Ya nohigo kaga mone ma ni'ibe:

To ai yanuguko mino kosaba huto bula ola huto nominone.

To luga'a bonatinimagi kilihe ka ma lite li'ahana'a huto ni'ibe: Lali hiti ana huto ai'a yagapana'a nohune.

²⁹ Ma'naka luto Hu'mamofihi yagapana'a nohutagi ya'ma lali Hu'mamofihi hapa'a li sibina huto golutufi silibatufi to efatufi ana'ina meha'a bona'magi enegekesa keheli bati hi'ahanamagi enayatu lolo hi'ahanana'mu ai nohibe luto lekesa mekehelilune. ³⁰ Koyapa'i kaga keheli bati mehuse kanagu yatai kana'alo li huto nehanamofihi li huto nehanamofihi li huto hilata hi'ahana Hu'mau bu go he'mi'ehina yabe. To yatai ai asaga bona'i ma luto lu noepibe: Lenali foipana li huto nehana he'mi su helete komopatini i gelehe hilo. ³¹ To ai asaga melugu bona'i ka foya lilito guna ilube luto limilina kana'a molo eto hu'ehibe. To ai ya'mana lili'na lilibe luto bo mone le'mo ho ti'ehinauba guna i epalalibe. Ai ana bo fli'ehinagati le'mo ho tilotomo ya'mana asaga bona'i enelepigo be gete keheli'ahabe.

³² Filise bo kene keliguti aku'i ho ti'ehibe luto Polu lina kamu'i luga'a bona'magi kiya hi ete'ahana. To luga'amagi ma lite li'ahana: Mone yupahi ana kaga aku'i lu limitogo kehelilune.

³³ Ya lite lilago Polu li gehesa hite nehanaloti he'mito bu'ehina. ³⁴ To luga'a bona'magi kaga'a

keheli komopa'anigu melete mege'i mele'ahana. Ya hana bona'magi folagaha'aniguti bo mone Tionisiu ai Aleopagu kanisole bo hiti to mone a'i Tamalisi hiti to luga'a bona'i hiti ikelete mege'i mele'ahana yabe.

18

Polu Koliti lili'na li'ehina

¹ Alihi Polu Atenisi hepato he'mito Koliti hepato bu'ehina. ² Ya huloto Yuta bo mone gi'a Akuila yabe ai Ponitasi hepato kete'ahana bo nohigo bu go'ehina. Ya'ma bouba liha'a Pilisila hiti Itali kegi'atoga bite nemina'inati ma'asi e'aha'ina yabe. To hena'mugope gamani bo Kolotiasiu ai gihiti bouba Yuta bona'i asaga'i Lomu hepa'i he'mite bilo luto enoho lifi he'migo etali ete neha'inalo Polu bu'ehina. ³ Polu koyapa'i kata nohi gilata'na naga'atu hetito efaha'a lilata hu'ehina suhi ana alobolemale'i ana suhi neha'igo ai buto etehe'moto mino'ehina. ⁴ Ai asaga fuli kana'alo Yuta bona'i li nupa hite mono kaga lu keheli fa keheli hilata nehana noha'anigu tiloto Yuta bona'i hiti to Giliki bona'i hiti Yesu Hu'mamofih lusi pana'a huto hu'ehibe, luto kaga lu epi'ehina.

⁵ Alihi Silasiugo Timotiugo Masetonia hepa'i he'mite ai nohinalo limi'igo asaga yupahi Polu mono kaga lu epiba lu epiba huto nohuto ma luto Yuta bona'i lu epi'ehina: Yesu ma'naka luto Hu'mau le'mo ho ti'ehina bo nohibe. ⁶ Ya luto lu epina enali ana ka'a keheli komopa'anigu memolose kiya hi etelata hago Polu ya nehagomo hulata nohina'a huto gukete'agati mumusopa i tili

nohuto ma luto lu epi'ehina: Lenali lenugufatini le'mo lenubuto mebilana ya lenali hapatini'mu luto yabe. To nani yananalo kaba mehu'ohube. Yatai ya'maloti fegutoga bona'i nehanaga buloto Yesu kumu enali'i lu yege hoto minaluna'mu yabe. ⁷ Ya luto luloto Polu ho tito buto fegutoga bo mone gi'a Titiu Yasitasi ai Hu'mamofitoga komopa'a emito nominana bomofihi noha'a Yuta bona'magi mono ka beto hilata nehana noho lebato ni'igo anaga kete mine'aha'ina yabe. ⁸ To Kilisipau, Yuta bona'magi li nupa nehana mono noto kaba hu'ehina bouba ai lalameha'a hiti Sipi Bomofitoga komopa'ani emite Poluhi ka'a mege'i mele'ahana. Ya nehago Koliti bona'i luga'a babu lite Poluhi ka'a kehelilete ana mono ka li pili kete nagami'i fele'ahana yabe.

⁹ Mone folugu'i Poluhi bamu'i hu bulo mololoto Sipi Bouba ma luto lu emi'ehina: Kai koli mehuse kaga lu hokolo huto lu epibo. Kai kosele'i nahabe luto kabaga hekini loloto meminobo. ¹⁰ Nani kai hiti nohunagi bo moneuba kai'i mekahalina'mu yabe. Bona'i ma hepalugu babu lite nehana nani bona'ni nehabe. ¹¹ Ya luto lu emigo Polu Hu'mamofihi mono ka'a ana hepato enelepito minoto kufu mone yagi ikahi nayahi mone kegi'a su hoto mone kegi'a nayatogati mone heleko malago huto su hago mino'ehina yabe.

¹² Ya nohigo alihi Galiohi Lomu gamani bo Gilisi melugu le'mo ho tigo minana kana'alo Yuta bona'i li nupa hite ho tilete Poluhi yato lite ka foya le'mo melelete ma li'ahana: ¹³ Lali keya katiuba o'e lu'ehinagu kaga ya'ma bouba ma

hepato asaga bona'i Hu'mamofihi kaga'a fato'i noenelepito enali'i kefefe suhi nohibe. ¹⁴ Ya nelago Polu ka'anilo nona'a lilube'mu nohigo Galiou ho tito Yuta bona'i ma luto lu epi'ehina: Lenali Yuta bose. Ya'ma bouba gamaniuba kaga molo'ehina'amofihi pelesa ila to foipa suhi mone li huto hula hu'ehitita nani lenali katini keheli leputine. ¹⁵ To lenali kaga noloka hela ana'ina gi'a hela to lenali keya katini lu nim-ila nehagomo nani o'e luto nolube. Lenalitini ana kagatini lu sepa ilo. To nani ya'iya lite nelana kamofihi ka foya'a meliluna'mu yagi to kaga'a loko mehilube'mu nohunagihe, ya'ma gamani bo Galiou lu'ehina. ¹⁶ Ya luto luloto ka foya lilata nonuguti fegutoga enele'mo amuya he'migo limi'ahana. ¹⁷ Ya higo Yuta bona'i li nupa hite kaga lilata nehana noto kaba bo Sosenisihi enali nu kite ka foya lilata nehana kasito segihi osahi emi'ahana yabe. To ya hananalo ya'ma gamani bo Galiou, ya habe luto ekesa mone meyigi'ehina yabe.

Polu Silia kegi'a Atioki i behe huto bu'ehina

¹⁸ Polu Koliti hepato lalu'agi hiti babu kana minoloto Pilisilanogo Akuilanogo Silia metoga botigu tite bilune'mu bi'ahana. Ai mebu'ohuto lama'naka nolube luto Senikilia hepalugu gola-galo yahi ti'ehina'mu luto oka'a laga hu'ehina yabe. ¹⁹ Enali Efeso hepalugu henetilete Pilisilanogo Akuilanogo he'mi etoto'ehina. Ya huloto Yuta bona'magi li nupa lite mono kaga beto hilata nehana nonugu ai tiloto Yuta bona'i hiti kaga lu keheli fa keheli hi'ahana. ²⁰ Lali hiti yatama kana

minoto kaga mone'a hiti lu limilane lite lana ai o'e lu'ehina. ²¹ Ya luto ka'ani pelesa iloto ma luto lu epi'ehina: Ai Hu'ma linogomo nani aku'i lenalitoga oto bu lenagalube. Ya luloto botigu tiloto Efeso hepa'i he'mito bu'ehina.

²² Buto Sisalia melugu henetiloto Yelusale hepato buto lalu'agi Yesuhi komopa'ani emi'ahanana enebe tigiloto aku'i Atioki hepato bu'ehina yabe. ²³ Analo'i nesi kana minoloto ana hepa'i he'miloto Galesia kegi'a hiti Filigia kegi'a hiti bula ola huto boana'i Yesutoga komopa'ani melete neminanamofihi enele'mo amuya molo-mofa'na hu'ehina yabe.

Apolosiu Efeso hepato hiti Koliti hepato hiti minoto foya li'ehina

²⁴ To Alekasatilia hepato ti Yuta bo mone oto Efeso hepato mino'ehina bomofihi gi'a Apolosi yabe. Ai kaga le'mo bati huto lu epilata nohina to ana huto Hu'mamofihi mono ka fayanugu ge'ahanamofihi keheli bati hu'ehina bo yabe. ²⁵ Enali ya'ma bomofihi Sipi Bomofihi Kapo'alo le'mo melete kaga lepi'ahago ana kagauba komopa'a amuya molo'ehigo nohuto Yesu li huto hu'ehinamofihi kaga'a boana'i enelepito to lu epi'ehina. Ya hu'ehina to ai Yoniu nagami'i folo epololata hu'ehinanago ai keheli'ehina yabe. ²⁶ To ai hapi fito Yuta bona'magi kaga nupa hite lite minelata nehana noha'anigu tito ka lu hokolo huto lu epi'ehina. Ya higo Pilisilaugo Akuilaugo ka'a kehelilete noha'atitiluga le'mete bite Hu'mamofihi kapo'amu mone'a hiti lepi bati hi'aha'ina yabe.

27 Alihi Apolosiu Gilisi metoga bilube'mu no-higo Efeso Yesuhi agoya hu emi'ahana bona'magi he'mete fayahi mone Gilisi hepalugu minela bona'anitoga Apolosihi ya hepatoga be tigite le'mo bati hilo lite fayahi gete emi'ahana. Apolosiu ana hepatoga nehetiloto luga'a bona'i Hu'mau enele'mo koyone huloto komopa'ani aitoga emite minalanana ai'a epi'ehina. Enali Hu'mau enehe'mo'ehina bona'i ya'ma Yesutoga komopa'ani emi'ahanamagi Apolosiu kaba hu epoloto hetofana huto enehe'mo'ehina. 28 To ai asaga boana'magi enubulo Yuta bona'magi kaga bati mehina'a lilata nehana ana ka'anilo nona'a lu epigo ai ka'auga enali ka melugu ho fi to'ehina. To ai Yesu kumu ma'naka luto Mesiau nohibe luto Hu'mau mono kagu go'ehinaloti leka soloto enelepito higo enegekesa keheli amuya mele'ahana yabe.

19

Polu Efeso mono foya li'ehina

1 Apolosiu Koliti hepatoga minana kana'aluga Polu kosa ubago hina kapo luga kapo moloto oto Efeso hepato neheti'ehina. Ya huloto Efeso hepalugu Yesutoga agoya hu emi'ahana bona'i luga'a bu enogoloto enoloka ho'ehina: 2 Lenali Yesutoga komopatini emi'ahanalo Sikalafu'i li'ahanafihe? O'e, koyapa'i Sikalafu'i ni'ibe lite lu limigo lali mekeheli'ohuta yabe lite ka'alo nona'a li'ahana. 3 Ya lago Polu aku'i enoloka ho'ehina: To lenali henamofihi nagami'i fele'ahabe? Ya ligo enali lu emi'ahana: Lali Yonihi nagami'i folo'ohune.

⁴ Ya lite lago Polu lu'ehina: Koyapa'i boana'i komopatini i behe hilo luto lu epito Yoniu nagami'i folo epolo'ehina. To bo mone nani nemege'i noana bo Yesu, aitogago komopatini emite minalo luto Isilaeli bona'i lu epi'ehina yabe. ⁵ Polu ya luto lu epigo enali ana kaga kehelilete Sipi Bo Yesuhi gi'alo nagami'i fele'ahana. ⁶ Ya nehago Polu lataha'anilo yahi noligo enalitoga Sikalafu'i limigo fato fato nogo hite Hu'mamofihi ka'a ana nogoguti li'ahana. ⁷ To ya'mana bona'i nayahi luga luga su hoto nigigusagati loemo heleko malana'amagi yabe.

⁸ Polu Yuta bona'magi mone kaga lu keheli fa keheli hilata nehana nonugu tiloto amuya moloto ka lamana'a lu epito ikahi loebe monebe mino'ehina. Ai enali hiti kenasabo bi enohoto Hu'mamofihi Kapo'alo bilabe luto amuya kaga lu epi'ehina yabe. ⁹ Ya lina kaga luga'a bona'magi keheli komopa'anigu memelelete silaga boana'magi enubugu Sipi Bomofihi Kapo'a lu sibina hi'ahana yabe. Ya lago Polu nohe'mi epoloto pana'alobo'a enele'moto buto asaga yupahi Tilanuhi ka enelepilata nonugu tito kaga lulata hu'ehina yabe. ¹⁰ To ai ya huto minoto kufu loemo li he'mina kana'agu Yuta bona'ifi Giliki bona'ifi to silaga bona'i Esia melugu mine'ahanamagi Sipi Bomofihi ka'a akeheli su he'ahana yabe.

Sikibahi pana'amagihiki kaga'ani

¹¹ Hu'mau Poluhi yato babeyafana fato fato'mofihi li huto hu'ehina yabe.

¹² Poluhi hakisipi'afi to gukete'a pekene higo

he'mi'ehinana lite bite enebesi'ehina bona'magi enugufaga soso hago enebesise'na'ani su ho epolola to foipa fele komopa'anigu minolata hu'ehina bona'magi ana hite enugufa soso hago ana foipa fele heleko limito bulata hu'ehina yabe.

¹³ To Yuta bona'i luga'amagi bula ola hite foipa fele ho lifi nehe'mite efahi lilata nehanamagi enegekesa kehelite Sipi Bo Yesuhi gi'a ya'ma babeyafalo foipa fele ho lifilube'mu hu'ehina. Ai foipa felemofihi ma lite lu emi'ehina: Polu kaga'a lu yege nohana bo Yesuhi gi'alo kehe noube.

¹⁴ Yuta bona'magi sipi mono bo'ani Sikibahi pana'amagi ya'ma suhi li'ahana. ¹⁵ Ya nehago foipa feleuba ma luto lu epi'ehina: Nani Yesuhi kehelito to Poluhi hapa'a hiti akeheli'ohube. To kaibe kiyi'agabe? ¹⁶ To ana foipa fele komopa'agu nohina bouba enugufalo heleko moloto sipi luba huto enoho'ehina. Ai lusina huto fugepa'ani bigo gukete'ani toba hoto li behe kege hube higo ana nonugati he'milete enugufa yapako hololu lite bi'ahana. ¹⁷ Asaga Yuta bona'i hiti to Giliki bona'i hiti Efeso hepato neminanamagi foipa feleuba enoho'ehibe lite lana ka kehelilete enelesa'ani gofa ligo sipi koli hi'ahana. Ya hilete Sipi Bo Yesuhi gi'a liyafa hite fokehi he'ahana yabe. ¹⁸ Babu bona'i Hu'mamofihi agoya hu emi'ahanamagi ete asaga boana'magihi enubulo lu sibina hila to foipa hapa'ani lu huto huto hi'ahana. ¹⁹ To luga'a bona'magi ana hite nalisa enehelata nehanamagi buku'ani li nupa hite asaga bona'magi enubulo logogu ge'ahana. To asaga logo ge'ahana bukumofihi mina'a li nupa

hite bu gana sipi efahi leka sete 10,000 kina ya'ma huto hu'ehina yabe. ²⁰ Ya'ma hananaguti Sipi Bomofihi kaga'auga amuya mololoto i futili katili huto bula ola huto ule'ale hu'ehina yabe.

Efeso bona'magi Poluhi bunepa i'ahana

²¹ Alihi anana huto hu su holago Polu kapo moloto Masetonia kegi'a buto Gilisi melugu nehetiloto yagati he'mito Yelusale bilube luto ekesa keheli'ehina. Ya'ma melugu bu бага iloto'ni ana huto alihi Lomu kegi'a bilube luto lu'ehina. ²² Ya luto ekesa akeheliloto Timotiu yagi to Elasatu yagi etali ai'i he'mete lili'na neli'ina bole Polu etoho lifigo Masetonia melugu neba'igo ai'a Esia melugu nesi'a kana mino'ehina.

²³ Ya'mana kana'agu luga'a bona'magi Sipi Bomofihi Kapo'amu lite fatehi fi etelete kehe napa ite bati mehi suhi li huto hi'ahana. ²⁴ To bo mone mino'ehina gi'a Temetiliu ai sili-batu'i ana'ina lolo hulata bo yabe. Ai fato fato'na meha'a silibatu lolo huto Atemasihi sefu noha'agu nomalago ana bisinisi'auga lili'na neli etana bona'magi mina'a bati hite li'ahana yabe. ²⁵ Ya hago lili'na bona'a hiti to mone'ago lili'na lilata nehana bona'i Temetiliu kehe i nupa huloto ma luto lu epi'ehina: Ma bose, lali fe'nohati ma lili'naloto huto nohinamofihi lenali be ge'ahabe. ²⁶ Ma bo Polu nohinanamofihi hapa'a lenalitini lenubutu be gelete akehelilata nehabe. Ai silaga bona'i Efeso maga asaga'i nehana hiti to asaga Esia kegi'a bu бага iloto ma luto lu epilata nohibe: Bona'magi enayatu ana'ina meha'a lolo hite komopa'ani emilata

nehanaya faga faga suhi nehabe luto lu epilata nohibe. ²⁷ Poluhi ya'mana ka'auba bisinisi lili'nati li sibina nohuto sipi a'i Atemasihi meha'a lolo hite mele'ahana noha'a boana'magi enubugu fa'menena le'mo lolo hilina'mu yabe. Koyapa'i Esia bona'i hiti to luga'a melugu bona'magi ya'ma a'i meha'amofihi komopa'ani emite minelata hi'ahana yatai Poluhi ka'auba sipi gi'a li sibina hilube'mu nohibe lite li'ahana yabe.

²⁸ Ya luto ligo li gehesa hite minana bona'magi kehelilete lusina huto enitaluga logo bigo kehe sipi ite li'ahana: Efeso bona'magita Atemasi sipi a'mo laliti nohibe lite hapi fi'ahana. ²⁹ Ya hite, kehe napa neigo silaga bona'i ana hep-atoti ho ti бага ite kehe napa ilago bila ela hite Poluhi lalu'afugo hiti kapo melete moneka nebana bole Gaiyasi hiti Alisitaka hiti Masetonia kegi'ati etayato lite hololu lite tutuma'i melete nehanalo bi'ahana. ³⁰ Ya nehago Polu bona'magi folagaha'anigu heleko moloto buto ai'a kaga lu epilube'mu nohigo lalu'agi mebubo lite le'mo mele'ahana. ³¹ To luga'a gamani kaba bona'i ai lalu'agi lolo hite mine'ahanamagi: Kai tumalugu mebubo lite aitoga ka mele'ahana. ³² To li nupa nehana bona'i luga'amagi fato ka lite kehe neigo to luga'amagi fato ka lite kehe neigo hago ana hepalugu kagauba pisili bigo negi nagi ne'ahana. To bona'i mone'amagi enali henabe lite li gehesa nehafi lite keheli bati mehi'ahana. ³³ To Yuta bona'magi mone bomofihi Alekasata gi'a yabe folagaha'anigu le'mo malago binana'mu lite luga'a bona'magi

ai kaga hapa'a nohibe lite fisa i'ahana. Ya hago Alekasatau yaha babeyafa huto kaga'anilo nona'a lu epilube'mu hu'ehina. ³⁴ Ya nohigo asaga bona'magi ai Yuta bo nohigo be gelete moneko kumu koyapa li'ahana kaga lu kululu pa sete aku'i ma lite li'ahana: Efeso bona'magita sipi ati Atemasiu nohibe, lite yatama kana ana kagago luba luba hi'ahana.

³⁵ Alihi Efeso kusi kusi bouba silaga bona'magi kaga'ani i lege'noloto ma luto lu epi'ehina: Lenali Efeso bona'ise. Atemasihi mono noho hepa ma Efeso ni'igo kokulumaluguti sefu efahi limi'ehina malo ni'ibe lite lilata nehanamoya asaga bona'magi akeheli'ahabe. ³⁶ To mone kene'uba ya'mananamofi kumu lu fala mekilina'mu yabe. Ya hu'ehinagi lenali kagatini analo lege'nete lenuluhaya tite ana'ina mone mele'isi li huto mehilo. ³⁷ Lenali ya'ma bo loemo etele'mete e'ahana bomale'i etali ana'inatini gumina felela to lali ana'ina Atemasi lugefati kumu lu sibina hila mehi'aha'ibe. ³⁸ To Temetiliu hiti to ai lili'nalo bo'a hiti bo mone'mofihi ka foya li etalune litemo ka foya lise kana'a fato yupahi kana'alo alanamo ni'ibe. Ya hinogo gamani bona'i nehanago enali ka foya li epelete ka'ani lu bati hu epalalanamo ni'ibe. ³⁹ To lenalitinilo kaga mone'a hiti ni'inogomo tutuma'i melete kaga lilata nehana ana yupapo lu huto hinogo asaga bona'magi ana kaga lu bebe salanamo ni'ibe. ⁴⁰ Yatai yegegu luba hulototi kaga yuhufa fato'i ligo futita'mu yabe. Ya'mananamofihi kaga hapa'a ma'naka luto meni'inalo li nupa hutago mone gamani bouba hena hibe lite li

nupa hi'ahabe luto loloka hatita kaga hapa'a lu emilutana'mu sa sa hutita'mu yabe. ⁴¹ Kusi kusi bouba ya luto kaga lu epiloto ana bona'i enele'mo tili higo bula ola hi'ahana yabe.

20

Polu Masetonia kapogu hiti Giliki kapogu hiti bu'ehina

¹ To ya'ma kaga limito fililago Polu Yesuhi kaga kehelise bona'i kehe igo ago kaga luto enele'mo laga huto'a enebe tigitu enalitogati he'mito bu'ehina. Ai Masetonia kapogu buto ana melugu nehete'ehina. ² Ya'ma kapogu buto Yesu kumu kaga babu luto noepito to enele'mo laga nohuto buto buto'a Giliki kapogu nehete'ehina. ³ Ana kapogu ikahi loebe monebe minoto to alihi botigu tito Silia melugu bilube luto nohigo Yuta bona'magi ai kumu boga lite nehago Polu kehelito i behe huto Masetonia kapogu aku'i bilube luto bu'ehina. ⁴ To ai hiti bi'ahana bona'i Belia hepato bomo, gi'a Sopata, Pilasihi pana'a, ai yagi to Tesalonika hepato bona'i loemo, etigi'atiti Alisitaka yagi Sekatasiu yagi to Tebe hepato bo mone gi'a Gaiyasi hiti to Esia meto bona'i loebe monebe enigi'ani Timotiu yagi Tikiku yagi Tolofimu yagi enaligo yabe. ⁵ Enali kohe tete bite Toloasi hepatoga legeba hite mine'ahana. ⁶ To lali ya'ma fuli yupahi beleti nose'na yisititu lolo mehise nenana ya'ma su hago lali Filipai hepatogati botigu tito buto 5 yegegu bu'ehigo lali Toloasi hepatoga nehetiloto anaga enali nehanalo li nupa hutoti 7 yegegu mino'ohune.

Polu Toloasi hepalugu mino'ehina kana su ho'ehina

⁷ To lali minoto salele yupahi mone yatama nohi ifo hasagu tito li gehesa huto Yesuhi ka'a beto huto beleti nose'na li gofa huto nalube'mu nohuto, Polu li nupa hi'ahanamagihi kaga lamana'a lu epiba lu epiba nohuto yago lenehe'mito bilunagi luto kaga lu noepibe. ⁸ To lali li nupa hu'ohuna hasagu ifo nopogu mino'ohuna. Yanagu libi'i babu luto li kulu ti'ahabe. ⁹ To Polu kaga luba luba nohigo pana'i mone neheya kola gi'a Eutikusi hokolo kapoguluga fito minoto bu kolo kolo huto'a to bu'i kofa huto ana ifo muya loebe monebe hasaguti limo ito felisa'a i gofa hago fili'ehina yabe. Ya higo bona'magi le'mo saga hite fili su habe lite keheli'ahana. ¹⁰ To Polu anaga limito ya'ma pana'mo ifi toto koloto nu ki'ehina. Lenelesatini melino luto mefilise nohibe lu'ehina. ¹¹ To yalo ifo nopogu tito beleti nose'na li gofa huto epito to nose'na noloto kaga luba luba huto minoto go'i ligo bufa hu'ehibe. ¹² To enali ya'ma pana'i mefilise nohigo le'mete komopa'anigu bati higo mine'ahabe.

Polu Toloasi hepatogati he'mito Miletusi hepato bu'ehina

¹³ To Polu melugu mone'a hiti bilube luto no-bigo lali botigu tito kohe toto Asoso hepatoga buto anagati Poluhi lofotula hilune luto bu'ohune. ¹⁴ To Asoso hepatoga nehetito Poluhi le'moto botigu moneko'na buto Mitilini hepatoga nehetune. ¹⁵ To anagati he'mito buto alihi Kiosi hepa'i

lebato'i buto bege ligito buto etehi Semosi hepato neheti'ohune. To eteha'a anagati he'mito buto Efeso hepato bege ligito buto ana yupapogo Miletusi hepato nehetune. ¹⁶ Polu Yelusale hepatoga mono fuli yupapogu ya'ma gi'a Petikosu yupahi yabe ana yupapogu nehetilube luto to Efeso hepatoga buloto Esia kapogu minaluna kana le'mo yatama hilibe luto ligo lali Efeso hepa'mo bege ligito buto Miletusi hepatoga neheti'ohune.

*Polu Efeso hepatoga mono'i olopa bona'mofih
mone kaga lu epi'ehina*

¹⁷⁻¹⁸ To ya'ma Miletusi hepato nohuto Polu bona'i ho lifigo buto Efeso hepatoga Yesuhi kaga'a kehelise nehanamofih olopa bona'i enali'i kehe ito enele'moto ago Polu ma luto lu epi'ehina: Lenali hapa'ni bu gete a'nekehelibe. Nani ya'ma Esia kapogu yata'a o'ohuna kanaguti hapa'ni bu gete nekehelibe. ¹⁹ Nani Sipi Bomofih agoya hu emito lili'na lito minolata napa'a ya'ma hu'ohube. To lenali kumu yibi nohuto lili'na'a lito mino'ohube. To Yuta bona'magi nanimomu'i boga liba liba hite nele'mo sibina nehago mino'ohuna yabe. ²⁰ To kaga lu yege hoto mono nasana'mu lenelepito mone lenehe'malina ka fala mekise lu lepi'ohuna. Ya'ma asaga bona'ni li gehesa nehanogo lu lepilata huto to lenali nohatinigu moneko'na moneko'na nehago lu lepila huto mino'ohuna yabe. ²¹ Nani Yuta bona'i hiti fegutoga bona'i hiti lu epito lipoti epi'ohuna: Lenali foipanatinini he'mite komopa'ani i gelehe hiti Hu'mamofitoga minete Yesu Kilisito Sipi Boti aitoga agoya hu emilo luto lu epi'ohube. ²² To

yatai kehelilo. Hu'mamofihi hetofa Sikalafu'uba amuya moloto noho lifigo Yelusale hepatoga nobube. To anaga buto nehetilenogo hena hi netalabe nani keheli bati menohube. ²³ To ya'ma Sikalafu'uba asaga hepatoga nonehetugo kalabusi naga'i kimilabe luto gabu gilina suhi huto hi ketalabe luto lu nimigo keheli'ohube. ²⁴ Ya luto nolimigo to nani minalufi fililufi luto ya'ma negekesa kehelito nemeha'ni su holenogo bati huto ni'inagi ya'ma Sipi Bo Yesuhi foya'a nimi'ehina Hu'ma lehe'mose'namofihi ka'a hiti ka lamana'a hiti lu yege hoto ya'ma lili'na'nimofihi su holenogo bati hilunagihe.

²⁵ To ka mone hiti lu lepilugi keheli'ehilo. Lenali okaba'ni aku'i be megalabe. Nani lenalitoga bula ola nohuto ya'ma Hu'mamofihi Kapo'a kumu'i lu hokolo hu letoto humofa'na hu'ohuna bomofita okaba'ni alihi be megalabe luto akeheli'ohube. ²⁶ To yatai mone kaga lipoti nolepube. Lenalitogati bona'i moneuba kokulumalugu menehetilenogo nani nugupisa'nilo meminalina'mu yabe. ²⁷ Ya'ma noluto hena'mube? Nani ya'ma Hu'mamofihi lu kehelise nasana asaga'i lu hokolo huto mone'a fala meki'ohuna yabe. ²⁸ To lenali Hetofa Sikalafu'uba kaba bona'i minalabe luto lenele'mo ho ti'ehina bona'i, lenali Hu'mamofihi naga'i kaba hi epalalo. Ai'a golaha'aloti mina fi'ehina bona'i to sipisipi kaba bo suhi huto kaba hi epalalo. ²⁹ Nani lenalitogati bu fa hulenogo foipa bona'i lopi kala tegi nehana bona'i enali lenofolagahatinigu ete ginaga mefilete komopatini le'mo sibina hilabe

luto keheli'ohube. ³⁰ To lenali mone'amagi lenofolagahatiniguti huto hite faga lite Hu'mamofihi kagamo lu sibina sabana hite pana'alobo enali le'malabe lite kagamo lu sibina hite lilabe. ³¹ Ya hilanagi lenali kaba hite minalo. Nani loeyagi moneyagi foya kanagu etehi utehi hiti lenali kumu yibi huba huba nohuto mono kaga lu lenelepi'ohuta yamofihi mehe'mise mino'ohunagi ya'ma lenekesu mehenono.

³² To yatai nani Hu'mau kaba huse'na'a to lehe'mose'namofihi ka'a yanagu lenele'malube luto aitoga molo lepolo'ohube. Ai ka'atu lenele'mo bati bati huto amuya molo lepalalibe. Ya huto ya'ma bebe sose'na'a pana'alobo'amagihina guna mololatana ya'ma lepilina'mu yabe. ³³ To nani mone bomofihi siliba efahifi goli efahifi gukete'afi laga'ni nebesibe luto gili gili huto loka meho'ohuna. ³⁴ To nayaha'nitu ya'ma lili'na li'ohutamofihi mina'atu nose'nati hiti to nalalu'nifihina hiti mina fi'ohuna ya'mana lenali keheli'ahana. ³⁵ Nani ya huto asaga yupahi sipi lili'na lito lenelepi'ohuna ya'ma lali asaga lili'na amuya menehana bona'i he'moto lilata suhi huto minolata ya'ma lenelepi'ohube. Sipi Boti, Yesu ai'a ma lu'ehina: Ana'ina lilata bati mehibe. To ana'ina fato bona'i epilata ya bati huto komopakagu gelo bilana yabe luto lu'ehina. Lali ya'ma ka'a beto huto bati huto nominone.

³⁶ To Polu ya'ma kaga lu su hago enali hiti ai hiti lahupa nohi fite nunumu hi'ahana. ³⁷ To enali yibi gofa hite nu nekite soso hi ete'ahana. ³⁸ Ai okaba'ni aku'i be megalabe lu epi'ehina

yana'mu enipagu gabu'i sipi nogigo le'mete bite
boti heti'ehinaga neheti'ahana yabe.

21

Polu Yelusale hepatoga bu'ehina

¹ To lali ana bona'i enebe tigitito he'mi epoloto
botigu tito buto buto fu lu'ehina kapo molo-
toti Kosu metoga neheti'ohune. To etehi ana-
gati he'mito buto Lote metoga nehetito anagati
buto Patala metoga neheti'ohune. ² Anaga lim-
ito fato boti Fonisia hepato bilina boti sa sa
huto bu goloto ana botigu tito bu'ohuta yabe.
³ Ana botigu buto buto Saipalasi hege nagamilugu
ti'ehina metoga sofo kegi'a ni'igo bu goto bege
ligito buto Silia kapoga buto Taiya hepatoga ne-
heti'ohuna. Fe'nohi anaga botiguti li he'milune
lite nehetibe. ⁴ To lali anaga Yesuhi ka'a kehelise
bona'i sa hutoti enali hiti yegegu 7 ya'ma kana'a
mino'ohune. To enali Hetofa Sikalafu'uba lu
epigo Polu kumu Yelusale hepatoga mebubo lite
amuya melete kaga lu emi'ahabe. ⁵ To ya'ma
li nupa hu'ohunamofihhi kana'a su hago anagati
he'mito buna yupahi enali asaga'i liha'ani hiti
yagapana'ani hiti lele'mete bite to hepa'i he'mite
lele'mete nebago lali asaga'i moneko'na nagami
beletoga kehetoga lahupa nohi fito nunumu
hu'ohune. ⁶ Yalo lali minoloto ai be tigitito ai be
tigitito huto botigu notugo enali aku'i hepa'aniga
bifa hi'ahabe.

⁷ To Taiya hepatogati he'mito buto Tolemesi
hepato nehetito anaga neminana bonati Yesuhi
kaga'a kehelise nehanamagihi enebe tigitoti enali

hiti minoto moneko yegegu ko'ohune. ⁸ Koloto etepo anagati he'mito buto Sisalia hepatoga nehetito kaga lamana'a lu epilata bo, gi'a Filipi yabe, ai'a noha'agu ti'ohune. Ya'mana bo koyapa kanagu Yelusale hepalugu mono bona'magi ai'a hiti to lalu'afu 6 enali hiti enele'mo ho ti'ahana. ⁹ Ai pa'a yafana'i loebe loebe ana hite Hu'mamofihi kaga'a lu yege hose nehana enali anaga mine'ahabe. ¹⁰ To lali ana bomofihi hepalugu loe yupahi nominogo huto huto bo moneuba gi'a Agabasi Yutia kapoguti o'ehina. ¹¹ Ai lalitoga oto Poluhi leti'a liloto ai'a yaha gigusa'asi ana letitu sa nogito ma noluto lu'ehina: Hetofa Sikalafu'uba ma nolibe, Yelusale hepatoga neminana Yuta bona'magi ya'ma letimofihi afo'afumo ya'ma hiti sa gi ule'ale hilete naga'i ite fegutoga bonatoga le'mete bilabe. ¹² Ya ligo lali hiti to ana hepato bona'i asaga'i ya'ma kehelite Poluhi amuya melete buka tite Yelusale hepatoga mebubo lu'ohune. ¹³ To Polu ma luto lu limi'ehina: Lenali henabe lite yibi gofa nehite nipa'nigu nagabu'i gito le'mo sibina nehabe? Nani Sipi Bomo Yesu kumu Yelusale hepatoga naga'i nimilafi noho fililafi nani ya'mana bati huto yabe luto nokehelube. ¹⁴ Ya luto ligo lali kaga lu emuta ya huto amuya nomalago o'e luto mekeheligo lali he'mito: Ana Sipi Boti molo'ehina'a huto huto hino, luto lu emi'ohuta yabe.

¹⁵ Ana hepato kana mone'a minototi lali fe'nohati li nupa huto anagati he'mito kapogu moloto Yelusale hepatoga bu'ohune. ¹⁶ To Yesuhi pana'alobo mone'amagi Sisalia hepa'i bona'i

enali hiti lali hiti bu'ohune. Enali lele'mete bilete Saipalasi kegi'ati o'ehina bo, gi'a Masoni ai'a noha'agu kalabe lite ai koyapa'i hapi fi'ehinaguti Yesuhi mege'i molo'ehina bo, ai nopogu bu'ohuna.

Polu Yemesihi fo tula hu'ehina

¹⁷ Yelusale hepato nehetugo anaga nemina bonatimagi lebe tigite soso hi lete'ahana. ¹⁸ Kolototi etehi Polu hiti Yemesiu nohinaga bu'ohune. To mono bona'i olopa enali hiti analo mine'ahana. ¹⁹ Polu enebe tigitota kaga'a asaga'i lu epito ya'ma Hu'mau fegutoga bona'i hetofa hu epolo'ehina'a ya'ma Poluhi foya'a li'ehina'mu asaga'na yamofihi kaga lu epi'ehina yabe. ²⁰ Enali asaga'i ya'ma kehelilete Hu'mamofihi fokehi li'ahabe. To Poluhi kaga ma lu emi'ahabe: Lalalutiga, kehelibo. Ya'ma Yuta bona'magi samahi tite Yesuhi naga'i lolo hi'ahabe. To enali koyapa keya kamu'i amuya melete ule'ale hite mege'i melelata nehabe. ²¹ Fato bona'magi kai kumu ma nelabe: Kai fegutoga bona'magihi hepatoga neminana Yuta bona'momu'i Mosehi mono'i keya ka lu'ehina'a he'mito lu'ahane lite nelabe. Kai panatini Hu'mamofihi keya'a suhi huto enugufa laga mehilo to Yuta bona'magihi hapa'ani he'milo luto lu'ahane lite nelabe. Enali ya nelago maga nehana Yuta bona'i akeheli'ahana yabe. ²² To kai yatai maga o'ahatamo enali kehelilanagi hena hilane? ²³ Lali lu kimiluta'a hubo. Mafi. Lalitoga bomagi loeyagi loeyagi Hu'mamofihi gi'a hoto kaga melete oka'ani laga mehi'ahabe.

24 Kai enalitoga buloto hepiletogo moneko'na hite mono nonugu tite Yuta bona'mofihi kuguhi go epi'ehilana komopa'ani le'mo bati hilata suhi hite enali oka'ani laga hilabe luto salamana galana'ani mina fi etobo. Ya huletogo asaga bona'i kehelilete kai kumu faga li'ahana lite ai Polu ya'ma Mosehi keya ka mege'i nomalabe lite kehelilabe. ²⁵ To ya'ma fegutoga bona'i Yesuhi ka'a mege'i nemalana bona'magi kumu lali fayahi goloto ma ka moloto alu epi'ohune. Lenali kuguhi go epi'ehilana yagamo ya'ma fele hitalo mele'ahana'a ya'ma menalo. To golapo menalo. To lubaha'a li polo hu fili'ehina yaga menalo. To moko mehite kaba hilo. Ya'ma ka asaga'i fayahi goto alu epi'ohuna yabe. ²⁶ Enali ya lago Polu etehi ana loebe loebe bona'i enele'moto buto kuguhi go epi'ehinamofihi nasana ya'ma li'ehina. Ya huloto sipi mono nonugu tito ya'ma kuguhi go epi'ehilanamofihi su halina kana'a ya'ma bona'mofihi kuguhi moneko moneko'isi epila Polu lu epi'ehina.

Sipi mono bona'i Poluhi naga'i emi'ahana

²⁷ To ana kanagu 7 yege yupahi su halube'mu nohigo, Yuta bona'magi Esia kapoguti e'ahana enali Poluhi sipi mono nonugu nohigo be gelete asaga li gehesa he'ahana boana'magihi kenasabo bi epelete Poluhi nu nekite kehe ite ma labe: ²⁸ Oho, Isilaeli bona'ise. Mele'isi ete lehe'malo. Ya'ma bouba asaga hepato bona'i enele'mo keheli sibina hulata bo yabe. Lali Yuta bona'i lemege ka luto to lali mono'i he'mito fato ka lu yege hoto to mana sipi mono nohatimomu'i

sibi ka lu epito nohina bo yabe. To ai lu laga hu'ohuta suhi huto mana sipi mono nohatigu fegutoga bona'i enele'moto tito ya'ma nopo le'mo foipa hibe. ²⁹ Enali Polu Efeso hepa'i bo mone gi'a Tolofimu ai hiti tauniga nohi hepalugu neha'igo be ge'ehite enegekesa kehelite Polu ana bomo sipi mono nonugu le'moto ti'ehifiye? lite kehelite ya li'ahana. ³⁰ Ya nelago ana olopa hepato bona'i asaga'i kehelite hololu lite li nupa hite Poluhi nu kite le'mete mono nonuguti kefefe hite limilago mele'isi ya'ma sipi mono nohi kafe gi'ahabe. ³¹ To enali Poluhi ho fililune'mu nehago Lomu gimi bomagihi kaba'ani bo Yelusale hepatoga sipi luba nehabe lite lu emigo keheli'ehina. ³² Kehelito ana'asi ai gimi bo luga'a hiti to kaba'animagi hiti enele'moto hololu luto li gehesa nehanalo enele'mago enali hololu lite li gehesa nehanalo limite neheta'ahana. To boana'magi ya'ma gimi bomagihi kaba'ani bo hiti to ai'a gimi bo'a hiti be gelete Poluhi osahi halune'mu hanamo he'mite fa'mene mine'ahana. ³³ To gimi bomagihi kaba'aniuba buto Poluhi naga'i emito seni naga'i loemotu sa gibo luto gimi bona'magihi lu epito le'mo'ehibe. To boana'magihi ma luto enoloka habe: Ya'ma bo ki'afube? To hena hu'ehibe? luto enoloka ho'ehina. ³⁴ Enoloka hago enalitogati moneuba ai fato ka ligo ai fato ka ligo nehite enubugu fite lubamofihi hapa'a mekehelise nohuto gimi bona amuya nopogu le'mete bilo luto bona'a ya lu epi'ehina. ³⁵⁻³⁶ Enali le'mete bite to nohi haka tilune'mu nehago asaga bona'i enemege'i bite ho fililo lite enipakafa nehite hekele lite neligo yana'mu gimi bomagi Poluhi nu nekite

le'mo saga hite bi'ahabe.

Polu luba hilune'mu nehana'amagihi kaga lu epi'ehina

³⁷ To ana gimi bomagihi amuya nopogu le'mete tilune'mu nehago Polu ya'ma kaba bomo ma luto lu emi'ehina: Nani ka mone lu kimiluna bati hifiye? Ya ligo kaba bouba loka ho'ehina: Giliki ka keheli'ahapihe? ³⁸ Kai ya'ma Iyipi bo nohapihe? Ya'ma Iyipi bo gimi bo'a 4,000 ka hepatoga enele'moto buto gamanimagihi luba hilune'mu nehite enele'moto bu'ehina bo kai ya'ma nohapihe? ³⁹ To Polu ma luto lu emi'ehina: Nani Yuta bo Silisia kapogu Tasasi hepato olopa nohi hepato yanugu ito'nifu neketo'ehina. Nani ya'ma li gehesa nehana'amagihi kaga lu epiluna bati huto ni'ifihe? ⁴⁰ Gimi bomagihi kaba bo: Alubo luto, ligo Polu hakalo minoto yaha'a li saga higo to enali kaga lege'nago ai Hibulu nogoguti ma luloto lu epi'ehina:

22

¹ Lenali afo'nigi nogona'nigi nalalu'nigitase. Kaga'nimofihi hapa'a lu lepilunagi keheli'ehilo.

² Polu ya luto ya'ma Yuta bona'mofihi nogoguti lu noepigo enali ka mone hiti melise mine'ahabe. To ai ma luto lu epi'ehina:

³ Nani Yuta bona'i nohube. Meya Silisia kapogu Tasasi hepatoga ito'nifu analo'i neketo'ehina. Yalo ma Yelusale hepatoga nele'mete ago sukulu tito to ya'ma babafi bo gi'a Gamelieli nelepito minago ya'ma tatatigihi mono'i keya ka'ani kehe-liya ito ya'ma hapa'agu keheli amuya huto hofa to'ohuna yabe. To lenali yatai hi'ahana suhi huto

nani ana huto hulata minoto Hu'mamofitoga amuya moloto mino'ohuna. ⁴ Nani ya'ma Yesuhi kapogu mele'ahana'amagihi enegene mane huto enoho'ohube. Yana bona'mo hiti ana'mo hiti naga'i epito kalabusi nonugu enele'moto fitu fo'ohuna. ⁵ Ya'ma mamufa gilata bo, sipi bo to mono kanisole bona'i hiti enali asaga'i ya'ma hapa'ni koyapa ya huto ni'igo ma'naka nolibe keheli'ahabe. Enali fayahi keye'ahanana nimiloto noho lifilago buto Tamasiko hepato buto Yuta lalu'anifihi epiloto ana hepato Yesuhi kaga kehelise bona'i naga'i epito seni naga'i sa gi epoloto Yelusale hepato enele'moto oto osahi epilabe luto bu'ohuna yabe.

Polu komopa'a i gelehe hu'ehina ka lu epi'ehina

⁶ To yana kana'a kapo moloto nobuto Tamasiko hepato enehetilube'mu nohugo fuligaha'agu kokulugaluguti mone fanahuba nanitoga besa besa lo'ehina. ⁷⁻⁸ Ya nolago nani melugu limito nokago nogo'a moneuba lu nimi'ehina: Solio, Solio. Kai henabe luto nohoba nohoba nohane? luto ligo kehelito'ni: Kibina bo'nimaka kiyi'agabe? loka hago: Nani Nasaleta bo, Yesu nohube. Noholatanamoya nohube, luto lu'ehina. ⁹ To enali nani hiti bu'ohuta bona'magi ya'ma fana besa lo'ehinana be gete to ka lu nimi'ehina nogo'amofihi mekeheli'ahabe. ¹⁰ To nani loka ho'ehina: Kibina bo'nio, nani hena hilube, lugo Sipi Bouba lu nimi'ehina: Ho tito Tamasiko nohi hepalogu tiletogo kaika hilatanamofihi Hu'mau kaga molo keto'ehina'a asaga'i lu hokolo hu ketalabe. ¹¹ To nani ya'ma fana tose'auga

nubugu figo bu pisi ligo nohugo nalalu'nifu enali nayahi lite nele'mete bago Tamasiko hepatoga neheti'ohune.

¹² To bo mone mono'i mege'i malalata bomo, ai'a gi'a Ananiasi yabe ai kumu asaga Yuta bona'magi fokehi nelina bo ai anaga mino'ehina.

¹³ To ai oto nanitoga lebato ho tito minoloto lu'ehina: Solio, nalalu'niga kubu bati hino, ligo nani ana'asi bu go bati huto aimo bu go'ohuna.

¹⁴ To ai ma lu nimi'ehina: Hu'mau, tatatigihi kibinauba kaikamo kele'mo ho tibe. Kai ka'a kehelito mege'i malalane luto to ai'a hetofa agoya hu emi'ehina bo Yesuhi bu goloto to ai baga'aluguti nogo'a kehelilane luto kele'mo ho ti'ehina yabe.

¹⁵ To ya'ma bo kumu bu go'ahata hiti keheli'ahata hiti asaga'na kai tili tele huto buloto yege yege bona'i yanana lu epilane luto ai molo'ehibe. ¹⁶ To yatai hena'mu geba huto nominane? Ho tito buto Yesuhi gi'alo holoto foipanaka he'mito nagami'i folobo.

Polu ka lamana'a fegutoga bona'i lu yege hose'na'amofihi Hu'mau ka molo'ehina

¹⁷⁻¹⁸ To yalo nani Yelusale hepatoga aku'i oloto sipi mono nonugu tito nunumu huto bamu'i bu nogoto Yesu kaga lu nonimigo bu go'ohube. Nubu bu go saga hugo ma lu nimi'ehina: Kai me'me huto Yelusale hepatogati he'mito bufa hubo. Ya'ma hepato bona'i nani kumu kaga lu yege hose'na'a keheli he'milanagihe. ¹⁹ Ya luto ligo nani ma luto lu emi'ohube: Kibina Bo'nise, koyapa nani asaga fato fato mono nonugu tito agoya hu kimi'ahanamagihi enele'moto naga'i epito to segi osahi epito mino'ohuna ya'ma enali keheli

bati hi'ahana. ²⁰ To kai kumu kaga lu epise bo, Sitifeni efa kosatu afili'ahana halune'mu nehago nani yanaga minoto halana bomofihi kata'ani kaba huto to golahi limito filifa hu'ehina'a bati suhi nehabe luloto mino'ohuna ya'ma enali keheli'ahabe. ²¹ To ya lu emugo ai: Mana hepatogati he'mito bufa hubo. Nani fegutoga bona'iloga fato'i koho lifilube'mu nohube, luto Sipi Bo ya lu nimi'ehina yabe.

²² Polu ya luto beto hu epologo kehelite mine'ahabe. To ai ya'ma fegutoga bona'magi kumu ka noligo ana'asi enali nogo sipi melete ma li'ahana: Ana bomo ho filibo. Metoga mefilise minalina bati mehibe. Ho filibo. ²³ To enali ya lite yafege gete sipi nogo melete enipakafa hite kata'ani li botala ite he'mite mumusopa getete ifo muya he'milago nebite nehago, ²⁴ Lomu gimi bona'magihi kaba'aniuba bona'a lu epi'ehina: Poluhi ule'ale nonugu le'mete tilo. Segi osahi emilenogo ya'ma Yuta bona'magi ai kumu hekele lilata ho filibo litemofihi lu hokolo hu letalibe luto lu'ehina. ²⁵ Ya luto lu epigo gimi bomagi le'mete bite nonugu tite sa gi etago Polu mone kaba bo yanugu ho ti'ehinamofihi loka ho'ehina: Nani Lomu bona'i nohunagi foipana'ni ni'ifi meni'ibe henabe ka foya meli'ahago osahi nimilatagihe? ²⁶⁻²⁷ Ya ligo ana kaba bouba ya'ma ka kehelito buto sipi kaba bo'a nohinalo lu emi'ehina: Ya'ma bo Lomu bo nohinagi kai hena hu etalube'mu nohane? ya ligo ana sipi kaba bouba Polu nohinaga buto ma loka ho'ehina: Kai lu nimibo. Kai Lomu bona'i nohapihe? O'yo luto Polu lu'ehina. ²⁸ Ke, nani ya'ma sipi eapoloti he'mito Lomu

bona'i lolo hu'ohuna'a mina fi'ohube luto ligo Polu ka'alo nona'a lu emi'ehina: Nani ya'ma Lomu bona'i nekete'ahana yabe. ²⁹ Ya luto noligo osahi emilune'mu nehana bona'magi mele'isi aitogati he'mite topa he'ahana. To ya'ma sipi kaba bouba Poluhi seni nagatu sa gi'ehinagi to ai'a Lomu bo nohube lu'ehinagi yana'mu kehelito koli hu'ehibe.

Polu kanisole bo enubulo kaga Yuta bona'i lu hokolo hu epi'ehina

³⁰ Ya'ma gimi bona'magihhi kaba bouba Yuta bona'magi Polu kumu henana fisa i'ahanamofihi hapa'a kehelilube'mu nohuto eteka'a Poluhi seni naga'i gi'ahana'a li he'milo luto bona'a lu epigo li he'mi'ahana. Yalo'i ya'ma kaba bouba sipi mono noto kaba bona'i hiti to mono kanisole bona'i hiti li nupa hilete minalo luto kaga molo'ehina. Ya hago ai Poluhi le'moto buto enogobisalo ho tilube'mu he'mi eto'ehina.

23

¹ Polu kanisolemagi enubugu bu go fiya i'ohuto ma luto lu epi'ehina: Nalalu'nimagita. Nani ana'ina mone li sibina mehuse Hu'mamofihi bu'alo kapo molomofa'na huto nugufa'nigu laga higo minomo tito tito yatai hiti ana nohube.

² Ya luto noligo sipi mono noto kaba bo Ananiasi ai Poluhi bufalo nehana bona'i kaga nolina бага i gofa halo luto lu epi'ehina. ³ Ya ligo Polu lu emi'ehina: Kai helegu'i gupisa'alo fayahi ge'ahana suhi huto nohane. Hu'mau kai kabaga i gofa halinamo ni'ibe. Kai yalo nohuto keya kauba lu'ehina'a huto nani'i kaga'ni loko

nohataya ana keya ka kaika li gofa nani'i nahalo luto enogo'na nobine. ⁴ Ya noligo Poluhi metoga nehana bona'magi ma lite lu emi'ahana: Kai Hu'mamofihi sipi mono bo'amofihi ka bati mehina'a lu eto'ahane. ⁵ Polu ka'anilo nona'a lu'ehina: Nalalu'nigita ai sipi mono bo nohibe luto nani mekeheli'ohube. Mono kauba ma luto lulata nohina: Kai bonakamagi kaba bo'animofihi kaga foipa'a melu etobo.

⁶ To luga'a kanisole bo Satusi yagi to luga'a kanisole Felosi yagi hite Polu bu enogoloto ai kehe ito ma luto lu epi'ehina: Nalalu'nigita. Nani afo'nifu Felosi bo nohigo nani'ni hiti ana huto Felosi bo nohube. Nani bona'i fililete aku'i ho tilana kaga'a lu noepuna ana kagamuli lite lenali yatai ka foya neli netabe. ⁷ Ai ya luto lulago ana'asilo mele'isi Felosi bona'i hiti to Satusi bona'i hiti kenasabo bi lumala hilete loko hi'ahana. ⁸ Hena'mugope Satusi bona'magi bona'i fili'ahanaguti aku'i ho metilabe nelite to agelo hiti fele hite menehabe nelago to Felosi bona'magi yanana ni'ibe lite kehelilata nehana'mu yabe. ⁹ Enali akehelilete kehe kehe inanauba sipi higo kenasabo bigo keya ka enelepise bo Felosi nagaluguti luga'a ho tilete ka epekite ma lite li'ahana: Lali ma bouba ana'ina mone li sibina hu'ehinamofihi kaga hapa'a mekehelune.

¹⁰ Kenasabo binanauba napa huloto luba huse huse hago gimi bomagihi kaba'aniuba Poluhi yahi luga luga lite li gepe hilana'mu yabe luto keheli'ehina. Ai ya huloto gimi bo'a bona folagaha'aniguti limite Poluhi le'mo saga hite gimi

bomagihi ule'ale noha'anigu le'mete bite malalabe luto enoho lifi'ehina.

¹¹ Ana folugu'i Sipi Bouba Poluhi metoga ho tito nohuto ma luto lu emi'ehina: Kai koli mehuto amuya kekesa molobo. To koyapa'i ma Yelusale hepato nani kumu kaga amuya moloto lu epi'ahata suhi Lomu hepato buto ana huloto lu epibo.

Poluhi ho fililune lite Yuta bona'magi ka lu keheli'ahana

¹² Eteka'a Yuta bona'i li nupa hite ka lu keheli'ahana. Ya hite nehite, nose'na mo sito minoto Poluhi ho fililototi nalune lite enogolagalo enayahi til'ahana. ¹³ Ya'mana kaga lu kehelina bona'i li nupa huto 40 magihi yabe. ¹⁴ Ya lilete enali mono noto kaba bo hiti olopa bona'i hiti nehanalo bite ma lite lu epi'ahana: Lali nose'na mo sito nohuto Poluhi ho fililotigo yabe luto logolagalo layahi ti бага iloto noone. ¹⁵ Ya nohutagi yatai lenali hiti kanisole bona'i hiti Poluhi le'mete limite limilo lite Lomu gamani bomofitoga kaga malalo. To ai oloto kaga hapa'a aku'i lu bati huto lu limiliba lite mi'i malalo. Lali kofohi moloto kapogu gimi gi'ohuto ho fililuta'mu yabe.

¹⁶ Ya lite nelago Poluhi etali'afihi pana'aua akeheliloto gimi bomagihi ule'ale nonugu buto Poluhi lu emi'ehina. ¹⁷ Ya ligo Polu gimi bo mone kehe ito ma luto lu emi'ehina: Ma neheya kola pana'aua kaga mone lito o'ehinagi kai le'moto buto gimi bomagihi kaba'animofihi emitogo ana kaga lu emiliba. ¹⁸ Ya luto ligo ana gimi bouba ana pana'i le'moto buto gimi bomagihi kaba'ani nohinalo ho tiloto lu emi'ehina: Ma pana'aua kaga

kai'i lu kimilibe luto Polu nagalugu nohina bouba nani'i noloka hago le'moto noobe. ¹⁹ Ana kaba bouba ana pana'i yato lito le'mo sugunaluga bu-loto loka ho'ehina: Kai hena ka lu nimilube'mu o'ahane? ²⁰ Ya ligo neheya kola pana'uba lu emi'ehina: Enali Yuta bona'magi kai'i ete koloka hete Poluhi le'mete kanisole bonatoga limilune lite li'ahabe. To kanisolemagi Polu lu'ehina hapa'a mone'a hiti keheli bati hilune nelabe lite ete gimi'i malalune li'ahabe. ²¹ Ya li'ahanagi kai ka'anilo mekehelibo. Hena'mugope? Ai'i ho fililune lite luga'a bona'i 40 magihi kapogu kofohi moloto gimi gilune li'ahabe. To enali yatai kai o'yo lilapi lite kegeba hite ka lilata ka kehelilune'mu nehabe. ²² Ya luto ligo gimi bo kaba'aniuba ana pana'i ma luto amuya kaga lu emito ekesa bito ho lifi'ehina: Ya'mana kaga nani oto lu huto hu emi'ohube luto mone bomofihi lu meemibo.

Gamani bo Felikiu to Poluhi le'mete bi'ahana

²³ Ya huloto gimi bomaghihi kaba'aniuba loe gimi bole kehe iloto ma luto lu etimi'ehina: Gimi bo 200 yamagi enele'mo loloba nehite hosi yaga gupisalo bo 70 yamagi neenele'mete to hiso bo 200 yamagi enele'mete utahi sininugu Sisalia hepato bilabe. ²⁴ Lenali Polu minoto bilina hosi yaga luga'a neli etete kaba hu bati hi etete le'mo bati hite sipi gamani bo Felikitoga le'mete bilo. ²⁵ Yana bouba fayahi mone ma luto ka go bu'ehina:

²⁶ Gamani bo Felikio. Nohapihe? Nani Kolotiasiu Lisiasiu ya'ma fayahi nogo ketobe.

²⁷ Enali Yuta bona'magi mana bo yato lilete ho

fililune'mu nehana nani ai ka'a keheli'ohuna ai Lomu bo nohigo nani hiti gimi bo luga'a hiti olo-toti le'mo buto bi'ohune. ²⁸ Enali henabe lite fisa nei etafi luto nani kehelilube'mu ana bo le'moto enali kanisole'anilo limi'ohube. ²⁹ To ai ana bouba ho filise'nafi nagalugu le'mo molose suhi huto ana'ina mone li sibina mehu'ehigo nani bu go'ohube. Enali Yuta bona'i keya ka'anilo kaga li sibina hu'ehibe lite fisa ite lokasigo he'ahabe. ³⁰ Enali ya'mana bo ho fililune lite suguna kaga mone li'ahana yatai huto nohigo keheliloto'ni kaitoga mele'isi ho nofulube. To enali fisa neina bona'magi kai kubuloko lu huto hite yana'mu luto fisa noune lite lu kiminogo kehelilane.

³¹ Ya luto fayahi go epina hiti gimi bomagi lilete ka'a liyafa hite Poluhi le'mete folugu'i Atipatili hepato bi'ahana. ³² Eteka'a melugu kapo malana gimi bomagi aku'i i behe hite kapoguti neago hosi yaga gupisalo minete bana bomagi le'mete moneka hepato bi'ahana. ³³ Enali Poluhi Sisalia hepato le'mete bilete ai hiti faya hiti gamani bomofihhi emi'ahana. ³⁴ To gamani bouba ana fayahi leka soloto: Kai hiya kegi'a bo nohane luto Poluhi loka ho'ehina. Ya higo: Nani Silisia bo nohube luto Polu lu emi'ehina. ³⁵ Ya ligo gamani bouba lu emi'ehina: Enali kifisa neina bona'i henetilenogo kai kagaka kehelilube. Ya luto luloto Helotihhi gamani nonugu nagalugu he'mi etete gimi bomagi kaba hu etalo lu'ehina yabe.

24

Yuta bo olopa'amagi Poluhi fisa i'ahana

¹ To nayahi mone kegi'a su hago kana minelete sipi mono noto kaba bo Ananiasi yagi Yuta olopa bona'i luga'a hiti to enali kaga'ani li nupa huto lulata nohina bo gi'a Tetalasi hiti Sisalia hepato bi'ahana. Ya hilete Poluhi fisa ite ka foya li etalune'mu hana kaga sipi gamani bo Felikihi bulo henetite lu emi'ahana. ² Ya hilago sipi gamani bouba Poluhi kehe igo aolago Tetalasiu ma luto hapi fito fisa i'ehina: Nigihiti bo, Felikio. Kai hetofana huto kaba hu letanogo luba mehuse fulunaguti nominota yabe. Kai bati huto keke-sagu fe lina bomaka asaga'na koyapa'i metigu sibina hu'ehinamofihi lali nagatimagihi le'mo bati hilo luto lu epi'ahata yabe. ³ Ya'mu luto lali komopatigu laga gofa nolebesigo kaitoga lusina huto kofokehi holata nohune. ⁴ Ya hu'ehina yatama kana kele'mo molo lalugi kai kiginaga fi limito hupamone kagati kehelilane luto koloka nohone. ⁵ Lali ya'ma bo bu gota ai kegeiyo bo nohibe. Ai asaga kapoga hepato hepato Yuta bona'i hiti kenasabo bi enohomofa'na huto ka noepekina bo nohibe. To ai Nasalene naga'mofihi kaba bo'a nohibe. ⁶ Ai huto mono nohati sipi'a li kolo talube'mu nohigo yato li'ohune. To laliti keya katimofihi mege'i moloto ka foya li etalune'mu hu'ohune. ⁷ Ya nohunogo gimbo kaba'ani Lisiasiu oto amuya moloto layanuguti lebesilito le'mo buto bi'ehibe. ⁸ To enali ka foya li etalune lilana bona'i kai kubulo ete lilabe lu'ehibe. To kaika ya'mana bo loka holotoka asaga kaga lali fisa noutamofihi kehelilane ya luto Tetalasiu lu'ehina. ⁹ To Yuta bona'magi hiti anagu heleke melete Tetalasihi he'mete Poluhi fisa ite

ma lite li'ahana: Asaga kaga ma'naka luto nolibe.

Polu Felikihi bulo kaga lu hokolo hu'ehina

¹⁰ To sipi gamani bouba Poluhi kaga lilibe luto bugu egago Polu ma luto ka'anilo nana'a lu'ehina: Kai babu kufu minoto ma meto bona'magi ka'ani loko hulata nohata bomaka lubuto nani kaga'ni negelonaguti lu hokolo hilube'mu nohube. ¹¹ Kai enoloka hatita kaga ma luto kehelitita'mu yabe. Nani yata'isi nayahi luga luga su hoto nigigusagati loemo heleko malago kana ma'asi su hago Yelusale hepatoga tito Hu'mamofihia agoya hu emilube'mu nohugo kehelilane. ¹² To nani Yuta bona'i hiti enali sipi mono nonugu kenasabo bi enohola to bona'i kaga li nupa hite lu keheli fa keheli hite hepalugufi to mono nonugu nehago enubunepa nougo enali bu menege'ahabe. ¹³ To enali yatai ya'mana kaga nifisa neina ka hapa'a mone lu hokolo hite ya kamu'i fisa noune lite lu mekimilana'mu yabe. ¹⁴ Ya hu'ehina ya'mana ka nani lu huto huto lu kimilube. Enali faga lite nifisa neina Kapolo mege'i moloto'ni tatatigi Hu'ma'anifu agoya hu noemuna yabe. To nani ana huto Mosehi keya kagu ge'ahana hiti to kaga lu yege holata bomagi bukugu ge'ahana kaga hiti silaga'na keheli mana nohuna yabe. ¹⁵ To Hu'mau ana'ina mone li huto hilube lu'ehinamofihia enali'ani geba hite nehago nani ana huto keheli komopa'nigu molo'ohuto geba nohube. To bona'i sibina'afi to mana'afi fili'ahanagati Hu'mau aku'i enele'mo ho tilina'mu ya'ma geba nohube. ¹⁶ Ya'mu luto asaga yupahi Hu'mamofihia bulofi to boana'magi

enubulofi foipana mone li huto hu lalugi luto komopa'ni bati suhi huto minalube'mu keheli amuya moloto minolata nohuna.

¹⁷ To nani Yelusale hepatoti he'mito buto fato hepatoga kufu kana nominonati aku anaga moni efahi lito buto nani bona'ni epila to kuguhi gola hilube'mu bu'ohuna. ¹⁸ Ya hilube'mu nohuto keya kauba lu'ehinamofihī mege'i moloto nani nugufa'ni okala hilube luto sipi mono nonugu tito nohugo enali be nege'ahana. To babu boana'i nani hiti moneka meminago to luga'a bona'magi luba kaga meli'ahana. ¹⁹ To ya hina luga'a Yuta bona'i Esia kegi'ati ete nayato li'ahana. To enali ya'mana bomagi enalitoga kaga mone ni'igo nifisa ite nayato li'ehitemo kai kubulo malo ete ka foya li netalabe. ²⁰ To enali mehi'ehinogomo ma nehana bomagi koyapa'i nani kanisole enubulo nele'mo ho tigo foipana li'ohunamofihī lu huto hugo keheli'ehitemo lu kimilabe. ²¹ Nani nekesa nokeheluna koyapa'i folagaha'anigu ho ti'ohuto kaga mone'isi ma luto kehe i'ohube: Fili'ahana bona'i Hu'mau aku'i enele'mo ho tilina'mu yabe luto'ni lu'ohuna. Ya'mana kaga hapa'amu kehelito li pili ko'ohunana'mu lenali lenubulo nifisa neibe luto yana kaga nani lu epi'ohube luto Polu lu'ehina yabe.

²² Ya ligo Felikiu ka lamana'a hapa'a bona'magi Yesuhi kapo'agu melete minela nehana hapa'ani keheli bati hu'ehina'a ai kaga lu laga huloto ma lu'ehina: Anasi yabe. Alihi gimi bomagihī kaba'ani Lisiasiu olenogo lenali kagatini lu niminogo loko hilube. ²³ To Felikiu gimi bo mone'mofihī Poluhi nagalugu le'moto buto

he'mi eto'ohuto luga'a kanagu fegutoga le'mo he'mitogo yegelota nohinogo lalu'agi nose'nafi guketefi he'mete emilune'mu nehinogomo kai o'e luto laga mehu epolobo luto Felikiu lu emi'ehina yabe.

Felikiu Poluhi naga nonugu kufu loe kana he'mi eto'ehina

²⁴ Luga'a kana bulago Felikiu liha'a Tulusilau Yuta nagalugu a'i hiti le'moto o'ehina. To Felikiu Poluhi kehe igo ago Yesu Kilisitotoga agoya hu emito minose'namofihi kaga ligo keheli keheli huto mino'ehina. ²⁵ Ya hu'ehina Poluhi kagauba bati huto minosemofihi hapa'afi to bona'i enali'ani enugufa'ani kaba hu bati husemofi to alihi Hu'mau ka foya li letalinamofihi kana'amu lu emi'ehina. Ya ligo Felikihi lesa'a ligo Poluhi lu emi'ehina: Kai bufa hubo. Nani aku'i mone yupahi kehe ilunagi buto nohubo. ²⁶ Ana kana'alo ekesa kehelito Polu efahi luga'a nonimitogo'ni gulu ho etalube luto ligo ya'mu asaga yupahi kehe igo ago etali kaga lilata hi'aha'ina yabe.

²⁷ To ya'ma bo, Felikiu ai Yuta bona'magi nani kumu laga lebesina bo nohibe lilabe ya luto enalitoga mololoto Poluhi naga nonugu he'mi etago mino'ehina. Yalo loe kufu kana'a bulago Felikiu ana hepa'mofihi kaba huse lili'na he'mito buto ana gamani lili'na mone lilube'mu bu'ehina. Yalo'i fato kaba bo mone'mofihi gi'a Posiasi Fesitasiu ya'ma Sisalia hepato nehetito mino'ehina.

25

*Sisau Lomu kibina bouba ka'ni kehelilibe luto
Polu kehe i'ehina*

¹ Analo Fesitasiu loegi monegi yupahi mino koloto alihi Yelusale hepatoga bu'ehina yabe.

² Ya higo analo mono noto kaba bona'i hiti to Yuta olopa bona'i hiti aitoga bite Polu kumu amuya melete fisa ite ma lite Fesitasihi buka tite lu emi'ahana: ³ Kai bati huto lehe'moto Poluhi ho lifitogo Yelusale hepatoga eno. To hena'mugope, enali kapoga kofohi melete gimi gi'ehite ho fililune'mu nehite yabe. ⁴ To Fesitasiu ka'anilo nona'a lu epi'ehina: Polu nagalugu Sisalia nohinagi nani hupamone kanasi nohuto anaga biluna'mu yabe. ⁵ Ya hiluna'mu yagi olopa botini enele'mo he'minogo nani hiti limite ana bouba ana'ina mone li sibina hu'ehifi fisa ilabe.

⁶ Fesitasiu luga'a kana nesi'a enali hiti minoloto Sisalia bu'ehina. Eteka'a ka foya lilata nonugu tito minoloto Poluhi le'mete tilo luto enoho lifi'ehina. ⁷ Ya higo Poluhi le'mete tilago Yuta bona'i Yelusale hepatoti limi'ahanamagi le'mo bego hilete kaga fato fato'i lu etete fisa i'ahana to ka hapa'a mone ya kaga'mu yabe lite lu hokolo mehi'ahana. ⁸ Ya hago Polu gufa'a li buto bito ka'anilo nona'a ma luto lu epi'ehina: Nani Yuta bona'magi Keya ka'ani li gofa hola to sipi mono nohi li sibina hula to Lomu sipi gamanimofhi kaga lu sibina hula mehu'ohube luto lu'ehina. ⁹ Ya ligo Fesitasiu Yuta bona'magi bati bo yabe lite nofokehi halabe luto ekesa keheliloto enalitoga moloto Poluhi loka ho'ehina: Ya'ma kifisa neina kaga Yelusale hepato me'animoya anaga

tito nani nubulo ho titogo ka foya li ketalabe luto nokeheli pihe? ¹⁰ Ya luto loka hago Polu ka'alo nona'a lu emi'ehina: Nani nifisa ise hepali ni'inalo sipi Lomu gamani bomofihi bulo maga ho ti'ohube. To nani Yuta bonatoga nani foipana mone li huto mehu'ohunaya kaika akeheli bati hu'ahana. ¹¹ To nani foipana lito ni'ifi to filise suhi luto ana'ina mone li sibina hu'ehinogo'nimo ya bati hite noho fililabe. To enali nifisa neina kamofihi hapa'a meni'inogomo bo moneuba nayato lito meepilina'mu yabe. Nani sipi gihiti bo Sisahi kehe inogo'ni kaga'ni kehelilina'mu yabe luto Polu lu emi'ehina. ¹² Ya luto ligo Fesitasiu kanisole bona'a hiti ka lu kehelilete Poluhi ma luto lu emi'ehina: Kai sipi gamani bo Sisau kaga'ni kehelilibe latagi kai bati huto Sisahi bulo buto ho tilane.

Fesitasiu Polu kumu Agilipahi loka ho'ehina

¹³ Alihi kanagu kibina bo Agilipa hiti to liha'a Benisi hiti Fesitasihi Sisalia hepato ete be tigi'aha'ina. ¹⁴ Etali nesi'a kana ana hepato minela'igo Fesitasiu Poluhi kaga'mu kibina bomofihi lu emi'ehina: Bo mone maga Felikiu naga nonugu he'mi eto'ehina nohibe. ¹⁵ To nani Yelusale hepato bu'ohugo Yuta mono nohi kaba hulata bona'i hiti to olopa bona'magi hiti ya'mana bomofihi kaga'a lu nimite fisa ite ho filibo lite nogo'na bi'ahana yabe. ¹⁶ Ya lago nani ka'anilo nona'a ma luto lu'ohuna: Lali Lomu bona'magita hapatiya bo mone'mofihi fa'mene fisa ilata menohune. Bo mone'mofitoga kaga ni'igomo yata'a ka foya lu epololata bomofihi

bulo ho tigo lali geba hu'ohunogo ana boubu kaga fisa neinamofihhi keheli bati hulata nohibe.

¹⁷ Ya hilete enali maga moneka nani'ni hiti nehetito nani yatama kana memino'ohube. Eteka'a ka foya lilata nonugu nani minoloto'ni ana bo le'mete tilo luto enoho lifi'ohube. ¹⁸ Enali kaga fisa neina bona'i ho ti'ahanaya to enali ana'ina foipana li huto hu'ehina mone ni'ina lu huto hila fi luto keheluna enali lu huto mehi'ahana yabe.

¹⁹ Enali mono kamu'i lite ka emekila to bo mone fili'ehinamofihhi gi'a Yesu aku'i ho tito nohibe luto Polu nolina kamu'i hiti yabe. ²⁰ To nani ya'mana kagalo nekesa yigi yigi huna hapa'a keheli bati mehuto'ni ma luto loka ho'ohuna: Kai Yelusale bitogo nani kagaka keheliluna bati hutofihhe?

²¹ Ya lugo Polu kaga'nilo nona'a lu'ehina: Nani nagalugu nohinogo'ni alihi sipi gihiti bo Sisau kaga'ni kehelilina'mu yabe. Ya ligo nagalugu bite he'mi etenogo nohinogo alihi kana'agu Sisatoga ho lifilube. ²² Ya luto ligo Agilipau Fesitasihi ma luto lu emi'ehina: Nani'ni ya'ma bomofihhi kaga'a keheliluna'mu yabe lu'ehina. Ya ligo Fesitasiu yago etehi kaga keheli etalane luto lu'ehina yabe.

²³ Ya ligo kelete eteka'a Agilipaugo Benisiugo etali gukete hekolo bati hite be gete he'mite hilete e'aha'ina. Etali ana hepato gimi bo hiti to olopa bona'i hiti tutuma nonugu tite minelete Fesitasiu Poluhi le'mete tilo luto kehe igo le'mete ti'ahana.

²⁴ Ya hilago Fesitasiu lu'ehina: Kigibina bo, Agilipao, to asaga bona'i malo lali hiti nehanamagita lenali ya'ma bo bu galo. Asaga Yuta boana'i Yelusale nehanamagifi to maga nehanamagi hiti enali ai'i nani bulo fisa i'ahana. To enali sipi

kehe ite ai meminalina'mu yabe lite ho filibo li'ahana. ²⁵ To nani ma bo bu go'ohuna ai fililina'a li huto mehu'ehibe. To ai'a sipi gihiti bo Sisau kaga'ni kehelilibe luto lu'ehigo nani ho lifinogo'ni bilibe luto nekesa yigi'ohuna yabe. ²⁶ To ailuguti kaga bati hina'a sipi gamani bomofitoga fayahi genogo'ni bilina'a meli'ohuna. Ya'mu luto kigibina bo Agilipao, kai kubulo hiti enali enubulo hiti ya'ma bo le'moto noobe. Lali asaga'i kaga keheli bati hulototi nani alihi ka hapa'a lito mone fayahi galube. ²⁷ To nani nagalugu nohina bo mone'mofihi fisa ite kaga li'ahana'a fayanugu megose ho lifinogo'ni bilinaya bati mehilina'mu yabe luto ya'ma Fesitasu luloto lu'ehina.

26

Polu Agilipaha bulo ka'a lu hokolo hu'ehina

¹ Ya luto ligo Agilipau Poluhi ma luto lu emi'ehina: Kai nani nubulo kagaka alubo. Ya ligo Polu yaha'a li saga huloto ma luto lu epi'ehina:

² Kibina bo Agilipao. Yatai kai kubulo kaga'ni lu hokolo huto negelo bito lu kimilube'mu nohube. To enali Yuta bona'magi nifisa neina kaga lu kimiluna'mu yabe. ³ To Yuta bona'magi hapa'ani hiti to enali enoloka helata nehanamofihi kai keheliya i'ahane. To nalalu'niga kai kaga'nilo kosele'i mekehenogo kehelito minobo.

⁴ Asaga Yuta bona'magi nani koyapa'i neheya bo mino'ohunamofihi hapa'ni akeheli su he'ahabe. To nani me'nigu minoloto'ni alihi Yelusale hepato bula ola huto mino'ohunamofihi hapa'ni akeheli'ahabe. ⁵ Enali nani'i koyapa'i

keheli nete'ehitemo lu hokolo hu kimilabe. Nani koyapa'i yata'a Felosi bona'magihi hapa'ani lito mino'ohuna ya'mana suhi keheli'ahafi fulu huto meni'ibe. Ai asaga mono katimofihi hapa'a hoto ni'ibe, lite lu kimilabe. ⁶ To nani yatai maga ho ti'ohugo nifisa ite ka foya neniminamofihi hapa'a ma huto ni'ibe. Koyapa'i Hu'mau tatatigihi kaga molo epolo'ehinamofihi mana'a huto hilibe luto'ni nani geba hu'ohube. ⁷ Enali nayahi luga luga su hoto nigigusagati loemo heleko malago nagatimagi utehi etehi Hu'mamofitoga nunumu nama lite minete komopa'ani aitoga amuya melete emite ananamofihi nogo geba hite mine'ahana yabe. To kibina bo'nimaka, nani'ni hiti anana'mu luto komopa'ni emito geba hu'ohunana'mu lite Yuta bona'magi yatai nifisa neibe. ⁸ To lenali Yuta bona'i henabe lite Hu'mau fili'ahana bona'i enele'mo ho metilibe lite le-negekesa nekehelibe?

⁹ Koyapa'i nani'ni asaga suhi li huto huto Yesu Nasalete bomofihi gi'a li melugu malalube luto asaga negekesa keheli'ohuna yabe. ¹⁰ To nani ya'mana suhi Yelusale hepalugu ali huto hu'ohube. Mono noto kaba bona'magitogati kaga liloto'ni Hu'mamofihi bona'a babu lito nagalugu enele'mo mologo alihi enoho nefiligomo nani bati hite nugufagu laga hina suhi nehabe lulata hu'ohuna yabe. ¹¹ Nani babu yupahi Yuta bona'magi li nupa hite minelata nehana nonugu posa gito enayato lito naga osatu enibi yigiloto Yesutoga komopa'ani neemina he'milafi luto naga'i epi'ohuna. Enali kumu luto nani nitaluga logo bilata higo fato fato hepato foto'i

nehanalo enegene mane ito enoholata hu'ohuna yabe.

Polu Kilisitohi bona'a lolo hu'ehina kaga lu hokolo hu'ehina

¹² Ya'mana suhi hilube luto mono noto kaba hulata bomagi buto ana suhi li huto hubo lite noho lifigo Tamasiko hepalugu ti'ohuna.

¹³ Kibina bo'nimaka, fuligaha kanalo nani kapo moloto notugo kokulumaguti fana mehenauba yege hoto limito nani'ni hiti to nemege'i melete bana bona'i hiti nohutalo lusina huto fi besa lo'ehina yabe. ¹⁴ Ya higo lali asaga'i melugu

limito ko gehesa hulototi nani nogo mone ma luto Hibulu nogoguti ligo keheli'ohube: Solio, Solio. Kai hena hibe luto nani'i negene mane ito nonahane? Kosa kosa'namofihi kigigusatu'i noita kaika kugufakagu limo fito kugufamofihi gabu foya noemine. ¹⁵ Ya luto ligo ana nogomofihi ka'alo nona'a nani ma luto lu'ohuna: Sipi Bo'ni, kai kiyi'agabe? Ya luto Sipi Bouba lu'ehina: Nani Yesuita negene mane ito nonahata bomofita nolube. ¹⁶ Ya nohunagi kai ho tito ho ti fefe lubo. Kai kele kele pana'ni lolo huto yatai kubulo hu'ehinana hiti to alihi kubulo hilinanamofihi luga'a bonatoga lu yege halane luto nani kaitoga kubulo hu'ohube. ¹⁷ Isilaeli bona'i hiti to fegutoga bona'i hiti enali folagaha'anigu koho lifnogo'ni bita bonatogati nani kele'mo kubuto biluna'mu yabe. ¹⁸ To kai enubu'ani li gili gili huto metepunaguti fana mehenagu enele'mo nomoloto Sataha amuya'aguti Hu'mamofihi kapo'agu enele'mo malalane. Ya hitogo enali komopa'ani nanitoga niminogo foipana'ani kele

li epelenogo Hu'mau enele'mo eto higo nehana bona'magi folagaha'anigu hepa'ani lilabe.

Polu mono foya li'ehinamofih i kaga'a Agilipahi lu emi'ehina

¹⁹ Kibina bo, Agilipao. Nani ya'ma luto kokulumaguti nubulo hinamofih i ka'a pelesa mei'ohube. ²⁰ Nani yata'a hapi fito Tamasiko hepa'alugu bona'i lu epiloto'ni alihi Yelusale bona'i lu epiloto to asaga Yutia kegi'a hepa'i ni'inalo ni'inalo lu epimofa'na huloto'ni to ana huto fegutoga bona'i hiti ma luto lu yege ho epi'ohuna: Lenali foipa fato fato suhi nehanamofih i he'mi su helete Hu'mamofitoga i behe hite bilete hetofa sunogo hite bona'i enubulo minalanauba mana'a huto hilibe. ²¹ Nani ya'mana suhi hunana'mu lite Yuta bona'magi mono nonuguti nayato lite noho fililune'mu hi'ahana yabe. ²² Ya hana ya'mana kana'agu Hu'mau nehe'molata higo mino'ohuna. Ya'mu luto nani maga ho ti'ohuto bona'i lagaso'afi to napa'afi mone'ago hite nehanamagi enubulo nani kaga'ni lu noepube. Ma noluna kagaya koyapa'i kaga lu yege hose bomagi hiti Moseu hiti huto hilibe lite li'ahana'a nani ana huto lu noepube. ²³ Ai Mesiau gabu foya lito fililoto ai yata'a kohe to letoto kene keliguti aku'i ho tilina'mu yabe. Ai Yuta boti hiti fegutoga bona'i hiti ya'ma lubuto bise'namofi hiti mino fana toto minosemofih i kaga'a lu yege ho epilina'mu yabe lite li'ahabe luto Polu lu'ehina yabe.

²⁴ Polu ya luto kaga noligo Fesitasiu bunepa ito amuya kaga ma luto lu emi'ehina: Poluo. Kai

negi nohane. Kehelise'nakauba kekesagu bai toto kele'mo negi nonago negi kaga nolane. ²⁵ Ya ligo Polu kaga'alo nona'a ma luto lu emi'ehina: Sipi bo, Fesitasio. Nani negi nagi meno'ohube. Nani nekesa'ni ni'ligo ma'naka luto nolube. ²⁶ To kibina bo, Agilipao. Kai ya'manana asaga'i keheliya i'ahata'mu luto nani koli mehuse amuya moloto kaga lu nokumube. To ya'manana fala kito sugunaluga huto mehu'ehinagi kai asaga'i yege yegel'i huto hu su ho'ehinana akeheli bati hu'ahane. ²⁷ Kibina bo, Agilipao. Koyapa'i ka lu yege holata bomagi li'ahana kaga keheli'ahata ni'ifihe? Nani nekesa nokeheluna kai akeheli'ehilata'mu yabe. ²⁸ Ya ligo Agilipau ma luto Poluhi lu emi'ehina: Yatai hupamone kana'asilo nani'i Kilisitohi bo nele'mo lolo hilube luto kai nokehelipihe? ²⁹ Ya ligo Polu ma luto lu'ehina: Hupamone kanafi yatama kanafi ya bati huto ni'ibe. Ya hu'ehina nani nunumu'ni Hu'mamofitoga ma luto ni'ibe: Kaika hiti to asaga bona'i yatai malo kaga'ni nekehelinamagita nani suhi lolo hilabe luto nokehelube. Ya hu'ehina ma seni naga'i lenalitoga meminalibe luto nokehelube.

³⁰⁻³¹ Polu ya luto lulago ya'ma kibina boubu gamani bona'a hiti to Benisi hiti ho tilete nonuguti fegutoga limite ma lite lu keheli'ahana: Ya'ma bomofihi ho filila to nagalugu le'mo molola hilutana mone li huto mehu'ehibe. ³² Ya hilete Agilipau Fesitasihhi ma luto lu emi'ehina: Ya'ma boubu Lomu gihiti bo Sisa ka'ni kehelilibe luto kehe meitita lali gulu ho etonogo bitita'mu yabe.

Polu botigu tito Lomu melugu bu'ehina

¹ Botigu tito Itali hepalugu bilune lite enali lu bati hilago Poluhi hiti to luga'a nagalugu nehana bona'i hiti Yuliasiu Lomu gimi bomag-ihi kaba'ani ai ya'ma sipi gihiti bomofihi luba bona'amagi yabe lite enigi helata hanamagihi enayanuga bi'ahana. ² Boti mone Esia hege nagamilugu bilube'mu Atalamiti hepatoti nohinagu lali buto tiloto nobuto anagu Alisitaka, Tesalonika metogati Masetonia hepato bo nohigo moneka bu'ohuta yabe. ³ Ya huloto eteka'a Sitoni hepato neheti'ohuta. Ya'ma gimi bona'i kaba'ani Yuliasiu Poluhi le'mo laga huto'a ai lalu'agita ete be tigite ana'ina'amu muhi nobilina emilo luto lu epi'ehina. ⁴ Yaloti ho tito nobunogo habahuba losopagati boti li kose'na hina'mu luto Saipalasi nagamilugu me'mo ti'ehinalo kegi'a habahi menolina sopaga i molo i molo huto bu'ohuta yabe. ⁵ To Silisia hiti Pamifilia hiti hege nagami mupa'a i gofa hoto Lisia kegi'a Maila hepato neheti'ohuta. ⁶ Ya hepatoti gimi bomag-ihi kaba'aniuba boti Alekasatilia hepatoti Itali metoga bilube'mu nohinagu lele'mo molo'ehina yabe.

⁷ Hege nagami'i nobiligo habahuba hiti lito luna higo botiuba fulu fulu huto bigo ya humo nobunogo loe lugufa kana'a li he'munogo kosele kasele gofa loholago alihi Naitasi hepa'mofihi mula kegi'a neheti'ohuta. To habahuba felele mehuse'na higo ana kegi'a bu yatama mehuse Kiliti nagamilugu me'mo ti'ehinalo ni'ina kegi'a habahi melinaloga boti li moloto Salomone Nek-

isa be ligito bu'ohuta yabe. ⁸ Hege nagami'uba bilito gofana'a higo kapo bilutana'mu huloto hege nagami beleha'aga boti li molo li molo huto Enubuto Bilata Hisa yabe lite gi'a helata nehana Lasia hepa lebato neheta'ohuta yabe.

⁹ Ana hepatoga babu kana minonogo hege nagami'i babu lito bililoto muyagu tigo ya'mu luto kapo mebiluta suhi higo analoko nohunogo Yuta bona'magihi sipi yupapo foipana'ani kele li'ehina yupahi alebe ligi'ehina. Ya higo Polu ma luto logo go epolo'ehina: ¹⁰ Ma bose, hege nagami'i lusina huto biliba biliba huloto asaga fe'no hiti boti hiti ho fi tenogo bona lugufa he'mi su haluta suhi nohigo nani bu nogobe. ¹¹ Ya lina kaga gimi bo kaba'aniuba mekehelise boti afo'afu yagi to botilo nolina bo yagi etali la'ina kaga'atiti loko keheli bati huto mino'ehina yabe. ¹² Boti melelata nehana hisalo yasi yupahi bati huto memnose hepa'i ni'inago hege nagamilugu boti li moloto babeyafa huto Finikisi hepato nehetiluta bati hilifi lite babu bona'magi li бага i'ahana. Boti melelata nehana hise Kiliti ni'ina ai layahi yoga'aga bu hu nomoloto si'a layahi lamaga'aga hu molo'ehinago yalo bati huto yasi kana'alo minalupi lite li'ahana yabe.

Hege nagamilugu sipi habafahi li'ehina

¹³ To yofo kegi'ati fulu fulu yasi ligo enali li'ahana suhi hilune'mu hilete botiguti ketana he'migo hege nagamilugu limito ni'ina li bilite botigu li melelete Kiliti beletoga boti li mele li mele hite bilune'mu hi'ahana. ¹⁴ Ya nehago ana'asilo mele'isi yege notina kegi'ati sipi

habafahi lito nagamilugu me'mo ti'ehinanagati limi'ehina. ¹⁵ Ya huloto boti oto ana habahuba li kule kule higo ana habahi ilaga huto mebiluta'a higo ya hunipa ya hunipa huloto he'munogo ana habahuba fa'mene lele'moto bu'ehina yabe. ¹⁶ Layahi sog'a kegi'a Kota lagaso meli ti'ehinanamofih i be ligito nobuto habafaha nohi nesi'a limi'ehina. Ya higo kapo bilutana'mu huloto sipi botimofih i lagaso boti'atu le'mo buto bi'ohuta yabe. ¹⁷ Enali lagaso boti kefefe hilago hehe hilete sipi botimofih i sopa'aga nagatu'i amuya melete gi ule'ale hi'ahana. Libia hege nagami beletoga buto kehelugu fi pota gilupi lite enelesa'ani gofa ligo koli bena hilete sipi botimofih i habafaha noha'a li koyofu hilago habahuba ai'a enele'moto bu'ehina. ¹⁸ Italuga logo bina habahuba amuya moloto liba liba higo eteka'a sipi botigu ni'ina fe'nohi ga ilegete nagamilugu li he'mi mele mele hilete, ¹⁹ ologo'a sipi botimofih i nasana asaga'i enayatu lite nagamilugu he'mi mele'ahana yabe. ²⁰ Ya hilago babu kana'agu yege okaba'a sonofi'i okaba'a hiti bu mego'ohuta yabe. Ya'ma kokulumagu sopopotu fi hekini lo'ehinagi biluna kapo'a bu mego'ohune. To sipi habafapogo babu lito liba liba huto mino'ehina yabe. Ya higo lugufati lubuto bito meminaluta supo nohibe luto kehelune.

²¹ Babu kana'agu nose'na mo site minago Polu folagaha'anigu ho tiloto ma luto lu epi'ehina: Ma bomagita, lenali koyapa'i nani lu lepuna kaga liyafa hite Kiliti hepa'i he'mite meatita ya'ma huto ketana li lugufalo memolola to babu

fe'noha'ani meminigila hitita'mu yabe. ²² Ya hu'ehinaya nani yatai lu nolepube, lenali lenugufatinigu fulu bati hino. Hena'mugope bo mone meminigilina ma botigo li sibina huto minigilina'mu yabe. ²³ Nani Hu'mamofihi lalu'afita nohuto'ni asaga yupahi komopa'ni aitogago emito minolata nohuna bo nohube. Ya'mu luto yatai folugu'i Hu'mamofihi agelo'auba nani nemetoga ho ti'ohuto ma luto lu nimi'ehina: ²⁴ Poluo, kai kelesa melinogo koli mehuse. Ya'ma sipi bo, Sisahi bulo buto ho tilana'mu yabe. To kai kehelebo. Asaga bona'i ma sipi botigu nehana enali'i Hu'mau kai'i akimi'ehibe. ²⁵ Ya luto lu'ehinagi nalalu'nigita lenali asaga'i lenelesa melinogo koli mehilo. Hena'mugope Hu'mau lu nimi'ehina'a huto hilina'mu yabe luto nani komopa'ni aitoga emito nohube. ²⁶ Ya'mu luto lali hololu luto butoti me'i ti'ehinana mone ni'ilinaga minose gilune.

²⁷ To nayahi luga luga su holoto nigigusagati loegi loegi hele ko malana yagi folugu'i botiuba Metitelia hege nagami folagaha'agu haya koloto bu'ehina. Ya nohigo folugu kana folaga talaga nohigo botilo kaba bomagi botiuba hege nagamilugu me'i mone ni'ina lebato nobigo be ge'ahana. ²⁸ Ya hilete enali nagato sipi gela'a hiti'na naga ilete nagami hefunugu he'mi etago limilete bu gana ana hefuhi supa noto emagu'na minago nesi kana'a minoka hilete aku'i ana suhi hite bu gana nesi'asi sebaya toka hu'ehigo be ge'ahana. ²⁹ Botiti efatoga buto ibe tele bibe hilifi lite enelesa'ani gofa ligo ya'mu lite yatama naga'i loegi loegilo keta'a hiti'na naga ila ila hilete botimofihi megesa'agati he'migo hefunugu limilago

go'i mele'isi lilibe lite numuna hi'ahana. ³⁰ Ya nehago botigu lili'na lite humofa'na hilata nehana bomagi i fenene hite koli hilune lite lagaso boti hefunugu he'migo limilago babeyafa suhi lite sipi boti golaga'agati nagato keta'a hiti'na naga inogo hefunugu limilina suhi hila ya hila hite akili akili mine'ahana yabe. ³¹ Ya nehago Polu bu enogoloto gimi kaba bomofihhi to bona'a hiti ma luto lu epi'ehina: Enali botigu kaba hite humofa'na hilata nehana bomagi ma sipi botigu meminalana lenali lenugufatini li lenubuto mebilana'mu yabe. ³² Polu ya luto lu epigo gimi bomagi sipi botilo naga i'ahana naga'i ho laga hu he'migo boti nagami mupa'alo bu'ehina.

³³ Go'i alilube'mu go kulu kulu notigo nose'na mo site minana bona'i nose'na luga'a nalo luto Polu ma luto enogo'na bi'ehina: Lenali 14 yegegu habafahi su halifi lite geba geba hite minete ana kana'agu nose'na mo site menose mine'ahabe. ³⁴ Ya'mu luto nalalu'nigita lenogo'na nobunagi nose'na no lenubuna hete yalo lenali bati hilabe. To latahatinigu okatini mone'isi i tegiloto fenene mehilina'mu yabe. ³⁵ Polu ya luto luloto beleti nose'na lito asaga enali enubulo Hu'mamofitoga fokehi ho emitu nunumu huloto li pata sito nalube'mu hu'ehina. ³⁶ To enali ka'a keheli emite enugufagu laga higo enali silaga'i nose'na no бага i'ahana. ³⁷ To botigu asaga'i mino'ohuta asaga'i leka soto li nupa huto bu gota 276 bona'i mino'ohuta yabe. ³⁸ Asaga bona'i nose'na no бага ilete aliha'a legeya nose'na luga'a botigu mele'ahana hege nagamilugu he'milago bi bi hilago boti keta mehuse hu'ehina yabe.

Boti tele tulu bi'ehina

³⁹ Botigu kaba hite humofa'na hilata nehana bomagi etehi go'i noligo ya huto hege nagami beletoga nootagi lite bu go bati mehi'ahana. To benebehi ni'inalo sibilipa homo mololata nohina ni'inago analo bati hilifi boti li bego hilune li'ahana yabe. ⁴⁰ Ya lilete naga'i moneto ketana naga ilete he'migo hefunugu limito boti li tokolo hu'ehina ho hepulu tu he'migo hefunugu nolimigo moneko kumu ana botimofihi le'mo fotogo hago nobina naga'i gulu ho he'mi'ahana. Ya hilete botimofihi golaga'agati habafaha noha'a li putu tago habafahuba enubulogago enele'mo tufoto nobigo hege nagami kehetoga be gelete bi'ahana yabe. ⁴¹ Ya hana ana boti'aniuba efato buto tiloto ilepa hoto ule'ale hu'ehina. To hege nagami'uba amuya bilito tito huto botimofihi ana'ina'a mone li gofa ho'ehina yabe.

⁴² Ya'mu lite ana botigu minana nagalugu bona'i koli mefele'ehinogo enoho fili su halune lite gimi bomagi li'ahana. ⁴³ Ya hago gimi bomagi kaba'aniuba Poluhi le'mo buto bito he'malube'mu ekesa keheliloto lenali enoho mefililo luto laga hu epolo'ehina. To asaga bona'i nagamilugu nogosa ite keheli'ahana'a nukuma nete kehetoga kohe tete bilo, luto enoho lifi'ehina. ⁴⁴ To luga'a bona'i botilo li pili kete nehinogo itebe gili nehina'alo li'ehinogo hege nagami'uba lele'moto kehetoga bilibe lu'ehina. Ana suhi hilete asaga bona'i asaga'i bati hite kehetoga bu бага i'ahana yabe.

28

Polu Molita hepato mino'ehina

¹ Lali asaga'i bati huto kehetoga buloto keheluta ana hege nagamilugu ti'ehina metoga nehetutamofihigi'a Molita yabe lite gi'a he'ahana yabe. ² Ya'mana hepato boana'magi hetofana hite lele'mo bati hi'ahana. To ko'i ilube'mu nohigo yasi higo logo gelete asaga'i lele'mete ana logolo laba hulago lota hu'ohuta yabe. ³ Polu musa logo mone sa giloto moloto lito logogu he'migago ana logo sagu osifa'i mone nohinati logouba mukoho ligo fi gene toto limito Poluhi yanugu folo'ehina. ⁴ Ana osifa'uba Poluhi yaha'alo heni kofigo ana hepato bona'magi be gelete ai lu emigo ai lu emigo ma lite li'ahana: Ma bomagita manauba bo mone ho fili'ehilina ni'ibe. Ai hege nagamilugu mefilinana nohibe. Ya hina bebe sana sipi felemouba minoba minoba mehilibeluto keheli'ehibe. ⁵ Ya nelago Polu ana osifa'mo li fiki higo logogu buto lo filigo to ana osifa'uba Poluhi yaha'a mone heni getefe meho'ehina yabe. ⁶ To Poluhi yaha'a lupe lupe bilifi lila to mele'isi limito melugu kalifi lite bulu'i helete yatama kana minana sibina mone mehu'ehina. Ya higo enali enekesa aku'i yigi fato melelete ma lite li'ahana: Ai felemo suhi mone fato'mofihinohibe.

⁷ Ya'mana nagamilugu ti'ehina me'i kibina bo mone'mofihigi'a Pubiliasi yabe luto mino'ehina bomofihigi'a me'alo yabe. Ya'mana bouba ai noha'aluga lele'moto buto hetofana huto

kaba hu letago ai nonugu nohi loegi mon-
egi ko'ohuta yabe. ⁸ Ya'mana kana'alo Pubil-
iasihi afo'afihi besigo si'alugati bila to gufa'a
mukoho akoho ligo koloto mino'ehina. Polu
ana bo aitoga buloto gufa'alo yahi lito nunumu
hu etago besise'na'a su ho eto'ehina. ⁹ Ai
ya huto ye kolago babu bona'i ana ti'ehina
metoga enebesigo mine'ahananamagi Polutoga
ago ai ana huto enele'mo ye ko su ho'ehina
yabe. ¹⁰ Ya'mu lite enali hetofana hite lele'mo
bati hi'ahana. Alihi ana nagamilugu ti'ehina
me'mofihi hepa'i he'mito bilune'mu nohunogo
nose'nati su ho'ehina nona'a babu lite botigu li
bai te lete'ahana yabe.

Polu Lomu hepato neheti'ehina

¹¹ Ya'mana nagamilugu ti'ehina me'mo ikahi
loegi monegi minoloto alihi boti mone sipi
habafahi lina kana'alo oto mana ti'ehina mel-
ugu ni'ina botigu tilenogo lele'moto bu'ehina.
To ya'mana boti Alekasatilia hepatoti yabe. To
ana botimofihi sopa'aga gi'a Felemofihi Pana'a
Loemale'i Yabe lite fayahi ge'ahana. ¹² To
lali Sailakuyu nohi hepato nehetilototi ana hep-
ato yege loegi monegi mino'ohuta. ¹³ To ana
hepa'i he'miloto lali i bego huto Legiu nohi hep-
ato nehetito nohi mone'isi koloto eteka'a yofa
kegi'ati habahuba li hapi fito botiti hago loe
yupahi bulago lali Puteoli hepato neheti'ohuta
yabe. ¹⁴ Ya'mana hepato Hu'mamofitoga ko-
mopa'ani emite neminana bona'i bu enogonogo
ana bona'magi lali hiti salele mone minete bilabe
lite lele'mo mele'ahana. To ya huloto Lomu

hepato o'ohuta yabe. ¹⁵ To Lomu hepato ligibo lagabomagi ya hite neabe lite lali kumu lana'a akeheli'ahana. To enali lali'i legeba hite eba eba hite Apiasi Maketi hepato Kalina Nohi Loegi Monegi ni'inalo nehetilete lali'i lebe tigi'ahana. Ya hago Polu bu enogoloto gufa'agu laga gofa higo Hu'mamofhi gelo bi emi'ehina yabe.

Polu Lomu hepato mono ka lu yege ho'ehina

¹⁶ Lomu hepato nehetulenogo Poluhi ai'asigo gimi bo moneuba kaba hu etenogo minalibe luto Lomu gamani bouba lu'ehina yabe.

¹⁷ Alihi nohi loegi monegi koloto Polu ana hepato Yuta kaba bona'i kehe i tulu hu'ehina. Ana bona'i enali ete li nupa hilago ma luto lu epi'ehina: Nigibo nagabose. Lali bon-ati enele'mo sibina hula to tatatigitogati lilata nohuta suhati mone li sibina mehu'ohunamo ni'inamo Yelusale hepalugu nagalugu nele'me melelete Lomu bona'magi enayanugu nele'mo mele'ahabe. ¹⁸ Enali Lomu gamanimagi ka foya nimate kaga'ni kehelina nani ka foipa'a lu sibina mehu'ohugo noho fililana kaga'mu sa sa hana meni'igo he'mi netalana'mu yabe.

¹⁹ To nani bona'nimagihi enifisa mei'ohunamo ni'inaya Yuta bona'magi ya'mana kaga pelesa ibe. Ya'mu luto kapomu'i sa sa huloto Sisau gihiti bo sipi'auba kaga'ni kehelilibe luto kehe i'ohube. ²⁰ To ya'ma kagasi'mu luto lenali'i kehe i nupa huto lu nolepube. Nani lenali'i bu lenogoto kaga lu lepilube luto yabe. To asaga lali Isilaeli bona'magita geba nohutanamofhi

ya'ma Hu'mau le'mo ho ti'ehina bo, Mesi-ahi nani komopa'ni emito nohuto geba no-hube. Ya'mana'mu luto ma seni naga'uba yatai nayanugu ma ina i'ehibe. ²¹ Ya luto ligo enali ma lite lu emi'ahana: Kai kumu lite Yutia kegi'ati fayahi mone gete lu melimi'ahabe. To Yutia kegi'ati bonati mone'amagi ete kai kumu ya huto hu'ehibe lite to sibina hu'ehibe lite yana kaga mone lu melimi'ahabe. ²² Ya hu'ehina kai kabagakaguti lu hokolo huto lu limilata kaga lali kehelilune. Hena'mugope asaga boana'magi enabagakaguti kehelutamo ya hite ya'ma naga'magi loko hite fato nehabe lite kaga foipa'a lana'asigo nokeheluta yabe.

²³ To enali kana mone melelete ana kana'alo babu bona'i ete Polu nohina nonugu li nupa hi'ahana. Etehi hapi fito Polu kaga hapa hapa'a lu epiba lu epiba huto nohigo buto yege limi foloto sinihi gi'ehina. To ai ana huto Hu'mamofihi Kapo'amu kaga'a le'mo bati huto lu epi'ehina. To ai kaga koyapa'i lu huto huse bomagi hiti to Moseu hiti fayahi keye'ahanamofihi lu yege ho epi'ehina. To ya'ma kaga'atu enele'mo amuya moloto komopa'ani li keta mehuse hinogo Yesutoga komopa'ani emite minalabe luto lu'ehina yabe. ²⁴ Luga'a bona'magi ya luto lu epina kaga keheli komopa'anigu nemalago to luga'amagi keheliya kalesa hi'ahana yabe. ²⁵ Enali'ani fato fato enegekesa yigilete bula ola hilune'mu nehago Polu kaga mone ma luto lu epi'ehina: Tatatifihhi Aisaiyahi kaga lu yege holata bomofihi bagalo Sikalafu'uba ma'naka luto ma luto lu emi'ehina yabe:

26 Ya'ma boana'magitoga kai buto
ma luto lu epibo:

Lenali kaga'a keheli kehelilanaya
ana kagamofihi hapa'a
keheli hokolo mehilana'mu yabe.
Lenali bu goba bu goba hilanaya
ana bu galanamofihi hapa'a
mekehelilana'mu yabe.

Ya luto lu epibo.

To hena'mube?

27 Ya'ma boana'magi
komopa'ani hekini loto ni'igo
enegekesa'aniuba kaga kehelilina'mu
kosele'a nohago
enali enegekesa'ani
i hekini lete nehabe.
To henabe lutobe?
Enali enubu'anigu bu gete kehelite
to enegekesagu kaga binogo kehelite
to komopa'anigu
nani kaga keheli fe lite hilete'ani
komopa'ani i gelehe hite
nanitoga elenogomo
enele'mo bati hiluna'mu yabe.

Ya hu epalalunaya
enali'i anana hu lalibe lite
enubu fili kete,
enegekesa hekini lete,
to komopa'ani i sepa ite nehanagihe.
Hu'mau ya luto lu'ehina yabe.

28 To Polu mone kaga hiti lu epi'ehina: Yatai
nani Hu'mau enubuto bilata kaga'a lu nimi'ohuto
fegutoga bona'i nehanalo noho lifi'ehinagi enali

ana ka lamana'a kehelilune'mu nehave. ²⁹ Polu kaga alu epi su holago Yuta bona'i bula ola hi'ahana. Enali'ani bite ai bugu figo ai bugu figo hite kenasabo bibu bibu hi'ahana yabe.

³⁰ Polu ai'a mina fi'ehina nonugu kufu loemo minoto boana'i aitoga elata hana koyone kaga lu epito enebe tigito enele'mo hu'ehina. ³¹ Ai Hu'mamofihi kapo'amofihi kaga'a lu yege ho epito Sipi Bo Yesu Kilisitohi kaga'a enelepito amuya kaga lu epilata higo bo moneuba kaga'a mone i laga mehu'ehigo Polu anaga mino'ehina yabe.

**Ka Lamana'a Mono'i Lu Mu Tifi'ehina Ka
Yabe**
**The New Testament in the Benabena Language of
Papua New Guinea**
Nupela Testamen long tokples Benabena

copyright © 1982 Wycliffe Bible Translators, Inc.

Language: Bena-bena (Benabena)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-09-26

PDF generated using Haiola and XeLaTeX on 11 Nov 2022 from source files dated 9 Oct 2020

429cb299-5ab9-51c4-8857-9de5c72f8388